

মন-ভাসির
টানে
কালকূট



সব বার্তারই কচকচি আছে। আগে সেইটি সেরে নিই। বললাম অবিশ্বি “কচকচি”, কিন্তু শব্দটি আবার সকলের মনে ধরে, তবেই দায়মুক্তি ঘটে। ধরবে কি? কারণ যারা বিরাট ওজনে বলেন, তাঁরা লম্বা “ভূমিকা” করেন। এখন আমার মতন প্রাণী যদি ভূমিকাকে কচকচি বলে চালাতে যাই, তা হলে অনেক মানীর মন খচখচিয়ে উঠতে পারে।

তবে জোড় হাতে নিবেদন করতে পারি, আমাকে না হয় চলতি কথায় বলতে দিন। “ভূমিকা” বললে, শব্দটির কিছু কিঞ্চিৎ সাজ-গোজের দরকার হয়। হয় না কি? সাজগোজ বলতে আমি ব্যাখ্যা বন্ধন বোঝাতে চাই। ব্যাখ্যার থেকে “বন্ধন” শব্দটি যেন থাকে বেশি। কেবল তো “মুখবন্ধ” বললেই সব বোঝানো হয় না, “ভূমিকা” যার আর এক নাম। অবিশ্বি ইংরেজির “প্রিফেস”কে “মুখবন্ধ” বলা যাবে কী না, সে-বিষয়ে আমার ধ্যান ধারণা স্পষ্ট না, কথাটা আগেই কবুল করি। “ফোরওয়ার্ড” শব্দেরই বা মানে কী? ওই যে কী বলে “মুখবন্ধ” জাতীয় একটি শব্দ, ইংরেজি “ফোরওয়ার্ড” কি সেই শব্দে খাওয়ানো চলে? আহ, সব কিছুই ভিতর বাহির না জানলে পরে, কত রকমে যে ঠেক খেতে হয়। কথা বলবো কি। বলতে গেলেই হিজিবিজি। আসলে মনে মনে ভয়। এ ভয়টাকে যে ত্যাগ করতে পারে, তাকে বলি বন্ধনমুক্ত।

আমিও কেন না নিজেকে বন্ধনমুক্ত ভাবি? কেন না, আমার মনে হয়েছে, এক আধবার নয়, অনেক বার অনেক প্রকারে, বন্ধনমুক্ত হতে পারলে, সে ভাবের ভাবী হয়। আমি তো আসলে বেত্রেদণ্ড নিয়ে পশ্চিতি করতে বসিনি। আমার সাধনা একটা, হতে চাই “ভাবের ভাবী”। আর পশ্চিতিদের ব্যাপার-স্বাপার যদি বলতে আরম্ভ করি,

আমাদের প্রকাশিত লেখকের বই :

প্রাচীনতম

কোথায় সে-জন আছে

চলো মন রূপনগরে

মস্তকবেশীর উজানে

মন-ভাসির টানে

মিটে নাই তৃষ্ণা

হারান্নে সেই মানদণ্ডে

আরব সাগরের জল সোনা

নির্জন টসকতে

তবে, আমার এই নিয়ে বসা দু-চার প্রস্থ কাগজে আর এক কলামে “কুলাবেক” না। এই “কুলাবেক” শব্দটি দিয়ে তোমার/আপনার নজর কাড়তে চাই। আঙুলের ডগায় ছুই-চার চিমটি দিয়ে তুলে, দু-একটি পুরনো বুলি ছাড়ি। আজ থেকে একশো ছ’ বছর আগের কথা, “শ্রী” নাম ছদ্মবেশের অন্তরালে, এক পণ্ডিত “সোমপ্রকাশ” পত্রিকায় পত্রাঘাতে “বঙ্কিমবাতক”-এর ভূমিকা নিয়েছিলেন। অপরাধ? বিস্তর! সবিস্তরে কহনে না যায়। তাই আঙুলের ডগায় ছুই-চার চিমটির ডগায় দু-একটি পুরনো বুলি উজ্জ্বলের বাসনা হলো। “শ্রী” কথিত উক্তি, “বঙ্কিমবাবু যেরূপ জঘন্যভাবে শৈবলিনীকে চিত্রিত করিয়াছেন, এরূপ জঘন্যভাবে গৃহস্থা বাঙালী কামিনীতে দৃষ্ট হয় না। এটি বঙ্কিম-বাবুর অসহৃদয়তা ও উদ্ভাবনী-শক্তি ক্ষীণতার পরিচায়ক। ফলে বঙ্কিমবাবুর উপস্থাস গ্রন্থনচাতুরী যে দিন দিন বিলুপ্ত হইতেছে, তাঁহার রচিত উপস্থাসগুলিই তাহার সাক্ষীরূপক।”

“শ্রী” মহাশয়ের বক্তব্য “শৈবলিনী চরিত্র আমাদের একান্ত রুচিবিকার জন্মাইয়া দিয়াছে।” এ-সব হচ্ছে রুচিবিকার, জঘন্য ভাব-সমূহের কথা। ভাবের ভাবী হতে গিয়ে আমার ঠেক লেগেছে অস্ত্র। উপস্থাস “চন্দ্রশেখর”-এর “শৈবলিনী” পরিচ্ছেদের দ্বিতীয় স্তবক সমালোচক তুলে ধরেছেন, “পত্র ভিষিষ্টরূপে অনুধাবন করিলে বল্লাল সেন ও দেবীবর ঘটকের কীর্তি এবং তাহার ফলের সহিত প্রাচীন জাতি-ভেদ নিয়ম এবং তাহা হইতে যে-সকল ঘটনার উপপত্তি, তন্মধ্যে অনেক শাদৃশ্য লক্ষিত হইবেক।”

“শ্রী” মহাশয়ের মন্তব্য, এরূপ অবিশদ বাঙ্গালা ঊনবিংশ শতাব্দীর উপযোগী নহে। আজিও যদি রামমোহন রায়ের সমকালীন বাঙ্গালা ব্যবহৃত হয়, তাহা হইলে এই ভাবার উন্নতি হওয়া সন্দেহপরাহত। বঙ্গ-দর্শনের লেখকগণ এ-বিষয়ে সাবধানতা অবলম্বন করিবেন।...“অপদার্থ উপস্থাসপ্রিয় বাঙ্গালীদিগের নিকটেই বঙ্গদর্শনের গৌরব। একটি উপস্থাস শেষ হইলেই অমনি আর একটির জন্ম বঙ্গদর্শনে বিজ্ঞাপন দেওয়া হয়।” ইত্যাদি ইত্যাদি।

পড়ুয়াগণ! (সর্বনাশ, সোমপ্রকাশের “শ্রী” মহাশয়ের উক্তি মতো, আমিও সাহিত্যসম্রাটের মতোই ভাবার “গুরু সাহেবী” দোষ করে ফেললাম যে! “গুরু সাহেবী” দোষের আর এক নাম কি “গুরু চণ্ডালী”? হবেও বা। তথাপি এ আমার মনের সাধ, পাঠকগণ সন্মোহন না করে পড়ুয়াগণ করি। কেন যেন মনে হয়, যে/যিনি পড়ে বা পড়েন, আর লেখে বা লেখেন, চলতি সন্মোহনে ভাবের ঘরে মাখামাখি কিঞ্চিৎ বেশি হয়। লেখার সময় আলাদা কথা। লিখিয়ে আর পড়িয়ে তখন থাকুক গিয়ে যে যার আপনার মনে। তখন মুখ দেখাদেখি বন্ধ। অবিশি “শ্রী” মহাশয় বঙ্কিমবাবুকে আরও বলেছেন, ভাবার ব্যাপারে নাকি তিনি “স্বীয় স্ত্রীবিহীনতা প্রদর্শন করিয়াছেন।”)

অতপের আবার, পড়ুয়াগণ! সোমপ্রকাশের “শ্রী” নামক পণ্ডিতদের তোমরা/আপনারা আজিও দেখে থাকো ও থাকেন, চেনো ও চেনেন। শ’ বছর আগের সেই আন্তশ্রদ্ধ আমার মনে পড়ছে, ভাবা বিষয়ে নিজের নানা ঠেক খাওয়াতে।

কথা যখন তোলা হয়েছে, তার একটা জবাব দরকার। “ফরওয়ার্ড” শব্দ বিষয়বস্তু কথনের “অগ্রস্থ” শব্দে কি খাওয়ানো (সেই “গুরু সাহেবী” দোষ।) চলে? যাকে বলা যাবে “আগের কথা”। অথবা নাকি মূলের ধরতাই? কী বলবো? অব্যাপারীর ব্যাপারীমূলভ কাণ্ডকারখানার মতন লাগছে। কিন্তু কচকচি শব্দ দিয়ে কথাটা তুলেছি যখন, তখন নিজেকেই বেঁধেছি। এ-বন্ধন থেকে মুক্ত না হলে, আমার নিজের খচখচানিও যে যায় না। তার আগেই অবিশি “ভূমিকা” শব্দ দিয়ে কচকচির মুহূ টানতে চেয়েছি। কারণ আর কিছু না। কচকচি শব্দকে “ভূমিকা” শব্দের দ্বারা মুণ্ড আকর্ষণ, অনেক মাননীয় রচয়িতার মন খচখচিয়ে উঠতে পারে। আমি ভাবের ভাবী হতে চাইতে পারি, কিন্তু একেবারে চোখ বুজে গায়ের জ্বোরে না। “মুখবন্ধ” আর “ভূমিকা” শব্দে তফাত নিশ্চয় আছে। “ভূমিকা”কে গুরু গুরু বলা যায়? গানের আলাপের মতন?

এতেও আবার গোড়ায় গলাদের লক্ষণ। গানের আলাপ বিষয়টির

শুরু আর শেষ করার মাপজোকের কাঁটা যে কোন্‌ চালে চলে, অনেক সময় তা খরা বিলক্ষণ মুশকিল। “ভূমিকা” শব্দের সঙ্গে কি তার তুলনা চলে? চলে না একেবারে বলা যায় না। না হলে, বারো হাত কাঁকুড়ের তেরো হাত বীচির কথা বলা হয়েছে কেন? আভিধানিক অর্থে “প্রেফিন” যদি “প্রারম্ভিক মন্তব্য” বোঝায়, সে-মন্তব্যের সাজগোজ অনেক সময়েই তেরো হাত দেখিয়ে ছাড়ে।

এবার তো নিজের বেলাতেই বলতে ইচ্ছা করছে, এক কচকচির ব্যাখ্যা করতে গিয়ে, নিজেই তেরো হাত দেখিয়ে ছাড়লাম। তবু তো এখনও আসল কচকচিতেই আসিনি। তবে, শুরুর মুখে শাবেকি নিবেদনটাই রাখলাম, ভূমিকা না, বার্তা কহনের আগে কচকচিটা সেরে নিই।

গোলমাল! গোলমাল। আবার গোলমাল! ভাগ্যের কী গুনাহ যে সোমপ্রকাশের বঙ্গদর্শনের “অপদার্থতা” বিষয় গোড়া থেকেই মনে পড়ে যাচ্ছিল, তা আমি জানতাম। আসলে সকলের কাছে ক্ষমা যেনা চেয়ে, আমার ভাবের ভাবী হৃৎনের বিষয়টিকে কিঞ্চিৎ সহজ সরল করে নেওয়া। ভাবার দোষ বৈলক্ষণ্যে কেউ না আবার আমার একান্ত “গৃহপুস্তক ব্যাকরণ”-এর সন্ধানে লিপ্ত হন। গোলমালের ঢেক লাগলো “বার্তা” শব্দে। সোমপ্রকাশের ত্রী নামক ভূতেরা নানা ভাবে বেঁচে আছেন। এমনিতেই তাঁদের মতে সমাজে প্রচলিত শব্দের দ্বারা ভাষা ও সাহিত্য সৃষ্টি অতিশয় অপরাধ, বাঙলা সাহিত্যেরও মুগুপাত। “বার্তা” কহন বহন সবই করা যায়, কিন্তু এক্ষেত্রে আমার ভূমিকা তো বার্তাবাহী হতে পারে না। প্রচলিত অর্থেও, বার্তা হলো খবর বা সংবাদ। কখনো বা জ্ঞানশ্রুতি। এই তো আমার টেবিলের পাশেই একটি পত্রিকা রয়েছে, “অমুকবার্তা”। কথার সঙ্গে বার্তার একটা পিঠোপিঠি সম্পর্ক আছে। ঠিক তেমন করে কথা কইবো বলেও, কচকচি করতে বসিনি। কেন না, সেই পিঠোপিঠির মধ্যে দেওয়ার-নেওয়ার একটা ব্যাপার আছে। অবিশ্বি আমার ধারণা। লিখিয়ে আর পড়িয়েদের মধ্যে একটা অন্তর্নিহিত কথাবার্তার সম্পর্ক আছে।

কিন্তু লিখিয়েদের লেখার সময়টাতে সে অতি নির্মমরাগেই একাকী। অন্তস্থায় যোগসূত্রটাও ঘটে না।

যাই হোক “বার্তা” নিয়ে আর কচকচি না। যদিও “বার্তাবহ পাখী”র সঙ্গে দুজেরও একটি ভূমিকা যুক্ত। সেই অর্থে, যদি হতে পারতেন সেইরকম এক দূত, “যাও পাখী বলা তারে/সে যেন ভোলে না মোরে” তবে “বার্তা” শব্দই বজায় রাখা যেতো। কেন না, এই রকম দৌত্যের মধ্যে বার্তাবহের একটি বিশেষ ভূমিকা আছে। আর সেই ভূমিকা পালন করতে গিয়ে, বিরহী বা বিরাহিনীর আলিঙ্গন চুষনও দূতের কপালে জুটে যেতে পারে। দানপানীর তো কথাই নেই। কিন্তু এ-জগদে আর সে আশা নেই।

কচকচিটা আর কিছু না, ভ্রমণবৃত্তান্তের একটা নতুন কৈফিয়তের অবতারণা। এই “অবতারণা” শব্দটিকে নিয়ে অনেক কথার সূচনা। আসলে, সেই কবে এক আত্মিকালে “মন চলো যাই”-এর ফেরে ফিরেছি, এবার আর তেমন ফেরে ফিরবো না। “কৃষ্ণ অনুরাগ”-এর প্রতীকীটা প্রাণ থেকে হটানো ছন্দর, কারণ “কৃষ্ণ” নামটি কেমন যেন চুষকের মতো ধ্যানে ঠাঁই নিয়ে আছে। অথচ যথার্থ “কৃষ্ণ” দর্শনে কদাপি কখনো যাইনি। কবে এক “ভোলার মন” প্রেমিকের ডাকে, কথাটা আমার প্রাণে গছে গিয়েছে, আজ তক তার “আওটো” ভাবটা কাটিয়ে উঠতে পারলাম না।

তবে, এবার কাটাতে চাই। “কৃষ্ণ অনুরাগী বাগানে” যাবারও আগে, সেই পঞ্চাশ দশকের গোড়ায়, জীবনের একটা পর্বে এসে দাঁড়িয়ে-ছিলাম। তখন “কৃষ্ণ অনুরাগীর বাগান” থেকেও, কাঁধে কাঁধা খুলি নিয়ে “ভারত”কে এক বাগানের নানা ফুলে ফলে দেখবো বলে বেরিয়ে পড়েছিলাম। “ভারত উদ্ধারের” সীমানায় দাঁড়িয়ে তখন একটা কথাই ধিকারে আর আবেগে মনে এসেছিল, “ভারত” না দেখেই উদ্ধার? দেখা যায় বা কেমন করে?

না, না, সে হাটের কেনা-বেচায় আছে বা মাঠের হালে বলদে আছে, কিংবা আছে সবাইকে নিয়ে ঘরকন্না, সেই দেখা না। চিন্তে ফাটল

ধরে না, ভেঙে ব্যাখ্যাও করতে পারি না, কিন্তু এটা বৃষ্টি, সব নিয়ে
থুয়েও তার আর একটা রূপ আছে। সেইখানেই যেন সে নিজের অজ্ঞান
আসল রূপ নিয়ে আপনার মতন করে আছে। সেখানে সে ঘর-সংসারের
কল্যাণের জন্ত ছুটে গিয়েও, সেই কথাটাই ভুলে যায়। কল্যাণের অজ্ঞ
এক ধ্যানে সে ভুবে যায়, নিজেও জানতে পারে না। সেখানে সে নিজের
কাছে অচেনা।

হ্যাঁ, জানি, সকলের কথায় সকলের সায় থাকে না। আমার কথায়
সকলের থাকবে, এমন আশা করি না। মানুষকে তো দু'রকম কথা,
মানুষ নিজেকে সকলের সঙ্গে কোনোদিন এক করে মিলিয়ে দেখতে
চায়নি। মানুষের কি এটা অহংকার। নাকি সে অসহায় ?

তা সে যাই হোক গিয়ে, আমি কোনো কুটকচালে নেই। আমি
কোনোদিন সাব্যস্ত করে দিতে পারবো না, কে কী নিয়ে অহংকারী।
কে কী নিয়ে অসহায়। তবে হ্যাঁ একটা কথা মাঝে মাঝে মনে হয়,
যার মনে যতো কুটকচালির গরলে উথালি পাথালি, সে যেন ততো
অহংকারী, ততোই অসহায়। আসলে সেকি বড় কষ্টের কথা ? জবাব
আমার জানা নেই। তবে, রে রে ক্ষ্যাপা হা হা হুখী, দপদপিয়ে চলেছে
এই সংসারের বৃক দাপিয়ে, অথচ "আমি নির্ভেট ভদ্রলোক গ" বললে
বড় কেতা, মুখে অমায়িক হাসি, এমনটি অনেক দেখেছি, দেখছি। কিন্তু
সে-কথা আমি বলতে বসিনি।

কচকচির কথায় ফেরা যাক। সেই "ভারত" দেখার কথায়।
"ভারত" তার যে-জনপদ থেকে আপন ঘর-সংসারের মঙ্গল শঙ্খ বাজাতে
বাজাতেও এক জায়গায় এসে, সে জগত-সংসারের আর এক আঙিনায়
এসে দাঁড়িয়ে, নিজের নিয়ে আসা রূপটাকেই চিনতে পারে না। সে
আঙিনাটা আবার কোথায় ?

কথা অনেক সময় বড় খিটকেল হয়ে ওঠে। জানবোই যদি, তবে
তো ব্যাখ্যা করেই দিতে পারি। তবে হ্যাঁ, আঙিনাটা ঘরকন্নার প্রত্যাহার
উঠানে না। অজ্ঞ এক উঠানে। যেখানে সে ঘর করার অনেক বেশ
ছেড়ে একমাত্র বেশে দাঁড়িয়ে। সেখানে তার ধরাচূড়া বসন-ভূষণ কিছু

নেই। হয়তো সেখানে সে নগ্ন, কিন্তু দীন না, কেঁদে হাত বাড়িয়ে
তোমার দয়া চায় না। তবু চোখে তার জল দেখতে পেতে পারো।
তোমার বচনবিশ্বাসে ফুলাবে না, এমন মোহন হাসিও দেখতে পাবে।
আমার হিসাব জানা নেই, এমন উঠোন জগতের আর কোথায় কোথায়
আছে।

ভ্রুকুটি করছেন ? করছো ? বলেছি তো, তর্কে নেই। যুক্তি দিয়ে
কতো গৃহ-গৃহাস্তরকে বাঁধবে ? তবে হ্যাঁ, কচকচির গর্বটা সেরে নিতে
গিয়ে এটুকু আগে বলে নিই, তেমন কোনো আঙিনায় যাবো না।
অমৃত খুঁজতে গিয়ে নাম একটি নিয়ে ফিরেছি। জীবনে বুঝেছি, ওইটি
সার। কিন্তু পষ্টাপষ্ট কথা, গোড়া বেঁধেও না। শেষ যাত্রার
বিন্দুবিসর্গও না। কেন ? না, আমার মন ভালো না। আমি এবার
যেখানে যেমন খুশি যাবো, যেমন খুশি বেড়াবো। আমার ঢাক-ঢোল
পেটাবার কিছু নেই।

সেই কবে প্রয়াগে যাত্রা করলাম, তারপরে আর আমার একটু নীল
আকাশের খোঁজে যেতে, ঘাটের ধারে, হাটের মীমানায়। পুকুর পাড়ের
পৈঠায় কেউ বসতে দিলে না। দিলে না বললে পরের দোষ গাওয়া
হয়, নিজের মনকেই পাচনতাড়ি দিয়ে হৈ-হৈ করে চালিয়ে নিয়ে যেতে
পারিনি। কবেই—সেই প্রথম থেকেই বলে দিয়েছি, আমি না
কৌপীন আঁটা ঘর ছাড়া না বিবাগী বৈরাগী। এমনকি, আজ আরও ছুটো
কথা হলফনামা দিতে হবে আমাকে। দেবার আগে জোড়া হস্তে
নিবেদন, আমার অযোগ্যতাকে নিয়ে কেউ যেন না ফুট কাটেন। আমি
কারোকে নিয়ে যেতে পারবো না পর্বতের সেই আশ্চর্য মহিমময়
লীলাখচিত প্রাঙ্গণে। পারবো না অজানা দেশের দেবদেউলের সন্ধান
দিতে। আর ডাইরি বা গাইড, ভ্রমণ-বিলাসীদের হাতে তেমন
মনমনোহর কিছু তুলে দিতেও পারবো না। কারণ ভূগোল ইতিহাস
পুরাতত্ত্বের জ্ঞান দেবার দম আমার নেই।

তবে কী দিতে পারবো ?

কিছু না। কেবল আপন চলন বলন বিবরণ। তারপরে তোমার

মনে তুমি, আমার মনে আমি। দেনা-পাওয়ারা নিয়ে কোনো হিসাব-নিকাশ পেতে বসতে পারবো না। ওটা যার যার, তার তার। দেনেওয়ালার আর লেনেওয়ালার। দেনেওয়ালার দিয়ে কি মন ভরে? লেনেওয়ালার নিয়ে কি মন ভরে? লেনেওয়ালার নিয়ে কি সাধ মেটে? যততো ব্যাজের কথা। এর আবার কোনো জবাব আছে নাকি? বলাই তো হয়েছে, ওটা যার যার, তার তার। এসব বেশি ভেঙে বলা চলে না।

অতএব, তাই সই। কিন্তু কোথায়? কতো দূরে? এ-কথা বললেই তো সেই আবার ভ্রমণ-বৃত্তান্তের কথা আসে। ও-সবের কোনো ঠিক-ঠিকানা নেই। কেননা, আগেই বলা হয়ে গিয়েছে, এবার গোড়া বেঁধেও না, শেষ যাত্রার বিন্দুবিসর্গও নেই। তবে যাত্রাটা কেমন? এলেবেলে। যেমন খুশি। একে কি মনবিলাসী বলা যায়? অথবা না নয়, আমার সেই আগের কথাটাই থাকলো, ভাবের ভাবী। কিন্তু ভাবেতে কি সংসারে হাঁড়ি চড়ে? কথায় কি চিঁড়ে ভেজে? সেই কথাটাও মনে রাখতে হবে। মনবিলাসী ভাবের ভাবী, যা-ই বলা যাক, জীবের কর্তব্য থেকে মুক্তি নিয়ে আসিনি। বন্ধনমুক্ত বটে, আসলে বৃহৎ বন্ধনেই নাড়ি জোড়া আছে। কেননা, একটা কথা বুঝছি। মুক্তি এই সংসার থেকে। আবার মুক্তি এই সংসারেই? মুক্তি মানুষের কাছ থেকে, আবার মানুষের সঙ্গেই। যা ছাড়িয়ে গিয়েছি, তা ছাড়িয়ে যাইনি।

কথার একটা নিজের দোড় আছে। একবার ছুটলে রক্ষা নেই। তাকে না থামালে, মোদা কথায় আসা যায় না। কচকচি অনেক হয়েছে, এবার শুরু করা যাক।



যে-থাকার নাম বাঁশবেড়ে, তারই পোশাকি নাম বংশবাটি। জায়গার নাম করলেই লোকে আগে রাজবাড়ি আর মন্দিরের কথা ভাবে। আমি আসলে, বাঁশবেড়ের চটকল পেরিয়ে সেই ত্রিবেণীর হাতায়। যেখান থেকে বাস আর এগোয় না, পেছোয়। হালের হালচাল চেহারার পথবাট কেমন দেখতে হয়েছে, জানি না। অনেক দিনের সাধ, একদিন চলে যাবো চুঁচুড়ার ভিতর দিয়ে, গঙ্গার ধার ঘেঁষে, শাগঞ্জের সীমানা পেরিয়ে। গম্বু্য কোথায়? না, ত্রিবেণীর ঘাট।

এ আবার কেমন ভ্রমণ? রাত-ভিথিরির মতন, মন-ভিথিরির পথ চলা। কেননা, অনেকদিন যাবত মনটা ওই পথটাকে ভিড় করছে। সেই যেখানে, চটকলের শেষে, চারপাশে খোলা জায়গায় কনডাকটর যাত্রীদের হ্যাট হ্যাট করে নামিয়ে দেয়, সেই ত্রিবেণীর হাতায়; আসলে সেটা ত্রিবেণী না। পথ কিছু ভাঙতে হবে। মাঠের পথ। ডানপাশে চেউতোলা টিনের বড় বড় শেড, গঙ্গাকে আড়াল করে মাথা উঁচু করে দাঁড়িয়ে আছে। সারি সারি অনেক শেড। রাস্তা থেকেই শোনা যায়, শেডের মধ্যে বয়সের হিসাব হাড়া যতক বামাস্বরের হাঁকডাক গুলতানি। কান পেতে শুনলে বচনের সবটাই পুবদেশী। খোলা মাঠের ওপর দিয়ে, গৌঁ গৌঁ করে খালি মোটরবাসটা ঘুরে আসতে, বড় মুখ করে কনডাকটরকে জিজ্ঞেস করলাম, 'এগুলো কিসের শেড, কারা থাকে?'

কনডাকটরের জবাব শুনে কান দুটো বাঁধিয়ে উঠলো। লিখে বলি, কলমের এমন অসহবত বুকের পাটা নেই। অথচ কনডাকটর সহিসের সঙ্গে ডাইভার হা-হা হেসে, উঁপু ফুকতে ফুকতে বাস চালিয়ে নিয়ে চলে গেল। যেন কী মজাই করে গেল। আজকের কথা না,

অনেক দিনের। তা পঞ্চাশ দশকের মাঝামাঝি সময়ের তো বটেই।
হালফিল যেমন মোটরবাসের বালরি-ট্রাকের কানের পর্দা-ফাঁটানো
যন্ত্রের ভেঁগু বাজে, তখনও তেমনটা বাজারে আমদানি হয়নি। অত্যায়াটা
আমারই হয়েছে। আমি তো আর একটা যাত্রী নাহিনি। চটকল
পেরিয়ে, শেষ স্টপেজে আরও ছ-চার যাত্রী নেমেছিল। তাদের জিজ্ঞাস
করলেই পারতাম। কৌতুহল যখন মনে জেগেই ছিল।

তবে অত্যায়াই বা বলবো কি। কারখানা আর কুটির সৌমানা
ছাড়িয়ে, চারপাশে ছড়ানো পোড়ো জমি মাঠ কাঁচা-পাকা ভাঙা রাস্তা,
ছ-চার যাত্রীরা যে কোথায় কেমনে এদিকে-ওদিকে চলে গেল, দিশা
পেলাম না। একদল মোটরবাস হাঁকিয়ে নিয়ে যাবার আগে, কান-
কাঁঝানো খেউড় গুনিয়ে হাসতে হাসতে চলে গেল। তারপরেই তো
আবার গুনি খিলখিল হাসি। ডানদিকে তাকিয়ে দেখি, টিনের শেডের
গায়ে যেন কেউ খামচা দিয়ে স্ফুড় খুলে দিয়েছে। সেই স্ফুড়ের কাঁকে
ছুটি ন'বউয়ের মুখ। মানে নতুন নতুন লাগলো, বোধহয় বয়সের জঙ্ঘ,
আর হাসির চালে। সিঁথির সিঁছর যতো চওড়া না, কপালের ফাঁটা
তার থেকে মস্ত। যেন অশোক গাছের ওপারে এইমাত্র সুর্যোদয়
হলো।

না, আমার দিকে তাদের নজর নেই। হসিতে আওয়াজ থাকলেও,
ছজনের মুখ প্রায় মুখে মুখে ঠেকানো। কথাবার্তা চুপিচুপি। তাদের
রূপ দেখবার সময় আমার ছিল না। আটপোরে শাড়ির ঘোমটায় কেউ
অঙ্গুরী কিম্বারী না হোক, চোখের কালা তারায় বিস্তর রঙ্গরসের
ঝিলিক। তাতেই তারা রূপসী। ওরকম মালগুদামের মতন টিনের
শেডের ভিতরে কেন ওরা। করছেই বা কী ?

পথ চলতে পথের সব বৃত্তান্ত যদি জানতে হয়, তবে আর গন্তব্যে
পৌঁছবার সময়ের ঠিকঠিকানা রাখা চলে না। কিন্তু আজ পর্যন্ত
শুনতে পেলাম না, সময়কে কেউ নিজের হাতে করে নিয়ে এসেছে।
সময় সকলের রাজা হয়ে জগৎটাকেই চাপিয়ে নিয়ে চলেছে নিজের
রথে। আমার দাঁড়াবার সময় নেই। বাঁ দিকের দূরের গাছপালা

মাথার ওপরে, রবিখন্ডের খতুর সূর্যের আকার যতো বড় হয়েছে, রাঙে
তার থেকে বেশি রাঙা। ছায়া এখন পুবে শায়ন নিচ্ছে। আমি হাঁটা
ধরলাম।

এমনটা হবার কথা ছিল না। বেরিয়েছিলাম তো গতকাল।
তখন মনের কথা, যাই একবার ত্রিবেণী ঘুরে আসি। কিন্তু অনেকদিন
ধরেই, ওপারে হালিশহর আর এপারে বাঁশবেড়ের গঙ্গার মাঝখানের
সবুজ লম্বা চরটা হাতছানি দিয়ে ডাকাডাকি করেছে। চোখে দেখেছি,
কানও শুনেছি। ওপার থেকে, এপার থেকে, ছপার থেকেই।
কতোদিনই তো ছপারে দাঁড়িয়ে দেখেছি, ওপারের লোক নৌকায় ভেসে
চরে। চর পেরিয়ে আবার নৌকায় ভেসে ক্যাণ্ট শাগঞ্জ আর
বাঁশবেড়তে। আবার এপার থেকে ওপারে, চরের ওপর বিহার করে,
হালিশহরে।

ব্যাপার তো এমন কিছু না, যে বৌচকাবৃচ্চি বাঁধতে হবে, ঝোলা-
ঝুলি নিতে হবে। পাড়ি দিতে হবে দূরের পথে। ভেসে গেলেই
তো হয়।

আহ, ওইখানেই তো যতো মস্তরতস্তর। যোজন পথ পাড়ি দিয়ে
এলে, ঘরের পিছনের দরজা খুলে তাকাবার একদিন সময় হলো না।
যেন ওপথে কেউ মন্ত্র পাড়ে রেখে দিয়েছে। খবরদার, যেও না।

গতকাল ত্রিবেণী যাবার পথেই সব ভালগোল পাকিয়ে গেল।
শাগঞ্জের ভিতরের রাস্তা দিয়ে বাসে করে, সকালের ঝলকানো রোদ
গায়ে নিয়ে বেরিয়েছিলাম। বাসের জানালার ধার ঘেঁষে বসেছিলাম,
ডানদিকে। চলেছিলাম আপন মনে, গঙ্গা দেখতে দেখতে। ওপারে
হাজিনগরের কলকারখানার চিমনি ইমারত কুঠি। আর এপারের সরু
রাস্তায়, প্রায় এ-দেওয়ালে ও-দেওয়ালে ধাক্কা মারতে মারতে বাস ছুটে
চলেছে। হঠাৎ গঙ্গার মাঝখানে সেই সবুজ চর।

সবুজ চর। ছ-একটা মানুষের অস্পষ্ট মূর্তি। বেশ ফারাকে
ফারাকে এক-আধটা চালাঘর। ঘরই তো ? সন্দেহ হয়। এ-পাশে
জল, ও-পাশে জল, মধ্যখানে চর। তীর থেকে যেন ঠিক কিছু বোঝা

যায় না। খর না হয়ে, খড়ের গাদা হলেও অবাধ হবার কিছু নেই।
শিখ তাতেই বা আমার কী? আমি তো ঘরে গিয়ে ঠাই নেবো না।
 ঠা করে বাসের ঘটি বেছে উঠলো। কারা যেন নামলো। আমিও
 জায়গা ছেড়ে বাসের দরজার দিকে। সেইবেলায় কনডাকটরের নজর
 কর্তব্য বোধশোধ ভালোই, 'ও মশাই, আপনি নামছেন কোথায়?
 ত্রিবেণীর স্টপেজ চটকল ছাড়িয়ে, এখনও বাঁশবেড়েই আসেনি। যান,
 কায়গায় বসুনগে?'

শাস্ত্রে অনেক কথা বলেছে বটে। গৃহের চৌকঠের ওপার থেকে
 চোখ ফিরিয়ে রাখিস বউ। অমঙ্গল মনোহর বেশ ধরে হাতছানি দিয়ে
 ডেকে নিয়ে যাবে। আঁচল উড়িয়ে চলে যাবি, দরজায় কাঁটা পড়বে।
 এ-জীবনে আর ফেরা হবে না। সবুজ চরের অনেক দিনের হাতছানিটা
 আমার প্রতি সেরকম কী না, জানা ছিল না। গতকাল আর থাকতে
 পারিনি। কনডাকটরের কথার কোনো জবাব না দিয়ে, নেমে
 পড়েছিলাম। বেশি পরসা দিয়ে আরও দূরের পথের টিকেট কেটে,
 মাঝপথে নেমে পড়ে যে-যাত্রী, সে 'শালা' যে 'বুকু' বাসের কনডাকটর
 আর সহিস ছাড়া সে-কথা কে বুঝবে? মরুক গে! নামছে,
 নামতে দাও।

হ্যাঁ, দেখাই যাক না। এতদিনের এতো হাতছানি, সবুজ একখানি
 চরের এত ফুলসানি কিসের? দেখে আসতে দোষ কী? চরকে ঘিরে,
 স্রোতের জলের বাঁকের রেখা এক-একখানে এক-একরকম। সে-সব
 বুঝবে মাঝি। ঘাট কোথায়? একবার ভেসে যাবো, চরের বুক
 একবার নামবো। মন চাইলে পায়ে হেঁটে একটু ঘুরে দেখবো, আবার
 ভীরে ফিরে এসে, ত্রিবেণী গেলেই হবে। কেউ তো মাথার দিবা দিয়ে
 দেয়নি, ত্রিবেণীর ঘাটে যেতে হলে, হু-দণ্ড যাত্রাভঙ্গ করা চলবে না।

আশেপাশে খানকয়েক বাড়ি। কয়েক পা এগিয়ে, গঙ্গার উঁচু
 পাড়ের ওপরে একপাশে একটি চালাঘর। তার পাশে রাজ্যের লোহা-
 আর টিনের ভাঙাচোরা টুকরোর স্তুপ। আর একপাশে ছেঁড়া পচা
 চটের খলি ডাঁই করা। চালাঘরের দরজার সামনে খাটিকায় ওপর

খালি গায়ে বসে একজন বাঁ হাতের চেটোতে ডান হাতের বুড়া আঙুল
 ঘবছে। বলে ব্যাখ্যা করে বুঝিয়ে দিতে হয় না, নেশার মৌতাত তৈরি
 হচ্ছে। অর্থাৎ খৈনি। মাঝবয়সী লোকটি, গায়েগতরে শক্তপোক্ত,
 ছাই রঙের একজোড়া গৌক। মাথায় কদমছাঁটের থেকেও যদি কিছু
 কম হয়, সেইরকম চুল। একেবারে কামিয়ে নিলেই বা দোষ কী
 ছিল? জল আটকাবার তো উপায় নেই। উনিশ আর বিশ।
 তবে হ্যাঁ, গৌকের রঙ ছাই হোক, মাথায় মোটা টিকির গোছটি বেশ
 কালো। পরনের খাটো খুঁতখানি হাঁটুর ওপরে তোলা।

আমার দিকে লোকটি ফিরে তাকালো না, ভাঙাচোরা লোহা-টিনের
 টুকরোর স্তুপের দিকে যেন বড় স্নেহের চোখে তাকিয়ে দেখছে, আর
 খৈনি উলছে। আমার নজর তার দিকে পড়ার কারণ, আওয়াজ দেয়
 কী না। কারণ, আমি দেখছি, মাথায় চটের একটা বস্তা নিয়ে এক
 বুড়ি ঘরের পাশ দিয়ে গঙ্গার ধারের দিকে এগিয়ে চলেছে। আগেই
 আমার চোখে পড়েছে, ছই ছাড়া কিছু নেই, এমনকি পাটাতনের
 বালাইও নেই, নীচে জলের ধারে ছোট একটা নৌকা পাড়ে খুঁটিতে
 বাঁধা রয়েছে। নৌকার সামনের গলুইটা ভাসছে উত্তরদিকে। তার
 মানে নদীতে জোয়ার।

আমার উদ্দেশ্য লক্ষ্য আর অল্পমান, সব মিলেমিশে একটাই।
 মনের জিজ্ঞাসাও। ওরকম একটা আনকা ঘাটে নৌকাটা কী কাজে
 লাগে? বুড়িটাই বা কোনোরকমে না তাকিয়ে সোজা ঘাট আঘাট।
 বাই বলা যাক, যদি কেই নেমে যাচ্ছে কেন? বুড়িটা এলোই বা কোথা?
 থেকে, খেয়াল করিনি। প্রথমে লক্ষ্য পাড়েছিল নৌকাটার দিকেই।
 তারপরে বুড়ির দিকে। কিন্তু লোহা-লঙ্কর আর ছেঁড়া-পচা চটের
 ডাঁইয়ের এলাকার ধারে বাঁধা নৌকাটা দেখে একটাই অল্পমান করা
 যায়। নদীর মাঝখানে চরের সঙ্গে কেমন যেন একটা যোগাযোগ
 আছে। আজ পর্বন্ত, গঙ্গার এপারে-ওপারে নাবার পথে, সবুজ চরে
 যাবার জন্ম কোনো নিয়মিত খেয়া পারাপারের নৌকা দেখিনি। আর
 খেয়া পারাপার করতে হলে যেমন নির্দিষ্ট একটা ঘাট থাকে, তাও

কখনো দেখিনি। কথাটা নিয়ে অনেকদিন ভেবেছি। কাদের নৌকা, কোথায় থাকে, কারা কখন যাত্রায়ত করে? অথচ পারাপার করতে দেখেছি। তবে ঘাটের কোনো ঠেক দেখিনি।

সবুজ চরটার দিকে তাকালেই বোঝা যায়, গঙ্গার মাঝখানে নিরিবিলিতে, ছ-পাশের শ্রোতে ভেসে সে বেশ সুখেই আছে। মজা আর বর্ষা ঋতুতে সে তার শরীরের কাঠামো বদলায়। কখনো এক-দিকে বাড়ে তো, আর একদিকে কমে। কখনো বুক উঁচু, তো পায়ে দিকটা বাঁক নিয়ে চলে যায় উত্তরে, সেই ত্রিবেণীর দিকে, যেখানে দক্ষিণগামিনী গঙ্গা এমনিতেই বাঁক নিয়েছে, আর হালিশহর বাঁশবেড়ের কাছে এপারে-ওপারে অনেকখানি চণ্ডায় শরীর ছড়িয়েছে। এই কি নদীর নিয়ম নাকি কে জানে, বাঁকের মুখে সে যেন ছ-কূলে দূরে ছাড়াছাড়ি। ক্ষীণ কটির পরেই হা-হা বহর বুক। কখনো নদী চরের মাঝখানের সমতলকে গভীর মতন বিশাল করে তোলে। দক্ষিণে মাথাটা শন ছড়ি চুলের মতন, বড় বড় মাটির ফাটলে একেবেঁকে জলে ডুবেছে। আবার তো কোনো কোনো শরতের মাঝামাঝি সময়ে দেখেছি, নদীর মাঝখানে যেন একটি সবুজ রেখা জেগে আছে। নজর করে না দেখলে মনে হয়, একটা লম্বা সবুজ ফালি ডুবু ডুবু হয়ে ভেসে যাচ্ছে। দূরের স্থল থেকে দেখা। তার একরকম রূপ। আসলে কোনো কোনো বছরে, ভাঙ্গ-আস্থিনের মধ্য ঋতুতে, গঙ্গার তখন বাড়াবাড়ি অবস্থা। সে তখন অলক্ষ্যে চরটিকে তার নিজের মতন ভেঙে গড়তে থাকে।

তা থাক, যে-কথা বলছিলাম, সবুজ চরটি গঙ্গার মাঝখানের নিরিবিলিতে, তার ভাঙা-গড়া যেমনই হোক, সে যেন বেশ নিশ্চিন্তে আছে। তার ছ-পাশের দুই মূলের স্থলে, এতো যে কলকারখানা, ইটের ভাটি, বিশাল জনপদ, দিনে-রাত্রে ধাবমান যানবাহন, বিজলি-বাত্তির রোশনাই, কলকুটির রাজকীয় প্রাসাদ আর তার জীবন নিয়ে অনিত্যের কোলাহল, কোনো কিছুই তার নজর নেই। অথচ দেখলে এমন মনে হয় না, সে অহঙ্কারে গা ভাসিয়ে আছে, বা গৌঁ ধরে

আছে, দুই তীরের কোনোদিকেই সে তাকাবে না, কান পেতে কিছু শুনবে না। আসলে সে নিজের রঙ্গই আছে। যাকে বলে, আপনাতে আপনি মজেছে। মনে হয়, কাছই। প্রকৃতপক্ষে চেহারার চরিত্রে আর স্থান মাহাত্ম্যে আছে সে অনেক দূরে।

দুই তীরের সময় কোথায়, দরিয়ার মাঝখানে এক অতি ক্ষুদ্র ভূখণ্ডের দিকে তাকিয়ে দেখবে। তীরের অনেক দায়দায়িত্ব ব্যস্ততা। তবু নদীর বুক থেকে, হাতছানি দেয় কেমন করে? কেবল কি হাতছানি? টোঁটের কোণে আঙুল রেখে অপলক চোখে তাকিয়ে থাকা এক অপার রহস্যের ছোঁয়াও যেন রয়েছে সেই হাতছানিতে। এখন কথা উঠতে পারে, হাতছানিটা দেখা যায় কেমন করে।

আজ পর্যন্ত এ কথাটার জবাব কোনো "ঠাকুর" মশাইও দিতে পেরেছেন কী না জানি না। শুনিও নি। তবে আমার মতো সোজা কথা, জাতপাত বলে কিছু নেই। হাতছানিটা আছে, বলতে গেলে সর্বব্যাপী, সকলের প্রতি। কারোর চোখে পড়ে, কারোর পড়ে না। যায় পড়ে, সে পা না বাড়িয়ে পারে না। যার পড়ে না, সে অস্তপথে পা বাড়িয়ে আছে। এই রকমফের নিয়ে আমরা রকমারি।

লোহা আর টিনের টুকরো জুপ আর ছেঁড়া-পচা চটের ডাঁই দেখে, জায়গাটাকে অনেকটা ইট চূণ শুরকির গোলার মতন দেখাচ্ছিল। চালাঘরের দরজার সামনে, খালি গা, হাতের চেটেয়া থৈনির্দানকারী, কালো তৈলাক্ত মোটা গোছার টিকিধারীর আওলাজ নিয়ে, ভয়টা সেই কারণেই ছিল। জায়গাটা নিশ্চয়ই লোক চলাচলের সদর রাস্তা না। ঘাটে একটা নৌকা জোয়ারের টানে ভাসলেই সেটা খোয়াঘাট হয়ে যায় না। লেখা না থাকলেও প্রবেশ নিষেধ-এর সীমানা চেনা যায় পাঁচিল ঘেরা না থাকলেও, গৃহস্থের খোলা সীমানার এলাকায় নিষেধের নোটিশ বুলিয়ে রাখে না। চলতে গিয়ে পা আপনা থেকেই এড়িয়ে চলে। থৈনির্দানকারী হঠাৎ মুখ তুলে আওয়াজ দিলেই, বেকায়দায় পড়ে বাবার ভয় ছিল। কিন্তু আগেই বলেছি, আমার দিকে সে ফিরেও তাকালো না। গভীর মনোযোগ আর মমতায় ভাঙা-চোরা পুরনো লোহা-টিনের

ছূপের দিকে এমনভাবে তাকিয়ে দেখছে, কোনোদিকেই তাকাবার অবকাশ নেই।

ছূতের সামনে দিয়ে রামনাম জপের মতন আমি চটের বস্তা মাথায় বুড়ির পিছনে পিছনে একেবারে উঁচু পাড়ের ধারে চলে গেলাম। চালার দরজা তখন আমার পিছনে। দেখলাম, বুড়ির নজর কোনোদিকে নেই। শক্ত পাড়ের চানুতে সাবধানে পা ফেলে নেমে দাঁড়ালো গিয়ে একেবারে নৌকাটার কাছে। অনায়াসেই মাথার বোঝাটা নামিয়ে খুলি ধোকড়া কাপড়ের ঘোমটা নামিয়ে, আগে খস খস করে, জট বাঁধা রুকু পাটের ফেশোর মতন চুল ছ-হাতে চুলকে নিল। আমি তার পিছনটা দেখতে পেলেও কাপড় পরার ধরন দেখেই অবাঙালী পরিচয়টা চিনে নিতে অসুবিধা হয়নি। ওপরের চালাখরের দরজার সামনের লোকটিও যে অবাঙালী, তাও এক নজরেই চিনে নিয়েছিলাম। তার মধ্যে কোনো দূরদৃষ্টির পরিচয় নেই, আমার মতন যে-কোনো বঙ্গ-সন্তানই তার সীমান্তপ্রদেশের লোককে চিনতে পারে। বিশেষ, কলকাতা আর তার পঁচিশ-পঞ্চাশ মাইলের উত্তর-দক্ষিণে যারা বিচরণ করে। বইটি www.boiRboi.blogspot.com থেকে ডাউনলোডকৃত

আমার লক্ষ্য বুড়ির দিকে। মাথা চুলকানোর বহর দেখলেই বোঝা যায়, কেবল জটের ময়লার দোষ না। চুলের গোড়ায় গোড়ায় উকুনের নির্ধাৎ উৎপাত। নিশ্চয় অনেকক্ষণ থেকেই উৎপাত সহ্য করতে হয়েছে। মাথার বোঝা বাদ সেধেছিল। আমার নজর তখন সবুজ চরে নেই, নদীতে নেই, একমাত্র কাজ বুড়ির মাথা চুলকানো দেখা কারণ, বুড়ির পরবর্তী কর্মসূচীর ওপরেই আমার সব কিছু নির্ভর করছে। যদিও মন বলছে বুড়ি বোঝাটা পাড়ে রেখে দাঁড়িয়ে থাকবার জ্ঞান নামেনি। তার লক্ষ্য নিশ্চয়ই নৌকা।

আমার এই ভাবনার ফাঁকেই বুড়ি তার ধুলি-ধোকড়া কাপড়ের ঘোমটা তুলে কয়েক দফা ঝাপটা মারলো মাথায়। সকালের রোদে স্পষ্ট ধূলা উড়তে দেখলাম। তারপরে গায়ের চললে জামাটার ডান-দিক দিয়ে ঝাঁচল টেনে মাথায় আবার ঘোমটা টেনে দিল। রূপেই বা

কী করে, বয়সেই বা কী যায় আসে। অঙ্গের বজ্র ? হয়তো শাড়ি খুঁটি খান বলে বোঝার উপায় নেই। ধূলা বুলা হ্রাকড়া, তালি তাল্পি সেলাই বিস্তর থাকতে পারে। কিন্তু হাটে হাটে মাল মাথায় করে ঘুরে বেড়ালেই যে সহবত থাকবে না, এমন কথা কে বলেছে ? ঘোমটা হলো সহবত। তারপর ?

তারপর বুড়ি যেমন অনায়াসে মাথার চটের বস্তাটা নামিয়েছিল তেমনি অনায়াসেই ছ-হাতে তুলে শ্রায় ছুঁড়েই ফেললো নৌকার খোলে। নৌকার খোলের মাঝখানে অল্পস্বল্প জল, মাঝে দু-এক ঘটি হতে পারে। কিন্তু বুড়ির হাতের নিশানা অব্যর্থ। বস্তাটি জল বাঁচিয়ে গলুইয়ের ধার ঘেঁষে পড়লো। এবার কি বুড়ি নৌকায় চাপবে নাকি ? নৌকো বাঁধা খুঁটিটা যে লগি, তা বোঝা যায়। একটি বৈঠাও গলুইয়ের পাশেই খোলের ভিতর দিকে কাত করে রাখা। বুড়ি কি নিজেই নৌকা বাইবে নাকি ?

অবাক মানবার কিছু নেই। পুবদেশে আমার ঘর। অমন অনেকে বুদ্ধা পাটমী দেখেছি।

আমি নীচের দিকে পা বাড়াবার উচ্চাঙ্গ করে থমকে গেলাম। বুড়ি মুখ ঘুরিয়ে ডানদিকে তাকিয়ে পুরো দেহাতী ভাবায় বা বলে উঠলো, তার মানে হলো, “কী হে মরদ, গা ঝাড়া দেবে না কী ?”

থমকানোর থেকে চমকে গেলাম বেশি। পা বাড়াতে শক্ত ডাঙাতেই হড়কে পড়তে হতো। নৌকা আর বুড়ি ছাড়া সবই আমার অলক্ষ্যে ছিল। ডান দিকে তাকিয়ে দেখি, জোয়ারের জল ছুঁই ছুঁই, পাড়ের ওপর এক গাছ। গাছের গোড়া শান বাঁধানো না বটে, তবে ইট দিয়ে সাজানো। অনেকটা বাঁধানোর মতনই। গায়ে গভরে শক্তপোক্ত হলে ওই সাজানো ইটের পাঁজার ওপরেই দিবিব শোয়া-বসা-যায়। আধশোয়া অবস্থায় পা ছড়িয়ে, কাত হয়ে, হাতের ওপর গাল রেখে প্রকৃতই এক মর্দ বিড়ি টানছিল। কিন্তু সে না দেখছিল আমার দিকে, না বুড়ির দিকে। চরের দিকে মুখ করে আপন মনে বিড়ি টেনেই চলেছে।

আমি বুড়ির দিকে মুখ ফিরিয়ে তাকালাম। দেখলাম, ভুরু কঁচকে বুড়ি আমাকেই দেখছে। দৃষ্টিবিনিময় হলো, কিন্তু শুভদৃষ্টি কী না তা বুঝতে পারলাম না। সে আমার দিক থেকে মুখ ফিরিয়ে গাছতলার মরদের দিকে এগিয়ে চললো। তবে বুড়ি বুড়ি করে যতোটা বুড়ি ভেবেছিলাম, ততোটা বুড়ি সে না। বয়সের লেখাজোখায় যতোটা, লালরেখায় ঠাঁকা মুখ ভেবেছিলাম, গোটা মুখখানির চামড়া সেরকম নয়। পাটের কেঁসোর মতন চুল বটে, সেটা তেলজলের অভাবে হতে পারে। রোদে পোড়া মুখের চামড়ায় কিছু ভাঙাচোরা ভাঁজের দাগ। আমার দিকে তাকাবার সময় আপনা থেকেই তার সামনের পাটির দাঁত দেখতে পেয়েছি। ঝলসানো ভুট্টার দানার মতন কালচে পোড়া পোড়া রঙের দাঁত। অবিশ্বাসিই হেসে দাঁত দেখারিনি, ওটা নিশ্চয় স্বভাবে বিকশিত। শরীরটি পুষ্ট না, তবে শক্ত আর খাড়া। ভুরু কঁচকে তাকানোর মধ্যে বিরক্তি না মেজাজ খারাপের অভিব্যক্তি ঠিক বুঝতে পারলাম না। কিংবা হতে পারে, খুঁতি পাঞ্জাবী পরা, চোখে কালো কাঁচের চশমা পরা বাঙালীটির দিকে তাকিয়ে তাকিয়ে নেহাতই একটু কৌতূহলের জরুটি মাত্র। আর কিছু না। না হলে অমন মুখ ফিরিয়ে উদাস নির্বিকারভাবে চলে যাবারই বা কারণ কী? এখন পর্যন্ত তো আমার মনের গতিবিধি তার জানবার কথা না।

অতএব, আমাকে আমার জায়গাতেই আবার দাঁড়াতে হলো। বুড়ি গিয়ে দাঁড়ালো গাছতলায় ইঁটের পাঁজা সাজানো রকের ওপরে আধশোয়া মরদের সামনে। আমার না হয় এতক্ষণ মরদের ওপর নজর পড়েনি। সে কি একবারও আমাকে দেখেনি? সে কি মাইকেল এ্যাঞ্জেলোর নিমসঙ্গ পুরুষটির মতন চিরকাল ধরে দূরের দিকে ওইরকম করে তাকিয়ে বসে আছে? আর বিড়ি ফুঁকে যাচ্ছে?

অবিশ্বাসি মাইকেল এ্যাঞ্জেলোর পুরুষটির চেহারার সঙ্গে গাছতলার মরদের চেহারার অনেক ফারাক। পঁচিশ-তিরিশ আন্দাজ বয়সের মরদের গায়ের রঙ ভেজা গঙ্গা-মাটির মতন। লম্বা ছিলছিলে রোগা শরীরে এখন পেশিশূলো এলানো সাপের মতন দেখাচ্ছে। মাথার

ছোট চুল উসকোখুসকো এবং কালো গোঁফজোড়া লম্বায় চওড়ায় তার কিছুটা লম্বা মুখের তুলনায় চোখে পড়ার মতন বড়। তবে বুড়ির 'মরদ' সম্বোধনটি একশো একভাগ খাঁটি কারণ, হাঁটুর ওপর থেকে কোমর পর্যন্ত একখণ্ড বস্ত্র ব্যতিরেকে গায়ে কিছুই নেই। ধস্ত নেতার পৃথক দেশ-কী না জানি না, মাঘের শেষের আকাশের গোটাটাই নীল। আকাশের উত্তর-পশ্চিম থেকে মাঝে-মধ্যে দু-এক টুকরো শাদা মেঘের গড়িমসি চালের চলনে বর্ষণের কিছুমাত্র ইঙ্গিত নেই। অবিশ্বাসি উত্তরে হাওয়ার শ্রাবলা নেই, বরং রোদে কিছুক্ষণ দাঁড়ালে গায়ের জামা খুলে ফেলতে ইচ্ছা করে। অথচ চিরকাল শুনে এলাম মাঘের শীতে বাঘে কাঁপে। তা বলে, জোয়ারের জল ছুঁই ছুঁই গাছের ছায়ায় একবারে খালি গায়ে মরদের কি একটুও শীত করছে না? আর একটুকরো বস্ত্র তার মাথার কাছে এলোমেলো ছড়ানো পড়ে আছে। কম করে একশো হাত দূর থেকেও দেখতে পাচ্ছি, তার পায়ের হাঁটুতেই কেবল নয়, গায়ের দু-এক জায়গায়ও গঙ্গার কাদামাটির গুঁকনে দাগ।

বুড়ি গাছতলায় সাজানো ইঁটের পাঁজার সামনে দাঁড়িয়ে, কোমরের কাপড়ের কাছ থেকে কী একটা বের করলো, স্পষ্ট দেখতে পেলাম না। মরদকে কিছু বললো। মরদ মুখ না ফিরিয়েই বিড়িতে কয়েকটা টান দিয়ে ধোঁয়া ছেড়ে বাঁ হাত বাড়িয়ে সেটা এগিয়ে দিল বুড়ির দিকে। বুড়ি জ্বলন্ত বিড়িটি ডানহাতে নিয়ে বাঁ হাতে একটি বিড়ি নিজের ঠোঁটে চেপে ধরলে, আর জ্বলন্ত বিড়িটি ঠেকিয়ে, গাল চূপষে টেনে টেনে মুহূর্তেই ধোঁয়া ছাড়তে লাগলো। ধোঁয়া ছাড়তে ছাড়তেই আবার ডানহাতে কোমরের কাপড়ের কষিতে কিছু গুঁজলো। বোধহয় বিড়ির কোঁটো।

আমি নিজের অজান্তেই ঢোক গিললাম। কেবল চুল চুলকানি নয়, বুড়ির নেশাও পেয়েছিল। তার বিড়ি টান দেখে আমার নেশাও বেন রক্তে খুঁটিয়ে দিল। কিন্তু ধূমপানের আগে আমি বুড়ি আর মরদের ব্যাপারটা বোঝবার চেষ্টা করছি। দেখছি, বুড়ি মরদকে তার বিড়িটি ফিরিয়ে দিল। ব্যাপার কী? মরদের কি ঘাড়ে ব্যথা?

একবারও যে ফিরে তাকাই না। মুখ না ফিরিয়েই বিড়িটি নিল। ঘন ঘন করে কটা টান দিল। ধোঁয়া তেমন বেঙ্গলো না। বুড়ি আবার কিছু বললো। মরদের ঠোঁট নড়তে দেখলাম না। বিড়িটা নিশ্চয় নিভে গিয়েছিল। সেটা জলে ছুঁড়ে ফেলে দিয়ে সে উঠে বসলো। মাথার কাছে রাখা বস্ত্রখণ্ডটি টেনে হু-হাতে মেলে ধরতে বোঝা গেল, ওটি একটি চাদর বিশেষ। মরদের তা হলে শীত লাগছে, এবার গায়ে দেবে ?

না, আমার অনুমান আর মরদের কর্ম, পরস্পার অমিল। চাদরের মতন গেরিমাটি রঙের বস্ত্রটি একবার ঝাড়া দিয়ে কয়েকটা লম্বা ভাঁজ করে, মাথায় জড়িয়ে নিল। নেমে এলো ইঁটের পাঁজার ওপর থেকে। বুড়ি তার আপন মনে কিছু বলেই চলছে আর বিড়ি টানতে টানতে মরদের পিছন ধরে নৌকার দিকে এগিয়ে চললো। মরদ না তাকালেও আমার উপায় নেই। আমিও ঢালুতে পা বাড়িয়ে একেবারে নৌকার কাছে গিয়ে হাজির হলাম।

মরদ এবার বাড় বেঁকিয়ে আমার দিকে তাকালো। বুড়িও এক মুখ ধোঁয়া ছেড়ে ভুরু কুঁচকে তাকালো। দয়ার পাত্র আর কাকে বলে। চোখ থেকে কালো কাঁচের ঠুলিটা খুলে ছুঁনের দিকে তাকিয়ে হাসলাম। মরদের দিকে তাকিয়ে বাঙলাতেই জিজ্ঞেস করলাম, 'তোমরা কি চরে যাবে ভাই ?'

'হুঁ'। মরদ বেশ সহজভাবেই জবাব দিয়ে প্রায় পরিষ্কার বাঙলায় জিজ্ঞেস করলো, 'আপনে কি হালিশহর যাইবেন, না হাজিনগর ?'

বুড়ির কালচে দাঁত বেরিয়ে পড়েছে, রূপালে জলের ঢেউ লাগা পাড়ের ঝাঁক রেখা ফুটলো।

নাসারঞ্জে নির্গত ধোঁয়া উড়ে যাচ্ছে। মরদের মুখের ভাব, গলার স্বর, আশাতীত প্রশংসা। অন্তত এই মুহুর্তে আমার কাছে সেইরকমই মনে হলো। কারণ আমার আশঙ্কা ছিল কিছু জিজ্ঞাসা করা ভুল করেছি। মুখে হয়তো হাসি নেই, অচেনা লোককে অভ্যর্থনায়ও গদগদ নয়। তবে তার জিজ্ঞাসার মধ্যে অবাস্ততা নেই। আমার জিজ্ঞাসার একটাই মানে তার কাছে, তার নৌকার যাত্রী হওয়ার একটা কারণই

থাকতে পারে, আমি হালিশহর যাবো অথবা হাজিনগর। কাজের মাছব কাজের কথা ভেবেই আওয়াজ দেয়। আমিই বরং একটু অপ্রস্তুত হেসে বললাম, 'না, ভাবছিলাম, তোমাদের সঙ্গে একটু চরে যাবো। খেয়া নৌকো তো ওখানে যায় না। দেখে মনে হলো তোমরা চরেই যাবে, তাই—'। কথাটা শেষ না করে আমি মরদের মুখের দিকে ভালো করে লক্ষ্য করলাম।

মরদ যেন আরও সহজতর। 'এবার প্রায় অভ্যর্থনাই বলতে হবে, 'হুঁ' হুঁ, হামিনলোগ তো চরেই যাইবেন। আপনে উঠিয়ে পড়েন না।'

আহা, বেঁচে থাকুক এমন বাঙলা ভাষা। এখন তো সাদর অভ্যর্থনাই বলতে হয়। মরদ খুঁটিতে বাঁধা দড়িটা ধরে নৌকা টেনে নিয়ে এলো। গলুই একেবারে ডাঙার ওপরে। পাটাতন নেই, পড়ে যাবার ভয়। ছোট নৌকা। যে-দিকে একটু ভার পড়বে সেদিকেই কাত হবে, তারপরে গঙ্গানানটা অনায়াসেই ঘটে যেতে পারে। অতএব, গলার চাদর মুঠি পাকিয়ে ধরে সাবধানে গলুই বাঁচিয়ে প্রথম পা দিলাম খোলার ভিতরেই। আর এক-পা বাড়তে গিয়েই বুঝলাম, সমূহ বিপদ। মরদ তাড়াতাড়ি বলে উঠলো, 'বসিয়ে পড়েন, বসিয়ে বসিয়ে উঠেন।'

যথা সময়ে যথার্থ নির্দেশ। বাহাছুরি করে লাভ নেই। নীচ হয়ে নৌকার গলুই একহাতে চেপে ধরে আর এক-পা টেনে নিলাম। বসে পড়লাম খোলার মধ্যেই। ইতিমধ্যে বুড়ির মনে লেগে গিয়েছে খন্দ। তার হিন্দি বলি শোনাচ্ছে প্রায় বিছাপতির ব্রজবলির মতন। মরদকে সে জিজ্ঞেস করলো, 'বাবু কই বাওত হো ?'

মরদ বাঁশের লগি টেনে তুলতে তুলতে ক্রমত কিছু বললো, বুঝতে পারলাম না। পিছন ফিরে দেখলাম, বুড়ি তার বিড়িতে শেষ টান দিয়ে শেবাংশ ছুঁড়ে ফেলে নীচ হয়ে হু-হাত দিয়ে গলুই চেপে ধরলো। হামাগুড়ি দিয়ে নৌকার উঠলো। তাকে জায়গা ছেড়ে দেবার জন্ত আমাকে খানিকটা সরে যেতে হলো। মরদ লগি টেনে তুলে গলুইয়ের পাশ দিয়ে নৌকার খোলে ঢুকিয়ে দিল। বাঁ-হাতে নৌকার দড়ি ধরা। উত্তরে ঘোরানো নৌকার মুখ, গলুই ঠেলে সোঁজা পুবমুখী

করলো। তারপরে গলুইয়ে নীচ হয়ে নৌকা ঠেলে দিল জলে। নিজে বসে গেল গলুইয়ের ছ-খারে দু-পা ঝুলিয়ে। বাঁ-দিক থেকে হাতে তুলে নিল বৈঠা। তারপরেই খোয়া পা তুলে নিয়ে বৈঠার চাড়ে নৌকার মুখ ঝুরিয়ে দিল দক্ষিণ-পূব কোণে।

ব্যাপারটা ঘটলো যেন সহজেই। কিন্তু মরদের সারা শরীরে, পা, তলপেট, বুক আর দু-হাতের পেশিগুলো যে-রকম সাপের মতন কিলবিলিয়ে উঠলো, দেখে বোঝা গেল, সহজের মূলে শক্তি। কথায় বলে ভাঁটার টান, কিন্তু জোয়ারের উজানের টানও কম না। উত্তরের টানকে পিছনে রেখে দক্ষিণ-পূবের মুখে বৈঠা চালানো সহজ না। তবু জলের দিকে তাকিয়ে মনে হচ্ছে নৌকা যেন চলছে না। ঠায় এক জায়গায় দাঁড়িয়ে আছে। ডাঙার দিকে তাকালে বোঝা যায়, নৌকা চরের দিকে একটু একটু এগিয়ে চলেছে। তার মধ্যেই মরদ বললো, 'হাই বাবু, উধার গলুই-পরে বসিয়ে যান না, আরাম হবে।'

আরামের চিন্তাটা-মাথায় আসেনি, কিন্তু ছোট নৌকার ছোট খোলে উটকো হয়ে বসতে কষ্ট হচ্ছিল বিলক্ষণ। বৃড়িও তৎক্ষণাৎ শায় দিল, 'হঁ বাবু, যা যা।'

মানুষ চিনি? কোনোদিন বলবো না। পথেঘাটে চলতে ফিরতে যাদের দিকে তাকিয়ে দেখবার অবকাশ হয় না, এখন এই মাঝরিয়ায় কী বলে কৃতজ্ঞতা জানাবো বুঝতে পারছি না। বোঝাবার অবশি দরকার নেই। মানুষ না চিনলেও এখন বুঝতে পারছি, আমার কৃতজ্ঞতা প্রকাশের প্রত্যাশা এরা করে না। বৃড়ির বস্তা ডিঙিয়ে হামাগুড়ি দিয়ে বিপরীত গলুইয়ে পৌঁছে সত্যি সত্যি পা ছড়িয়ে বসা গেল। তারপরেই প্রথম যে-কথাটা মনে পড়লো, সেটা হলো পারানির দক্ষিণ। তখন খেয়া নৌকার কথা তুলেছিলাম, কিন্তু চরে পৌঁছবার দক্ষিণাটা কতো সেটা জিজ্ঞেস করিনি। দরকারও নেই। বরং গায়ের পশমী চাদরটা কোলের ওপর রেখে চোখে ঠুলি আঁটলাম। পকেট থেকে বের করলাম সিগারেটের প্যাকেট আর দেশলাই। প্যাকেট থেকে সিগারেট সের করে টোটে গুলুতে গিয়ে নজর পাড়ে গেল মরদের দিকে।

মরদের নজর দক্ষিণে। জিজ্ঞেস করলাম, 'চলবে নাকি ভাই?'

হ্যাঁ, এখন ভাই বেরাদার অনেক কিছুই মুখে ফুটছে। অত্ন সময় হলে, তুমি কার, কে তোমার। সংসারের নিয়ম ওটা। মরদ আমার দিকে তাকিয়ে বিক্ষারিত গৌঁকে মাথা ঝাঁকিয়ে হাসলো, বললো, 'হঁ হঁ চলবে বাবু, আগে চরে চলেন।'

তা বটে। বেশি আশ্ভোলা হয়ো না মন। বুঝে চলো। জোয়ারের শ্রোত ঠেলে, যে-মাঝি দু-হাতে বৈঠা টেনে চলেছে, তার পক্ষে এখন আর কিছুই চলে না। কিন্তু বৃড়ি আমার দিকে ফিরে তাকালো। দেখলাম, ভাঙাচোরা ভাঁজ মুখে, ঝলমানো ভুড়ীদানার দাঁতের হাসি। অনায়াসেই একটি হাত বাড়িয়ে বললো, 'হামে দে বাবা।'

আমি তাকালাম মরদের দিকে। মরদের মুখে হাসি, বললো, 'হঁ নানীকে দেন বাবু।'

বৃড়ি হামাগুড়ি দিয়ে আমার সামনে এলো। আমি তার ময়লা খড়িওঠা হাতে সিগারেট দিলাম। সে একবার নাকের কাছে নিয়ে শুঁকলো, বললো, 'বাবু মসশাই চিজ।'

আমি দেশলাইয়ের কাঠি জ্বালিয়ে তার মুখের কাছে নিয়ে গেলাম। সে তাড়াতাড়ি মুখটা একটু সরিয়ে নিয়ে বললো, 'অবহি নহি, বাদ মে পিওব। তু আপনা দম লাগা বাবা।'

ভাই ভালো। বুঝতে পারিনি, পাবার ব্যস্ততা আসলে ভবিষ্যতের সঞ্চয়। আমি আবার মরদের দিকে তাকালাম। না, তার নজর আর এদিকে নেই। লক্ষ্য দক্ষিণ-পূবে, নৌকা ক্রমেই চরের দিকে এগিয়ে চলেছে। আমি সিগারেট ধরালাম। বাতাস আটকে ধরাতে গিয়ে মুখ ফেরালাম। চোখে পড়লো ছগলির রেলপুলের অনেকখানি। নৌকায় উঠতে পারা আর চরে যাবার সংকট কেটে যাবার পরে নদীর বুকে সিগারেটের টানটা নতুন খুশির আমেজ এনে দিল। দক্ষিণদিক থেকে মুখ ফিরিয়ে চরের দিকে তাকালাম।

'তু তু একেলা কারেই যাওত বাবা? দোস্ত শাহী জরু লড়কা লেড়কি

লে নহি আওত ক্যায় ?' বুড়ি জিজ্ঞেস করলো।

আমি বুড়ির দিকে তাকালাম। তার মর্মার্থ ধরতে পারলাম না। বন্ধুবান্ধব বউ ছেলেমেয়ে নিয়ে কেন আঁসিনি ? একলা কেন ? এতখানি আপ্যায়ন তো আশা করা যায় না। আমি অবাক হয়ে বাংলাতেই জিজ্ঞেস করলাম, 'তাদের নিয়ে আসবো কেন ?'

'উ ত তুলোগ জানত হো বাবু।' বুড়ির ঝলমানো ভুট্টাদানা দাঁতের হাসির সঙ্গে চোখের চারপাশে এবার অনেকগুলি ভাঁজ পড়লো, 'বাবুলোগ আপনা নাও পর এঁসান আওত, চৌরে পরে খানা পাকারি খাওত, পিওত, দিনভর কতনি নাচা গানা করতছি—'

বুড়ির কথার মর্মার্থ বুঝে নিজেছিলাম। কিন্তু তার কথা শেষ হবার আগেই মরদ ওদিকের গলুই থেকে বলে উঠলো, 'ফিষ্টি বাবু, ফিষ্টি করেন না আপনেরা ? চড়াইহিভাতি। নানী হোই কথা বলছে।'

সংবাদটা আমার কাছে নতুন। এককাল ধরে কেবল হাতছানিটাই দেখে এসেছি আর মনে মনে ভেবেছি একদিন নদীর মাঝখানে সবুজ রেখাটিতে যাবো। তখন একবারের জন্তও এই চিন্তাটা মাথায় আসনি আমার আগে, আমার মতন অনেক মানুষ হাতছানির সাদা দিয়ে গিয়েছে একেবারে চর মাথায় করে। আমি খালি ভাবছি নিরিবিচি চরটি অনেক দূরে আপনাতে আপনি আছে অজ্ঞদের চোখে তখন তার আর একটা পরিচয় হয়ে গিয়েছে, 'পিকনিক স্পট'। ভাবতেই মনটা খারাপ হয়ে গেল। কখনো কখনো লোক পারাপার করতে দেখেছি। চর ডিঙিয়ে এপার ওপার। কিন্তু চড়াইভাতির কথা কেউ কখনো বলেনি, তেমন কোনো দলকে নিজের চোখে ডাঙা থেকে ভেসে আসতেও দেখিনি। আমি মরদের দিকে তাকিয়ে জিজ্ঞেস করলাম, 'চরে লোকেরা ওসব করতে আসে নাকি ?'

'হঁ বাবু, কখন কখন আসে। এই জারা ঠাণ্ডার টাইমে ছুটটির দিনে বাবুলোগ চড়াইভাতি করতে আসে।' মরদ বৈঠা টানতে টানতে বললো, 'তবে এই চরে কমতি আসে, ভিরবনীর চরে জায়গা যায়।'

ত্রিবেণীর চর আরও উত্তরে, সেটা এদিক থেকে বিশেষ চোখে

পড়ে না। আমার চলাচলের পথে এই হালিশহরের চরটাই এককাল চোখে পড়ে এসেছে। এখানে কম লোকে চড়াইভাতি করতে আসে। এ সংবাদেও মনে কোনো সান্দ্রনা পেলাম না। লোকেরা এ-চরে চড়াইভাতি করতে আসে, খবরটা আগে জানা থাকলে বোধহয় মনটা এমন বিমর্ষ হয়ে যেতো না। বিমর্ষ ? একেই বলে মন গুণে ধন। রীতিমতো ঈর্ষাবোধ করছি। হিংসে যাকে বলে। যেন একান্ত আমারই ভোগের জন্ত জেনে এক জায়গায় গিয়ে শুনি, সেখানে বহুভোজের মহাৎসব অনেক আগেই ঘটে গিয়েছে। নিজেকে কেমন বঞ্চিত মনে হতে লাগলো। তবে, ছু-পাড়ের মূল স্থলে এককালের যাওয়া আসার সময়ে, জলে ভেসে থাকা সবুজ রেখাটির এত হাতখানি কিসের ? ছলনা ?

মুখ ফিরিয়ে চরের দিকে তাকালাম। এখনো অনেকটাই যেতে হবে। গাছ বলতে একটিই বেঁটে ঝাড়লো গাছ দেখতে পাচ্ছি উত্তর-দিক ঘেঁষে। তার পাশেই গায়ে গায়ে লাগানো ছোটো খড়ের দোচালা ঢালাঘরের চাল মাটি ছুঁয়েছে। বাঁকিটা সবই সবুজ, আর কোনো রঙ চোখে পড়ে না। হাতে একটি সরু লম্বা কণ্ডি নিয়ে চরের মাঝখান দিয়ে দৌড়ে চলেছে যে, তার ছোটো ছোটো হাত আর একটি ছোটো মাথা ছাড়া কিছুই দেখতে পাচ্ছি না। আরও ছু-একটি মূর্তি দূরের উত্তরে চোখে পড়ছে।

আশ্চর্য! এ আমার চোখের ধন্দ নাকি ? এখনো সেই একই হাতছানি দেখতে পাচ্ছি। এখনো তেমনি নিরালো আর রহস্য দিয়ে ঘেরা চর, মনটাকে যেন আগের মতনই টানছে। এও কি ছলনা ? আমি মুখ ফিরিয়ে মরদের দিকে তাকালাম। সে চরের দিকে তাকিয়ে উজানের স্রোত ঠেলেছে। বুড়ির দিকে তাকিয়ে জিজ্ঞেস করলাম, 'এই সব লোকজন এলে তোমাদের বেশ ভালো লাগে, না ?'

বুড়ি আমার কথাটা তেমন বুঝে উঠতে পারলো না। ভুরু কুঁচকে বললো, 'কা কহল বানি বাবা ?'

ছবাব দিল মরব, 'না না বাবু, হামিনলোগের আচ্ছা লাগে না।

বাবুলোগ জেনানা উনানা বালবাচ্ছা সব লিয়ে আসে, ক্ষেতি উতি পর লড় দৌড় করে। আমরা এই লায়ে পর শহর থেকে আলিফ করে কলের পানি লিয়ে আসি, লকরি লিয়ে আসি, উসব মাংগে। ও কি বলব বাবু, না দিলে উনলোগ গোসা করে, আর হামিনলোগকে খানা বাঁচলে খেতে বোলায়।' কথাটা বলে সে হাসলো আর মুখ ফিরিয়ে নিল।

তার হাসি আর মুখ ফিরিয়ে নেওয়াটা যেন বিশেষ অর্থবহ। অবিশি তার থেকে অনেক বেশি অর্থবহ তার কথাগুলো। কেমন একটা অসম্মানবোধ আর স্কোভের সুর যেন বাজলো তার কথায়। আমাদের বাঙালী 'বাবুলোগ'দের মনোভাবটা আমাদের না জানার কথা নয়। ক্ষেত্রবিশেষে চেহারা, জীবনযাপনের ছবির সঙ্গে আমাদের চোখে যারা 'গরীব' তাদের কতোটুকুই বা আমরা চিনি। মরদের অসম্মানবোধটা স্পষ্ট... 'বাবুদের বনভোজনের খাবার বাঁচলে আমাদের খেতে ডাকে।' দ্বীপের মরদরা যে তা খেতে যায় না, তার কথা থেকেই বোঝা যাচ্ছে, কিন্তু 'বাবুলোগ'দের খেতে ডাকাটা যে তাদের কতোখানি অসম্মানিত করে, 'বাবুদের সে-ধারণাটাও নেই। তা ছাড়া চাষ-আবাদের জমিতে দৌড়োদৌড়ি ছুটাছুটি ক্ষতির কারণ। বেচারিরা নৌকায় করে শহরের জলকল থেকে জল নিয়ে আসে, রান্নার আগুনের জ্বল কাঠকুটো নিয়ে আসে। বাবুবনভোজনওয়ালারা তা অনায়াসেই দাবী করে। স্কোভের কারণ সে-গুলোই। তারপরে আমার দিকে তাকিয়ে হেসে মুখ ফেরানোর কারণটা কী ?

কথাটা জিজ্ঞেস করার বিষয় না। অনুমান করে নিতে পারি। হাসিটা তার সংকোচ আর লজ্জার। কথাগুলো শোনাচ্ছে সে 'বাবুলোগ'দেরই একজনকে। বাবু আবার কী ভেবে বসেন, কে জানে ? ভাবলেও হয়তো তার কিছুই যায় আসে না। কিন্তু এটা হলো মরদের নিজস্ব ভঙ্গি। এ মাহুগুলাের মানসিকতা এমন জটিল না, যা বৃষ্ণতে হলে 'ভদ্রলোক'দের বিস্তর প্যাঁচপয়জার জানা থাকা দরকার। এখন আমার মনেই কেমন একটা খচখচানি। মরদ যেমন

অনায়াসেই তার নৌকায় আমাকে মওয়ার করে নিল, তারপরে আমার সিগারেট দিতে চাওয়্যার ব্যাপারে সে মনে মনে হাসেনি তো ?

তাই যদি হবে, তবে বুড়ি অমন হাত বাড়িয়ে এগিয়ে এসেছিল কেন ? বড় বেশি ব্যস্ততাই তো দেখেছিলাম। ভিথিরিপনা না থাকলেও, লোভ দেখেছিলাম। আসলে বুড়ির পক্ষে ওটাই সহজ। ওটা ভীমরতি না, মৌতাতের টান। খাবার আর নেশার বস্তুতে তফাত আছে। একটা নিতান্ত স্থূল, আর একটা রসের ব্যাপার। এর থেকে ধরে নেওয়া যায় না বুড়ির আত্মসম্মানবোধ নেই। কিন্তু একটা বিষয়ে মরদ আমার মনে খটকা ধরিয়ে দিল। খটকা না বলে অবাধ করা বলা চলে। গঙ্গা মায়ীর বৃকে বাস করে শহরের জলকলের পানী কেন নৌকায় করে বহে নিয়ে আসতে হয় ? অনেক বাঙালী মাঝির কথা জানি, যারা গঙ্গার বৃকে মাসের পর মাস বাস করে, তারাও অনেকেই গঙ্গার পুণ্য সলিল পানীই ভূগ্য মিটিয়ে থাকে। মাঝি তো অনেক দূরের কথা, আমার বিধবা মা থেকে বর্ষীয়সী বিধবা আত্মীয়রা অনেকেই এখনো গঙ্গাজল পেলে কলের জল স্পর্শ করতে চান না। গঙ্গার পুণ্য সলিল যে আর পবিত্র নেই, দুপাশের কলকারখানার বিঘাত তরল কেমিক্যাল, শহরের খালের মতন বিরাট নর্দমার মুখ দিয়ে যতো রকমের নোংরা আর ময়লা বারো মাস এসে মিশছে, বা অনেক সময় শ্রোতের জলে চাফুখ ভাসতে দেখলে গা ঝিন ঝিন করে, গা ডুবিয়ে স্নান করতেও প্রস্তুতি হয় না, সে-কথা বলেও তাঁদের নিবৃত্ত করা যায় না। অথচ নদীর বৃকে চরায় যারা বাস করে, চাষ করে, তাদের গঙ্গামায়ীর পবিত্র পানীতে এহেন বিরাগ কেন ? মরদের মতন মাহুগুের কাছে গঙ্গার জল সম্পর্কে এতোটা স্বাস্থ্যকর 'দৃষ্টিভঙ্গি' আশা করিনি। না জিজ্ঞেস করে পারলাম না, 'তোমরা গঙ্গার পানী খাও না ?'

মরদ বৈঠা টানতে টানতে জবাব দিল, 'হঁ বাবু, হামিনলোক সবহরকম পানী পীওত্তবানী, কিন্তু আদমীলোগ কুহু মানে না। গঙ্গাপানী বিলকুল গন্ধা করিয়ে দিচ্ছে। ই দেখেন না, উজানিয়া টাইমে হাজিনগরের কাগজ কলের বহুত গর্দী ভাসাইছে। যিভনা ইটের ভাটা

আছে কিনা বাবু, সব গঙ্গা কিনার কিনার বিশ-পঁচিশ টাটখানা বানাইছে। কততো দুর্দা জলে ভাসিয়ে যায়। বিমার উমার হলে ডগদরবাবুর কাছে যাই, ত ডগদরবাবু বলেন কি গঙ্গাপানী পীনা বিলকুল বন্ধ না করলে বিমার খোবে না! ত হাঁ খানাউনা সবহি গঙ্গাপানীতে পাকাই, আর হর টাইম কলের পানী থাকে না, তখুন ত গঙ্গাপানী পীয়ে যাই।’

আমরা জলও খাই, মরদরা পীয়ে। বাই হোক, আসল কথাটা বোঝা গেল। চরে বাস বলেই গঙ্গার জলের নোরা ময়লা, যুৎদেহও মরদেরা সব মময়েই চোখে দেখতে পায়। বিরাগটা সেই কারণেই। তা ছাড়া ডগদরবাবুর মানা আছে, বিমার সারবে না। তবুও এমন নয় যে গঙ্গার পানী পান একেবারেই চলে না। কলের জল সবসময়ে মজুদ থাকে না। রাখাও বোধহয় সম্ভব না। মোদা কথা কলের জল না হলেও চলে যায়। তবে রাখতে পারলে ভালো।

খুবই ভালো। চরে গিয়ে হেষ্ঠী পোলে তাহলে আমাকে পুণ্য সলিলে তো মেটাতে হবে না। আমি তো আর বনভোজনের দল নিয়ে আসিনি। কাঁধে করে নিয়ে আসিনি জলের পাত্রও। একলা মাছুষ, একটু জল চাইলে মরদ বা তার পরিবারের লোকেরা নিশ্চয়ই বিরক্ত হবে না।

‘বাবু, হুসিয়ার।’ মরদ আওরাজ দিল, ‘লাও ঘাটেপর লাগছে।’

পিছন ফিরে তাকিয়ে দেখি উঁচু পাড় সামনে। হুসিয়ার না করলে ধাক্কা লাগবার সম্ভাবনা ছিল। গলুইটা হুহাতে জোরে চেপে ধরলাম। নৌকার গলুই ঠেকলো চরের ডাঙায়। ভেবেছিলাম, কিছুটা সমতল বালুচরে নৌকা লাগবে। জুলে গিয়েছিলাম, এখন জোয়ারের ভরা ভরতি। তবে মরদ ঘাটেই নৌকা লাগিয়েছে। দেখা গেল, শক্ত মাটির উঁচু পাড়ে সিঁড়ির মতন কয়েকটি ধাপ কাটা। এক ধরনের বুনো গুল্ম লতা মাটির বুক ছড়িয়ে আছে।

ধাক্কাটা লাগলো মেটামুটি জোরেই। কিংকর্তব্য ভেবে কিছু করবার আগেই মরদ বিপরীত দিকের গলুই থেকে লহমায় এগিয়ে এসে

লাফ দিয়ে নামলো ডাঙায়। হাতে সেই বাঁশের লগি। এদিকের গলুইয়েও একটি লোহার আংটায় দড়ি ছিল। সেই দড়িটা টেনে ধরে বললো, ‘নামিয়ে পড়েন বাবু।’

এর থেকে সুবিধা আর হয় না। জল কাদা কিছু নেই। স্বাঙেল পায়ে দিবি ডাঙায় নেমে পড়লাম। বৃড়ি হামাঙুড়ি দিয়ে তার বস্তাটা টেনে নিয়ে এলো গলুইয়ের কাছে। অনায়াসেই সেটা মাথায় তুলে পাড়ে নামলো। কোনােদিকে না তাকিয়ে ধাপে ধাপে উঠে গেল ওপরে। মরদ তখন লগির গায়ে দড়ি বেঁধে সেটাকে মাটিতে খুঁচিয়ে খুঁচিয়ে অনেকখানি গভীরে চুকিয়ে দিল। নাড়াচাড়া করে দেখলো, লগি বেশ শক্তভাবেই গেঁথে বসেছে। তারপরে আমাকে দাঁড়িয়ে থাকতে দেখে বললো, ‘উঠিয়ে যান বাবু, যুম উসকে দেখেন।’

মরদ কথাগুলো বলে আমার আগেই ধাপের পাশ দিয়ে এক দৌড়ে লাফিয়ে উঠে গেল। আমি মাটি কাটা ধাপ বেয়ে উঠতে উঠতে ভাবলাম, এখন জলের বুকে কুমিরের পিঠে আছি। মরবার ভয় নেই বটে, ইচ্ছামতো যখন খুশি পশ্চিমের মূল ডাঙায় ফিরে যেতে পারবো না। সেই আবার মরদকেই হয়তো বলতে হবে। অথবা তারা যখন কেউ যাবে, তখন নৌকায় ঠাই নিতে হবে। ওপরে উঠে দেখছি, মরদ চলেছে চালাবরের দিকে, বৃড়ি বস্তা মাথায় চলেছে তার আগে আগে। আমি ডাক দিলাম, ‘এই যে ভাই গুনছো?’

মরদ দাঁড়িয়ে ফিরে তাকালো, হুঁ। আমি সঙ্কোচে হেসে বললাম, ‘তোমার নৌকায় নিয়ে এলে পারানির পয়সাটা নেবে না?’ কথাটা যেন বুঝতে পারিনি এমন অবাধ চোখে ভুরু কঁচকে তাকালো। তারপর চর কাঁপিয়ে হেসে উঠে বললো, ‘হায় রাম। আমি কি বাবু ঘাটমাঝি আছি? আমার লাগেই পর আপনেকে লিয়ে আসলাম, এতে পারহানি কী দিবেন? আপনে চর দেখতে আসিয়েছেন, দেখেন না।’

মরদের হাসি আর কথায় একটু বেন নিভেই গেলাম। কিন্তু মনটা কেমন ঝরঝরিয়ে গেল। সহজ ভাবের ব্যাপারটা সহজে কোনােদিন বুঝতে পারলাম না। আমি নিজের কাজ গোঁহাবার জন্ম প্রথম থেকেই

ভাব জন্মাবার চেষ্টা করে আসছি। মরদ সেরকম কোনো চেষ্টা না করেই, নিতান্ত মামুলিভাবে আমাকে তার নৌকায় নিয়ে এসেছে। আমি বললাম, 'এবার তা হলে সিগারেটটা নাও।'

মরদ কাছে এসে হাত বাড়িয়ে বললো, 'দেন।'

আমি প্যাকেট থেকে প্যাকেট বের করে একটা সিগারেট ভাকে দিলাম। সে সিগারেটটা কপালে ঠেকিয়ে ঠোঁটে চেপে ধরলো। আমি দেশলাই দিলাম। সে কাঠি আলিয়ে সিগারেটে ছোঁয়ালো। টান দিল একটা লম্বা। একমুখ ধোঁয়া ছেড়ে ফিরিয়ে দিল দেশলাই। আমি জিজ্ঞেস করলাম, 'তোমার নামটা কী ভাই?'

'ভরত।' মরদ জবাব দিল, সিগারেটে টান দিয়ে ধোঁয়া ছাড়লো।

এখন দেখছি ভরত নামে মরদের অবয়বটা যেন পালটে গিয়েছে। তার লম্বা হিলহিলে শরীরটা জুড়ে যেন সাপ জড়ানো। আসলে বৈঠা টেনে তার পেশিগুলো এখন স্পষ্ট হয়ে ফুটে উঠেছে। সারা গা ঘামে ভেজা, যেন তেল চকচক করছে। আমি আবার জিজ্ঞেস করলাম, 'ওই বৃড়ি তোমার কে হয়?'

'নানী।' ভরতের নাসারন্ধ্র দিয়ে লম্বা চওড়া গৌঁফ জোড়ায় যেন সিগারেটের ধোঁয়া ঢুকে গেল, 'সমঝলেন কি বাবু? ঠাকরান নাই, নানী মায়ের মা যে আছে, ওহিকে নানী বলে।'

আমি জিজ্ঞেস করলাম, 'আর ঠাকরান?'

'বাবার মা।' ভরত আবার সিগারেটে টান দিয়ে বললো, 'ত আপনে চরে ঘুমনে বাবু, আমি ঘরে যাই।'

আমি ব্যস্তভাবে বললাম, 'হ্যাঁ হ্যাঁ তুমি যাও।'

ভরত ফিরে চললো চালার দিকে। তার নানীকে আর দেখতে পাচ্ছি না। নিশ্চয় চালায় ঢুকে পড়েছে। দূরের থেকে এতোদিন দেখে এসেছি একটা কিংবা দুটো চালাঘর। এমনকি একটু আগে নৌকায় বসেও গায়ে গায়ে লাগালাগি দোচালা ধারের দুটো চালাঘর যেন দেখেছিলাম। এখন সামনে থেকে দেখছি, ভুল দেখেছি। দুই না, চার-পাঁচটি ঘরের কম না। মুখোমুখি আর গায়ে গায়ে ঘরগুলোর

মাঝখান দিয়ে যেন একটু সরু রাস্তাও দেখছি। প্রায় একটা পাড়া। কতো লোক থাকে?'

যে গাছটাকে ভেবেছিলাম ঝাড়ালো বেঁটে, সেটি ঝাড়ালোও বটে, বেঁটেও বটে, তবে আসল গাছটি আদৌ প্রাচীন না। অথচ। অথচ কেন যেন মনে হয়েছিল ঝাড়ালো বেঁটে হলেও গাছটি বট-অশ্বথ জাতীয় কিছু হবে। এখন দেখছি গাশ্বিল বা সেই জাতীয় কোনো গাছ। বোঝা উচিত ছিল, এই চরে এখনো কোনো বৃক্ষেরই প্রবীণ হয়ে ওঠা সম্ভব না। দূর থেকে এতদিন দেখে এসেছি, চালাঘর চরের উত্তর সীমায়। আসলে উত্তর ঘেঁষে কিন্তু চালাঘরগুলো ছাড়িয়েও চরের সীমানা উত্তরে বেশ খানিকটা এগিয়ে গিয়েছে। সেই দিকও শশুরের সবুজ আভা।

আমি মুখ তুলে হালিশহরের দিকে দেখলাম। বালির চিবি, প্রায় সারবন্দী ঘর, কোথাও গাছপালার কাঁকে কাঁকে পাকা বাড়ি, দু-একটা মন্দির, সেই বিখ্যাত পার্ক যার উল্টো দিকেই হালিশহর পৌরগৃহ, উঁকি দিচ্ছে পুলিশ কাঁড়ি। দেখতে না পেলেও, বহুবার যাতায়াতের রামপ্রসাদের ভিটার, পূর্বগামী পথটা চোখের সামনে ভাসছে। পশ্চিম পারে চোখ ফেরালেই, একদিকে ডানলপ কারখানার কুঠি, কিঞ্চিৎ দক্ষিণ ঘেঁষে। দক্ষিণে অনেকটাই হালিশহরের মতনই। গাছপালা, ঘরবাড়ি, নদীর ধারে ধারে ইট কাঠ চুন সুরকির গোলা। সব থেকে উঁচুতে মাথা তুলে আছে বাঁশবেড়ে হংসেশ্বরী মন্দিরের চূড়া। তবে হালিশহরে কখনো পুরনো লোহালকড়ের স্তূপ দেখেছি বলে মনে করতে পারছি না। চোখ তুলে তাকালাম আকাশের দিকে। চোখে কালো ঠুলি না থাকলে, রোদ ঝলকানো মাঘের নীল আকাশে চোখ রাখা সম্ভব ছিল না। বাঁ হাতের পাঞ্জাবীর হাতা সরিয়ে দেখলাম, ঘড়ির কাঁটা একটা বেজে এগিয়ে গিয়েছে কয়েক মিনিট।



অবশেষে সেই চরে, হাতছানির মাড়া দিয়ে। ঘর আছে, মানুষ আছে দেখতে পাচ্ছি, কিছুটা দূরেই মেয়ে পুরুষ কয়েকজন চরের মাঠে কাজ করছে অথচ যেমনটি দূর থেকে ভেবেছিলাম, অবিকল সেইরকম মিলে যাচ্ছে। স্থির বটে তথাপি যেন শ্রোতের দিকে চোখ রেখে মনে হয় সবুজ দীর্ঘ একটি ভূমিরেখা নিরিবিলা মনের স্রুখে ভেসে যাচ্ছে। এই ভেসে যাওয়াটা দূর থেকে তেমন বোঝা যায় না। জোয়ারের উজান টান দেখলে, মনে হয়, চর এখন ভেসে চলেছে বিপরীতে, সমুদ্রের দিকে। ভাটার সময় নিশ্চয় চরকে উত্তরগামী ভেসে যেতে দেখা যাবে। মাঝে মাঝে চড়াইয়ের ঝাঁক উড়ে চলেছে। চরের কোনো জায়গায় দল বেঁধে বসছে, আবার উড়ছে। আর কোনো পাখি চোখে পড়ছে না।

আমার চোখের সামনেই, অনেকখানি জায়গা জুড়ে ছোলায় চাষ হয়েছে। সবুজের ঝাড়ে ফসল এখনো অঙ্কুরের দশায়। ছোলা চাষের সীমানা পেরিয়ে, কিছুটা উত্তরের মাঝামাঝি এক জায়গায় দেখতে পাচ্ছি, দুজন স্ত্রীলোক একজন পুরুষ কাজে ব্যস্ত। চূপ করে এক জায়গায় বসে থাকবে ভেবেও, পারলাম না। ছোলাখেতের পাশ দিয়ে এগিয়ে গেলাম দক্ষিণে। কয়েক পা এগোতেই, কে যেন আমার পাশ কাটিয়ে দৌড়ে এগিয়ে গেল। দেখলাম, ছোটখাটো, নেংটি পরা চারপাঁচ বছরের এক বালক। হাতে একখানি লম্বা কঞ্চি। এ মূর্তির মাথা আর লম্বা কঞ্চি নোকো থেকেই দেখতে পেয়েছিলাম। জানি না, বালকটির হাতে বাঁশের কঞ্চি কোথা থেকে এলো। এ চরে বাঁশের ঝাড় কবে জন্মাবে, সে-কথা একমাত্র চরের সৃষ্টিকর্তাই বলতে পারে।

বালকটি ছুটে গিয়ে হাত দশেক দূরে দাঁড়িয়ে আমার দিকেই তাকালো। নেংটিটা নিতান্ত নেংটিই। কোমরে এক প্রস্থ মোটা স্নতো

জড়ানো। তার সামনে পিছনে এক ফালি কাপড়ের টুকরো জড়িয়ে সভ্যতা রক্ষা করা হয়েছে। কী দরকার ছিল জানি না। শহরের পথে ঘাটে গুর মতন ছেলেরা অসংকোচে দিগম্বর হয়ে ঘোরো। আর ও তো শহর থেকে অনেক দূরে। তবে এই শিশুর নেংটি বোধহয় শহুরে সভ্যতার থেকে মানুষের সহবতের কারণেই। কৃষ্ণদৈপায়নের দারা গায়ে খুলো কাদার দাগ। গলায় একটা কালো স্নতোয় মার্জুলি বুলছে। মাথায় খোঁচা খোঁচা কদম হাঁট চুল। গুর অপলক অবাধ কৌতূহলিত চোখে যদি কাজল না মাথানো থাকে, তাহলে বলতে হবে, গুর কাজল-কালো চোখ ছুটি ভাগর। নাকটি টিকলো। ঠোঁট ছুটি ঝাঁক হয়ে গিয়েছে, দুখের দাঁত দেখা যাচ্ছে।

শিশু দাঁড়িয়ে দেখছিল চরের বৃকে নয়! আদমিকে। কিন্তু নয়! আদমি ঠাণ্ডারনি। আমি পায়ে পায়ে এগিয়ে চলেছি, আর শিশু আমার সঙ্গে পাল্লা দিয়ে, মুখ না ফিরিয়েই পিছু হটছে। পালতে বালিতে মেশামিশি এ মাটি এখন শক্ত হলেও, আছাড় খেলে চোট লাগার সম্ভাবনা তেমন নেই। চোখের কালো ঝুঁলি মানেই মুখোশ। শিশু আমার আপাদমস্তকের থেকে, চোখের দিকেই দেখছে বেশি। একবার ভাবলাম, গুকে ছুটে গিয়ে ধরি। কথাটা ভাবতেই মনে মনে হাসি পেয়ে গেল। অকারণ বেচারিকে নিশ্চয়ই ভয় পাইয়ে দেওয়া হবে। তবে গুকে আমি কৃষ্ণদৈপায়ন বলে কিছু ভুল করিনি। কৃষ্ণ তো ও বটেই আর দ্বীপের অধিবাসীকেই দৈপায়ন বলে। স্বয়ং ব্যাসদেবকে নিয়ে অনেককাল একটা ভুল ধারণা ছিল, দ্বীপে যার জন্ম হয়, তাকেই দৈপায়ন বলা হয়। প্রকৃত কথাটা জানলাম এই সেদিনে, স্বয়ং শ্রীভূত শুকুমার সেন মহাশয়ের এক রচনায়।

গোলে হরিবোলে জানা একরকম, অমুশীলিত জ্ঞানের বচন আলাদা। অতএব শিশুটিকে কৃষ্ণদৈপায়ন বলা বোধহয় অসঙ্গত হলো না। আমি গুকে তাড়া না করে, যাকে বলে 'বাজারি' হিন্দি, সেই ভাষায় জিজ্ঞেস করলাম, তুমকো নাম ক্যারা হায় বেটা ?

আর যাবে কোথায় ? যেন তীরবিন্দু হরিণ বাচ্চার মতন একটা

লাফ দিয়ে, কঞ্চিটাকে উঁচুতে তুলে, দৌড়ে একেবারে সেই দুই স্ত্রীলোক ও এক পুরুষের কাছে, কিছুটা উত্তরের মাঝামাঝি গিয়ে দাঁড়ালো। কিছু একটা বললো নিশ্চয়। কারণ কর্মরত স্ত্রী-পুরুষ তিনজনেই মুখ তুলে একবার আমার দিকে দেখলো। কিন্তু তাদের অসুস্থদিকে তাকিয়ে দেখবার অবকাশ যেন নেই। আবার মুখ নামিয়ে নিজেদের কাজ করতে করতে, যেন কিছু বলাবলি করতে লাগলো।

আমি ছোলার সৌমানা পেরিয়ে, এগিয়ে গেলাম তাদের দিকেই। সাবধানে যেতে হচ্ছে। আমার আশেপাশে, এখনো দেখছি বেশ বিলিতি বেগুনের গাছে, লাল বিলিতি বেগুন বুলছে। যতোটা বালি আশা করেছিলাম, মাঝখানের ভূমিতে ততোটা নেই। এখাড়া খেবড়ো মাটি আরও এগিয়ে গিয়ে, কাজের মানুষদের সামনে দাঁড়াতেই, কঞ্চি হাতে শিশু একটি স্ত্রীলোকের পিছনে নিজেকে আড়াল করে দাঁড়ালো। ও বোধহয় ভেবেছে, আমার লক্ষ্য ওর দিকেই। আমি ওর কাছে ভিনদেশী ভো বটেই। অচেনা আর নয়ও বটে, পোষাকে আশাকে, সবদিক থেকেই।

স্ত্রীলোকটি একবার আমার দিকে মুখ তুলে তাকালো। তার ঠোঁটের কোণে হাসি। নিতান্ত স্ত্রীলোক বলাটা কি ঠিক হচ্ছে? ছিপছিপে গড়ন, বলিষ্ঠ শরীরের যোবতী বহুড়ি বললেই যথার্থ বোঝায়। এর চোখ জোড়াও দেখছি, প্রায় কাজল মাখানো কালো, যাদও কাজল লাগায়নি। নাকটিও টিকলো। গায়ের রঙ দেখে, ঘন সবুজ কাঁটাল পাতার ছবি ভেসে উঠছে। অথচ কাশা বলতে ইচ্ছা করে না। আর প্রায় সেইরকম রঙেরই একটি শাড়ির আঁচল ডান কাঁধ ঘিরে মাথার অংশত ঢেকে, কোমরে জড়ানো। আঁচলের ডাইনে বাঁয়েই বাঙালী অবাঙালীর পরিচয়ের চিহ্ন। অথচ দু-হাতে দেখছি, বাঙালী সধবাদের মতন দুগাছি শাঁখা আর নোয়া, বাঁটনে খানিক ওপরে তোলা। গলায় চিকচিক করছে বোধহয় রূপোর একটি সন্ন হার। অলংকারের মধ্যে আর কিছু নেই। মাথার ঘোমটা সরানো বলেই, সিঁথির সিঁথুরের রেখা চোখে পড়ছে। কপালে টিপ ছাপ কিছু নেই। হাতে-পায়ে ধূলা,

মুখে ভুরুতে চোখের পাতায় আর মাথার চুলেও ধূলো রেনু। তিনজনেই আলু তুলছে।

পঞ্চাশ থেকে বাটের মধ্যে বয়স, খালি গা চওড়া শক্তপোক্ত গঠন পুরুষটির কাঁচাপাকা গৌণ জোড়ায় ধূলা লেগেছে। হাঁটুর ওপরে তোলা, গঙ্গার জলে ধোয়া কিছুটা গেরিমাটি রঙের ছোট ধুতি। তার মাথার কদমছাঁট চুলে আর বৃকের মাঝখানে গুচ্ছের লোমেও ধূলা লেগেছে। মাথার টিকি গাছা তেমন বড় না। সারবন্দী আলুগাছের গোড়ায় কোঁদালের কোপ বশাচ্ছে, আর বাঁজিয়ে চাড়া দিয়ে শিকড়ে ঝোলানো ছোটবড় আলুর গোছা তুলে দিচ্ছে। এই পর্যন্ত তার কাজ। বাকি কাজ যোবতী বহুড়ি আর প্রায় মাঝবয়সী স্ত্রীলোকটির। মাঝবয়সী বলছি বটে, কিন্তু অনেকদিনের পুরনো রঙ উঠে যাওয়া আবছা লাল ডুরে শাড়িটি যোবতী বহুড়ির মতনই পরা। চুল একটিও পাকেনি, সিঁথির মাঝখানে সিঁথুর। শরীরের দিক থেকে তাকেও বলিষ্ঠ বলতে হবে। কিন্তু শাঁখার বদলে দেখছি তার দু-হাতে কাঁদার মোটা বালা। কানে মাকড়ি ছুটোও রূপোরই মনে হচ্ছে। দুই রমণীর কাজ হচ্ছে, হাতের ছুরি দিয়ে, গাছের গোড়া কেটে, মাটি বেড়ে আলু বস্তায় ঢোকানো। তার মধ্যেই দ্রুত হাতে, আলু গাছের ডগার কয়েকটি কচি পাতা বা পাওয়া যাচ্ছে, কেটে ছেঁটে আলাদা করে রাখা। নিশ্চয়ই কোনো উদ্দেশ্য আছে।

কোদালির কোপে ধূলা উড়ছে, ছোট ছোট গাছগুলোর গোড়া ধরে মাটি ঝাড়তে ধূলা উড়ছে। আমি সামনে গিয়ে দাঁড়াতে প্রথমে যোবতী বহুড়ির পিছনে আশ্রয়গোপন, আর বহুড়ির মুখ তুলে তাকানো, ঠোঁটের কোণে হাসি। তারপরে বাকি দুজনেও আমার দিকে একবার মুখ তুলে তাকালো। পুরুষটি আমাকে অবাক করে দিয়ে, হঠাৎ ডানহাত কপালে ঠেকিয়ে বলে উঠলো, 'রাম রাম বাবু।'

বলেই যে-ভাবে আবার নিজের কাজে লেগে গেল, মনে লাগিয়ে দিল খটকা। তার নিজস্ব নমস্কারের অভিভাবদন কি আমাকেই? দুঃখতে সময় গেল কয়েক মুহূর্ত, তারপরে আমি প্রায় হকচকিয়ে জবাব

দিলাম, 'রাম রাম'।

কিন্তু তখন আর পুরুষটির তাকিয়ে দেখবার সময় নেই। বা নতুন করে আর আমার প্রতি নমস্কারের জবাব দেবার প্রয়োজন নেই। সে তার স্বভাবমূলত অনাড়ম্বর নমস্কারটি জানিয়ে দিয়েছে, চরে আসা আগন্তুক 'বাবুটিকে'। বাবুই বরং অপ্রত্যাশিত নমস্কারে বিভ্রান্ত আর অপ্রস্তুত। কিন্তু বিশ্বয়ের গুঞ্জনটা এখনো আমার মস্তিষ্কে পাক খাচ্ছে। কাজের মানুষ কাজ ভোলে না। সহজ মানুষ সহজে চল অনায়াসে। অথচ যেন ফল্গুয়ার মতন। বাইরে দেখেছো গুঞ্জ কাণ্ড, অন্তঃপ্রস্রোতে বহীছে আপন বেগে। ভরতের ক্ষেত্রেও এমনটাই দেখেছি।

এরকম অবস্থায় কথাবার্তা চালানো যায় না। বাক্যালাপের ব্যগ্রতা আমারও নেই। এই চরে আমি কথা বলতে আসিনি। এসেছি অনেকদিনের হাতছানির সাড়া দিয়ে, নিরালোচনের সঙ্গে নিরিবিলা হতে। মানুষ যে আছে, তা আগেই দূর থেকে দেখেছি। নিরালোচনেরই অংশ তারা। তাদের আলোদা করে দেখা যায় না।

অনেকদিন মনে মনে ভেবেছি, গঙ্গার মাঝখানের চরে কী ফসল ফলে? আজ চোখে দেখতে পেলাম হোলার চাব। আনাঞ্জের মধ্যে দেখছি, লাল টমটসে বিলিতি বেগুন, বাজারে যার চলতি নাম টম্যাটো। অথবা বালো, টমাটার। চরের এই মানুষরাও বাধহয় বিলিতি বেগুনকে বিলাইতি বাইগন বলতে ভুলে গিয়েছে। হোলা টম্যাটোতে অবাক হইনি। কিন্তু এ চরের মাটি আলু প্রসব করে, চোখে দেখেও যেন অবাক লাগছে।

অবশু বাজারের নৈনিতাল আলুর মতন এর চেহারা না। অথচ, যাকে বলে ঠিকরে আলু, ঠিক যেন তেমনও না। জাতের দিক থেকে নৈনিতালের কাছাকাছি, আকৃতি কিছু ছোট, রঙটাও বর্ধায় ভেসে আসা লাল পলির ছোপ। আরও উত্তরের আশেপাশে দেখছি, এখনও ফুল আর বাঁধাকপি ছড়িয়ে ছিটিয়ে রয়েছে। তবে, অনেক কাঁকা। ফুলকপিগুলো বিশেষ করে তার সময়কালের রূপ হারিয়েছে। পাতার বাহার যদি বা আছে, ফুলের বাহার মোটেই নেই। সেই তুলনায়

বাঁধাগুলো এখনও যেন বেশ আঁটসাঁট বড়সড় শরীরে রোদে ঝিলিক দিচ্ছে। দেখে বুঝতে পারছি, ফুল আর বাঁধার কাঁকে কাঁকে জমিতে, ছোট ছোট সবুজের চারা মাথা চাড়া দিয়ে উঠছে। নিশ্চয়ই কোনো শস্তের বীজ ছড়িয়ে দেওয়া হয়েছিল। এর নাম জমি। তাও আবার অকুলের ভাসমান জমি। এক চিলতে পতিত রাখলে, জীবনও পতিত, না হলে আর মূল ছেড়ে, নদীর বুকে?

কিন্তু চাব যার জুমি তার, এমন ঢকানিনাদ শুনে শুনে কানের পর্দা ফেটেছে অনেককাল, কাজে কখনো কিছু হতে দেখিনি। 'নেপো' বলে এক শ্রেণী বরাবর দই মারে বলে জানি। এই জমির খাজনা নজরানার দাবীদার কে?

জানতে ইচ্ছা করলেও, এই কাজের মানুষদের এখন সেই কথা জিজ্ঞেস করতে মনে ঠেক লাগছে। দেখছি, শিশুটি এখনও যোবতী বহুড়ির পিছন থেকে, মাঝে মাঝে উঁকি দিয়ে আমার দিকে দেখছে। চোখাচোখি হলেই ঝপ করে মুখ আড়াল করছে। ভয় কেটেছে, এখন এটা লুকোচুরি খেলা চলছে। ইতিমধ্যে, ফুল, বাঁধা, ছোট ছোট সবুজ চারার সীমানা ছাড়িয়ে, আমার নজর এগিয়ে গিয়েছে আরও উত্তরে। সেখানে আরও ছুটি মূর্তি কোনো কাজে ব্যস্ত। দূরছটা কম, অতএব, ফারাকে ফারাকে মূর্তি ছুটি দেখে বুঝতে পারছি, তুজনই কিশোর-কিশোরী। আরও উত্তরে, চরের উত্তর প্রান্তের শেষ সীমানায়, একটি চালাঘর দেখতে পাচ্ছি। একটি কালো মূর্তিকে দেখছি, পুবার দিকে মুখ করে দাঁড়িয়ে আছে।

এসেছি যখন, কোনো সীমানাই বাদ দেবো না। তবু আগে উত্তরে পা বাড়ালাম। আমার পা বাড়াবার সঙ্গে সঙ্গে শিশুটিও ঘুরে যোবতী বহুড়ির কোমর জড়িয়ে তার সামনে গা ঢাকা দিল। কেননা, আমি যে এখন পিছনে। আমার কানে বামা স্বর এলো, বাবু তুহকে খা লেব ক্যায়?

মাঝবয়সী না যোবতী, কোন বহুড়ি বললো, বুঝতে পারলাম না, কিন্তু দোতারার নীচু পর্দায় ঝংকারের মতন রমণী স্বরের হাসি শুনতে

পেলাম, তারপরেই হট, হাত ছোড়।

আমি পিছন ফিরে একবার দেখলাম। যোবতী বহুড়ি শিশুটির হাত ধরে কোলের কাছ থেকে সরিয়ে দিচ্ছে। নেংটি পরা নেংটিটার কালো ডাগর চোখের দৃষ্টি আমার দিকে। এদের কার কী সম্পর্ক, জানি না। কিন্তু যোবতী বহুড়ি আর নেংটিটাকে মা ব্যাটা বলে মনে হচ্ছে।

আমি এবার কিছুটা ডানদিকে গিয়ে, উত্তরমুখী হলাম। তার আগেই নজরে পড়ল, জোয়ার থাকা সবুজ, চরের, এদিকে ঢালুর নীচে খানিকটা বালুচর জেগে রয়েছে। জোয়ারের জল নিশ্চয়ই এদিকে নিজের মতলবে উজানের টানে জল কম ভাসায়নি। আসলে, এদিকে চর বোধহয় আরও বাড়তির দিকে। কিছুটা উত্তরে গিয়ে দেখি, মটরশুটি এখনও চর থেকে বিদায় নেয়নি। অনেকখানি জায়গা জুড়ে তার সীমানা। পশ্চিমের ধার ঘেঁষে, খালি গা, হাঁটুর ওপর খুঁটি পরে ষোল বছরের একটি ছেলে, আর বছর দশেকের একটি মেয়ে, মাঝামাঝি জায়গায় নীচু হয়ে, ছোট ঝড়িতে মটরশুটি তুলছে। মেয়ে বলাছি বটে। কিন্তু আর দুই বহুড়ির মতনই ওর গায়ে একখানি লাল শাড়ি। এমন কি মাথায় অল্প ঘোমটাও আছে। ঠিক নজরে আসছে না, ওর সিঁথিতে সিঁদুর আছে কী না। কিন্তু দু-হাতেই রং-বেরংয়ের কাঁচের চুড়ি। ওর গায়ের রঙটাও গল্পার গৈরিক জলের মতন। গায়ের রং এমন হয় কী না জানি না। আমার চোখে সেইরকমই লাগছে। আসলে গায়ের এমন রঙকেই বোধহয় মাজা মাজা ফরসা বলে। পশ্চিমাংশের ছেলেটির রঙ অবিশিষ্ট কালো।

দশ বছর বয়সটা অল্পমানে বললাম। মেয়েটির বয়স দু-এক বছর বেশি হতে পারে। ও বসে বসেই শুটি ছিঁড়ছে আর এদিকে ওদিকে ঘুরেফিরে নড়াচড়া করছে। তার মধ্যেই আমার দিকে মুখ ফিরিয়ে দেখে নিল। একবার না, কয়েকবারই দেখলো। কিন্তু হাতের কাজে কামাই নেই। আমি আমার মনে, ও ওর মনে। তবু কয়েকবার মুখ ফিরিয়ে দেখার মধ্যে, ওর কালো চোখের কৌতূহল স্পষ্ট। বোধহয় জুকুটি জিজ্ঞাসাও চোখের কালো তারা যুগলে। বিরক্ত হচ্ছে নাকি ?

আমি পায়ে পায়ে এগিয়ে চললাম। পশ্চিমাংশের ছেলেটি একবার মাত্র চোখ তুলে দেখেছে, সেটা খেয়াল করেছি। তাকে কিশোর বলবো না নওজোয়ার বলবো বৃষ্টিতে পারছি না। সে তার নিজের কাজে ব্যস্ত। সবাই কাজের মানুষ, কাজ করছে, আমিই কেবল অ-কাজের মানুষ, চরে চরে বেড়াচ্ছি। খানিকটা এগিয়ে যেতেই, মটরশুটির ক্ষেতের মাঝখান থেকে বালিকার স্বর শোনা গেল, তু কই! যাওতানি ?

আমাকে নাকি ? পিছন ফিরে তাকালাম। কঞ্চি হাতে সেই নেংটিটা, প্রায় হাতদশেক ফারাক রেখে আমার পিছনে। সাহস বেড়েছে, না কি কৌতূহল মেটেনি ? আমি পিছন ফিরে তাকাত্তেই, কঞ্চি হাতে ও ঢুকে পড়লো মটরের ক্ষেতে। আমি আবার বালিকার দিকে তাকালাম। দেখলাম যোবতী বহুড়ির কৌতূকের হাসিটা ওর ঠোঁটে চোখেও ঝিলিক দিচ্ছে। তাকিয়েছিল আমার দিকে। চোখা-চোখি হতেই, চোখ ফিরিয়ে নিজের কাজে মন দিল। আসলে ওর কৌতূহলটাও প্রায় শিশুর তুল্যই। বয়স হিসাবে তা-ই হওয়া উচিত। ও এখন লাল শাড়ির ঘোমটা টেনে, কোমরে ঝাঁল জড়িয়ে মটরশুটি তুলছে। শহরে ওর বয়সী মেয়েরা এখন ফ্রক পরে ইঙ্কুলের ক্লাসে পড়া করছে।

বয়সটা বড় কথা, না জীবনধারণ ? বোধহয় জীবনধারণই। না হলে একই বয়সের মেয়ে, জীবনধারণে ছুরকম চরিত্র আর চেহারা। তার সঙ্গে আরও যেটা মনে আসছে, তা নিজেই নিয়েই। বয়স আর জীবনধারণের বাধা না থাকলে, আমিও তো পাখির মতন কাঁপিয়ে পড়তে পারতাম মটরের ক্ষেতে। দু-চার গোছা তুলে নিয়ে, দিকি খোলস ছাড়িয়ে দানা চিবোতে পারতাম। বয়সের বাধাটাকে যদি বা ডিঙানো যায়, জীবনধারণের ছাপ ছোপে বাবু মনিয়িটি হয়ে, কেমন করেই বা ফসলে হাত দিই ? একমাত্র উপায় হলো, বালিকাটির কাছে গিয়ে হাত পাতা। কিন্তু, হাত পেতে হয় তো বিমুখ হবো না, বালিকাটিকে বিভ্রত করা হবে। দরকার কী ? লোভ সঞ্চার করাই ভালো।

আমি পা বাড়াবার আগে, নেংটিটার দিকে ফিরে আবার আমার যোগ্য হিন্দিতে বললাম, কায়্য, তুম নাম নেই বাতায়গা ?

আবার সেই তীরবিন্দু হরিণের লাফ, এবং এবার ছুট দিল বালিকার দিকে। বালিকা খিলখিল করে হেসে উঠলো। হাসিটা আমার ভিতরেও সংক্রামিত হলো, কিন্তু আঙুল্য দিতে পারলাম না। পশ্চিমাংশের ছেলেটি একবার মুখ ফিরিয়ে দেখলো। আমি পা বাড়ালাম। মটরগুটির সীমানা পেরিয়ে, প্রথমে চোখে পড়লো ছুঁয়ের বৃক লতায়-পাতায় জড়ানো, উচ্চ কিংবা করলা। মাঝে মাঝে লতাপাতা বাঁশের খুঁটিতে এমন উঁচু করে তুলে দিয়েছে, যেন তাবু খাটানো হয়েছে। নজর করে দেখলে দু-একটি পাকা ফলও চোখে পড়ে, যাদের গায়ে নিশ্চিত পাখির ঠোঁটের খোঁচা লেগেছে। কেননা, লাল বাঁচি উঁকি মারছে, খোঁচা খাওয়া ফাটলে। অথবা পাকা করলা আপনিই কেটে গিয়েছে।

অনেককাল থেকে দেখা, চরের ঐশ্বর্য দেখছি কম না। আরও কয়েক পা এগোতেই, প্রথমেই চোখে পড়লো, হলুদ আর সবুজে মেশানো বড়সড় একটি কুমড়ো। বেশ খানিকটা জায়গা জুড়েই কুমড়োর ক্ষেত। হলুদ ফুল ফুটে আছে এদিকে ওদিকে। কুমড়ো যদিও আর দেখতে পাচ্ছি না। ফুলে ফুলে মৌমাছির ভিড়। আর এই প্রথম চোখে পড়লো প্রজাপতি উড়ে বেড়াচ্ছে। সবুজে হলুদে মেশানো মাথার মাপের প্রজাপতিগুলোও কুমড়ো ফুলের আশেপাশে উড়ছে। ওরাও কি এই নিরালা চরের বাসিন্দা ? নাকি আমার মতনই হাতছানির সাড়া দিয়ে এসেছে ?

তারপরেই বেশ খানিকটা লম্বা জমি কোদালের ঘায়ে ফালা ফালা হয়ে পড়ে আছে। সম্ভবতঃ নতুন কোনো বীজ বপনের প্রস্তুতি পর্বের পর, প্রতীক্ষায় আছে। এখন আমার সামনে উত্তরের প্রায় শেষ সীমানার সেই একটা চালাঘর, সামনে দাঁড়িয়ে এক রোগা লম্বা কালো পুরুষ। আগেই যাকে দূর থেকে চোখে পড়েছিল। কিন্তু তখন বুঝতে পারিনি, খাটো ধুতি কোচা দিয়ে পরা, গায়ে শুকনো গামছা জড়ানো লোকটি দাঁড়িয়ে দাঁড়িয়ে জাল বুনছে। মাথার চুল উসকে-

খুকো, কিন্তু চরের বাকি পুরুষদের সঙ্গে একেবারে মিল নেই। চুলের মাপ বেশ বড়, আর তেলতেলে কালো কুচকুচে। গৌঁফ নেই, তবে বেশ কয়েকদিন ক্ষৌরকারের কাছে গিয়ে বসা হয়নি, সেটা বোঝা যাচ্ছে, খোঁচা খোঁচা গৌঁফ-দাড়ি দেখে। গলায় দু-ভাঁজ কষ্টির মালা।

আমার খেয়া পারানিয়া ভরত থেকে, এ পর্যন্ত যে-কজন পুরুষকে দেখা হয়েছে, তাদের সঙ্গে এ-মূর্তির অমিল স্পষ্ট। তবু ভালো করে দেখে নিলাম, লোকটির মাথার পিছনে টিকি আছে কী না। নেই। চালাঘরের ছোট বাপ খোলা। ভিতরে কী আছে, কিছু দেখা যায় না, কাঁচা মাটির মেঝে ছাড়া। দোতলা খড়ের চালের মাথার ওপরে খুঁধুলের লতাপাতা ছড়ানো। লতাপাতার ফাঁকে ফাঁকে দু-তিনটি ধুঁধুলও চোখে পড়ছে।

মূর্তি জাল বুনতে বুনতে আমার দিকে তাকালো। চোখে জিজ্ঞাসা নিয়ে আমার আপাদমস্তক দেখলো, তারপরেই জিজ্ঞাসা, ওপারে যাবেন, না বেড়াইতে আসছেন ?

যা ভেবেছিলাম। এ-মূর্তির সঙ্গে অল্প পুরুষদের অমিল। বচনেই জানা গেল, এ-মূর্তি বঙ্গ-সন্তান। শুধু বঙ্গ সন্তান না, বঙ্গ-আলের সন্তান, তবু এ বঙ্গের বচন আয়ত্তের চেটা স্পষ্ট। এতক্ষণ দেখে শুনে একবারও মনে হয়নি, এ চরে বাঙালীর দেখা পাওয়া যাবে। জাল বোনার সঙ্গে চেহারা দেখে, সম্পর্কটা কেবল জালের সঙ্গে, না কি এ চরের ভূমির সঙ্গেও বুঝতে পারছি না। বাঁশের খুঁটিতে একটি নোঁকা বাঁধা রয়েছে দেখতে পাচ্ছি। জবাব দিলাম, বেড়াতেই এসেছি। তোমরাও কি এ চরে থাকো নাকি ?

জাল বুননকারি জবাব দেবার আগেই, ঘরের ভিতর থেকে পুরুষের স্বর ভেসে এলো, কার লগে কথা কও কুতুদা ?

ঘরের ভিতরে মাঘুয আছে, এবং তার আওয়াজে বঙ্গ-আলের বচন আরও স্পষ্ট। কিন্তু কুতুও কি নাম হয় ? অবিশ্বি এ-সব নামের হাদিস খুঁজতে গেলে, থই পাওয়া যাবে না। কুতু জবাব দিল, এক বাবু বেড়াইতে আসছে, হুগলির থেকা।

তাহলে, কুতু কেবল জাল বুনছিল না, বা পূবদিকেই মুখ করেছিল না। আমি যে পশ্চিম কুল থেকে চরে এসেছি, সেটি ঠিক লক্ষ্য রেখেছে। ঘরের ভিতরের লোকের জিজ্ঞাসার জবাব দিয়ে কুতু আমার দিকে ফিরে বললো, 'না বাবু, আমরা চরে থাকি না, ওই মাউড়ারাই থাকে।'

আপত্তির শব্দটা কানে খট করে লাগলো। যদিও জানি, আমার এক কথাতাই, বাঙালি ভিন্ন প্রদেশের মানুষ সম্পর্কে, 'মাউড়া' শব্দটি ত্যাগ করবে না। বিশেষ করে, দেশ বিভাগের পরে যারা এ-বঙ্গে আগমন করেছে, আমাদের পাশের প্রদেশের প্রতিবেশীদের তারা উক্ত বিশেষণেই পরিচয় দিয়ে থাকে। তবে, কেবলমাত্র পূর্ব দেশের লোকদের দোষ দিয়েই বা কী হবে। এখনও তো, খাস এ-বঙ্গের সাধারণের মুখে, কথায় কথায় 'মেড়ো' বিশেষণটি শুনতে পাই। আর এ বিশেষণের মধ্যে যে কেবল তুচ্ছ-তাচ্ছলিই আছে, তা না। আমার কানে, বরাবরই ওইসব আখ্যায় মধ্যে কেমন একটা বিদ্বেষের সুর বাজে। তবে শ্রাক বোকার শত্রু কম। আমি অনায়াসেই শ্রাক হয়ে গেলাম, জিজ্ঞেস করলাম, 'মাউড়া মানে? তারা আবার কারা?'

কুতুর হাতের কাঠি দ্রুত জাপ বুন চলেছে। তার মধ্যেই, সে আমার অজ্ঞতায় হাঙ্গা সযরণ করতে পারলো না, বললো, 'মাউড়া আবার কারে কয় বাবু, জানেন না? ওই যে দেখতেছেন, সব চাষ-আবাদ করতেছে, অদেরই মাউড়া কয়। আমরা কই মাউড়া, আপনেরা কন ম্যাড়ো।'

ম্যাড়ো মানে মেড়ো, সেটা বুঝতে কোনো অসুবিধা নেই। কুতু আমাকে সহজেই পশ্চিমবঙ্গবাসী ধরে নিয়েছে। পশ্চিমবঙ্গবাসী তো বটেই, তবু আমিও পূর্বদেশ থেকেই এ-বঙ্গে এসেছি। তবু আমি না বলে পারলাম না, 'আমার ধারণা ওরা বিহারের লোক, বিহারী।'

'হ, বাবু যারে কয় কল্প, তার নামই লাউ বোঝলেন না? ঘর থেকে বেরিয়ে এসে অশ্রু মুক্তি দাঁত দেখিয়ে হেসে বললো, 'আমরা কই মাউড়া, ঘটির কয় ম্যাড়ো, আবার খোট্টাও কয় অনেক লোকে। আপনে কী যান কইলেন কথাটা?'

বললাম, 'বিহারী।'

'ওর বোঝেন, যাই কন, সবই এক।' ঘরের থেকে বেরিয়ে আসা লোকটি বললো।

বুঝলাম, এখানে আমার জ্ঞানবাবু হয়ে কোনো লাভ নেই। কহু আর লাউয়ে যখন তফাত নেই, তখন ওইসব বিশেষণ বা আখ্যায় বা কী দোষ? প্রাদেশিকতার দোষ বিদ্বেষ? বলতে গেলে, কোন কথা কোন দিকে গড়াবে, কে জানে। দেখলাম, ঘর থেকে যে বেরিয়ে এলো, কুতুদার থেকে বয়স তার নিশ্চয়ই কিছু কম। গায়ে কিছু নেই। পরনের খাটো ধুতিটি হাঁটুর ওপর তোলা। বেঁটে কালো গাট্টাগোষ্ঠী চেহারা। গৌন্দ-নাড়ি কামানো মুখ। এর মাথার টেরিটি স্পষ্ট। কুতুর মতনই ছুঁতাজ কণ্ঠির মালা, মোটা গলায় যেন চেপে বসেছে। জিজ্ঞেস করলাম, 'তোমরা চরে থাকো না তো, এ ঘরটা কাদের?'

'ঘর আমাদেরই।' কুতু জবাব দিল, 'বোঝলেন না, একটা ঘরটির না থাকলে চলে না। দখল রাখতে হইলে, একটা ঘর থাকা দরকার।' কথাগুলো কেমন যেন বাঁকাচোরা। জিজ্ঞেস করলাম, 'কিসের দখল?'

'ক্যান, এই চরের? কালো গাট্টাগোষ্ঠী অন্নবয়সী জবাব দিল। হাত তুলে দক্ষিণে দেখিয়ে বললো, 'ওই ছাখেন, অরাও কেমন ঘর দরজা কইরা জুতজাত কইরা বসছে। থাকি না থাকি, ঘর একটা রাখতেই হয়।'

কুতু বললো, 'দাওয়া বোঝেন ও বাবু, বিষ্টি বাদলার কথা কই। তখন মাথা গৌঁজার একটা ঠাঁই না থাকলে চলে না। তারপরে বোঝেন, গরমের সময় রোদে থাকিও যায় না। গাছপালাও নাই।'

দখল রাখার কথা থেকে, কুতুর কথায় যুক্তি বেশি। জিজ্ঞেস করলাম, 'তবে তোমরা থাকো কোথায়?'

'ওই-ওইখানে।' কুতু হালিশহরের কিঞ্চিৎ উত্তর দিকে হাত তুলে দেখালো, 'হালিশহরের শাশানখোলা, তারপরে আশ্রম, তারপরে তেঁতুল-তলার মোড় খেইকা উত্তরে গেলে, বাঁয়ে একেবারে গঙ্গার পাড়়ে,

‘আমরা কয়েক ঘর পাকিস্তানের লোক থাকি।’

কুতুর জায়গার বর্ণনা কিছুই আমার অচেনা না। কিন্তু সে যেভাবে আঙুল তুলে দেখালো, যেন ঘরই দেখাচ্ছে। আমি কোন-ছার, দিব্যদৃষ্টিসম্পন্ন যারা দিনেরবেলাও আকাশের তারা দেখতে পায়, তাদের পক্ষেও কুতুর অদৃশি স্বকেতের পক্ষে, তাদের কয়েক ঘর চিনে ওঠা সম্ভব না। হালিশহরের সদর রাস্তা বাঁক নিয়ে, তেঁতুলতলার মোড় চলে গিয়েছে অনেকখানি পূবে। সেখান থেকে আরও উত্তরে গিয়ে, বাঁদিকে গঙ্গার ধারে যেতে গেলে, বেশ খানিকটা পথ যেতে হয়। যতোদূর মনে পড়ে, বাঁদিকে পূর্ববঙ্গবাসীদের অনেক কাঁচা-পাকা ঘর উঠছে রাস্তার বাঁ-ধারেই। যাকে বলে কলোনি, সেইরকম আবাসস্থল, বোধহয় সেই কলোনির কিছু নামও আছে। আমি বললাম, ‘ওদিকে তো বাগের মোড়।’

‘হ হ, ঠিক কইছেন, বাগের মোড়ের কাছেই।’ অল্পবয়সী গাট্টা-গোটা বলে উঠল, ‘বাবু তো দেখি সবই জানেন। আপনাদের বাড়ি কোনখানে? কাঁচরাপাড়া না কল্যাণী নাকি?’

বাগের মোড় কেমন করে বাগের মোড় হয়, তা আমার জানা নেই, তবে অল্পবয়সী জোয়ানের জিজ্ঞাসায় ত্রুটি হয়নি। এক কথায় যদি বাগের মোড়ের কথা বলতে পারি, তা হলে, তার কাছেপিঠের বাসিন্দা হওয়া বিচিত্র কী? বাগের মোড় হলো এমন একটি জায়গা, যার পূব-দিকের রাস্তা সোজা চলে গিয়েছে কাঁচরাপাড়া ইন্ডিশনের দিকে। আর সোজা রাস্তাটা কয়েকশো গজ গেলেই, পুল পেরিয়ে নদীয়া জেলার কল্যাণী নগর। গাড়ি চলাচলের মতন পাকা সেতুর নীচে প্রায় শুকনো খাত। শুনেছি ওইটি ছিল একদা যমুনা নদী। বর্ষাকালে শুকনো খাতে জল দেখা যায় বটে, এই সময়ে লক্ষ্য করলে ক্ষীণ একটি জলের ধারা চোখে পড়ে। তবে সহজে না। বিস্তর গাছপালা ঝোপঝাড়ের আড়ালে আবাডালে ভাঙাচোরা নানা মাপের আয়নার মতন।

পূবে গেলে, কাঁচরাপাড়া ইন্ডিশন অবিশিষ্ট যমুনার এপারেই। ইন্ডিশন ছাড়িয়ে গেলে যমুনার খাতের ওপর রেল লাইনের সাঁকো।

অথচ, আদি কাঁচরাপাড়া নদীয়া জেলার মধ্যে। বাগের মোড় ছাড়িয়ে গাড়ি চলাচলের পাকা সাঁকো পেরিয়ে কয়েক পা গেলে, বাঁ দিকে মোড় নিয়ে, আসল কাঁচরাপাড়া গ্রামের রাস্তা চলে গিয়েছে। আসল নাম কাঞ্চনপল্লী, এটি কেতাবী জ্ঞান। কাঞ্চনপল্লী বলেই কি অনেকে ‘কাঁচরাপাড়া’ উচ্চারণ করে? জানি না, কিন্তু অনেকের মুখেই নামটি উচ্চারিত হতে শুনেছি।

কাঁচরাপাড়া গ্রামের রাস্তাটা চোখের সামনে ভেসে উঠছে। এটা কোনো কেতাবী ব্যাপার না, নিজের চোখেই দেখা। কল্যাণী যেতে গিয়ে, পশ্চিমের রাস্তায় খানিকটা গেলেই, ডানদিকে চোখে পড়ে সেই বিশাল বিখ্যাত মন্দির। বিখ্যাত বলছি বটে, হয়ত অনেকে জানে না, চোখেও দেখেনি। গ্রামের লোকেরা বলে কেঈরায়ের মন্দির। এ হলো ভাব-ভালবাসার সম্বোধন, ‘কেঈরায়’। আসলে কৃষ্ণরায়। মন্দিরটি আটচাল, উঠোনটা আগাছায় ভরতি। মন্দিরের সংস্কার বলতে কিছু চোখে পড়েনি। শ্রাওলা ধরা গোটা দেহে, কোথাও কোথাও পলেস্তারাও খসেছে। বিগ্রহের নামেই মন্দিরের নাম। এতো উঁচু মন্দির আর কোথাও দেখেছি, সহজে মনে করতে পারি না। ভিতরে বেদীটিও তেমন উঁচু। মন্দিরের সন তারিখ মনে করতে পারি না। সিংহদরজা, নহবতখানা, চারদিকে উঁচু দেওয়াল দিয়ে ঘেরা।

আমাকে সেই রাস্তাটি টেনে নিয়ে গিয়েছিল কাঁচরাপাড়ার গ্রামের আরও ভিতরে, যেখানে দেখেছিলাম কবি ঈশ্বর গুপ্তের একটি ছোট-খাটো স্মৃতিস্তম্ভ। তিনি সেই গ্রামের লোক ছিলেন। কবি তো বটেই, তাঁর সংবাদ প্রভাকরের খ্যাতি বোধহয় আরও বেশি ছিল। কবির আকর্ষণই বেশি ছিল, কৃষ্ণরায়ের মন্দিরটা ফাউ হিসাবে দর্শন হয়ে গিয়েছিল। আসলে ঈশ্বর গুপ্তের জন্মস্থান দেখতে গিয়েছিলাম। নিরাল্য নিরুন্ম গ্রাম। এখন কেমন চেহারা দাঁড়িয়েছে জানি না। সাধারণ গ্রামবাসীর পক্ষে ঈশ্বর গুপ্তের নাম জানার কথা না। মাঠে-ঘাটে কাজ করে, এমন কারোকে জিজ্ঞেস করেও কবির জন্মভিটে খুঁজে পাইনি। অবশেষে ধুতিপরা গায়ে গেঞ্জি এক শ্রোঁচ ব্যক্তি

একটা ঝোপঝাড়ের দিকে আঙুল দেখিয়ে বলেছিলেন, 'ওখানে একটা মন্দির মতন আছে, দেখুন। আর কিছু আছে বলে তো জানিনে।'

হয়তো ছুটি-ছাটার দিনে গেলে গ্রামের উৎসাহী ভরুগণদের দেখা পেতাম। তারাই সব দেখিয়ে দিতে পারতো। কিন্তু আমার হাত-ছানির রকম সকম আলাদা। কখন কোথায় ডাক-পড়ে, নিজেও জানতে পারি না। অমনি ঘরের আঙিনা ছেড়ে বেরিয়ে পড়ি। সংসারে এমন অকাজের লোক সহজে জোট না। আজ যেমন ত্রিবেণীর ডাকে বেরিয়ে পড়ে হঠাৎ চরের হাতছানি নিশি পাওয়ার মতন নামিয়ে নিয়ে এলো বাস থেকে। কিসের ডাকে ঘুরিফিরি, কেন, কিংবা কার খোঁজে, নিজেও সব সময়ে জানতে পারি না। যদিও নারী নই, তবু ছেলেবেলায় শোনা সেই গানটার মতন মনে হয়, 'আমি নারী হয়ে কত পারি সহিতে/ আর বাঁশী বাজাইস না কালা রাতে/ শুনিয়া বাঁশীর গান মন করে আনচান/ গৃহকাঁর্ব রয় না আমার স্মৃতিতে।...'

সে তো না হয় রাধা নামের সাধা বাঁশীর ডাক। অভিসারের হাতছানি। কিন্তু আমার সময় নেই, অসময় নেই, বৃকের ভিতরেই যেন কে বাঁশী বাজিয়ে ওঠে। ওখন রইলো তোমার চার দেওয়াল। সে তো আমাকে বেঁধে নিয়ে যায় না, পাখির মতন ডানায কাঁপন ধরিয়ে দেয়। মনে হয়, সীমাহীন আকাশের নীচে কোথায় কী মহাশব্দ চলছে, সেখান থেকে কে আমাকে ডাক দিচ্ছে। আমি তারই খোঁজে বেরিয়ে পড়ি। অথচ সেই ছেলেবেলা থেকে এতো ঘুরেও ওকে খুঁজে পেলাম না।

দেখেছিলাম, বনশিউলির ঝাড়ের ফাঁকে ফাঁকে একটি স্মৃতিস্তম্ভ। ডালে ডালে পাতায় পাতায় শূন্যোপেকার ভিড়। বড় ভয়! সাহেবদের সমাধির মতন চৌকো ভিত্তি বেদী থেকে সূচালো গম্বুজ উঠেছে। গম্বুজ বললেও অস্তু একটা ছবি ভেসে ওঠে। অনেকটা নীর্জার মাথার মতন। ভিত্তি বেদীর গায়ে, খেতপাথরে কিছু লেখা ছিল, এখন আর মনে করতে পারছি না। লোকের কাছে বলতে লজ্জা করে। সরস্বতী ঠাকরুণ আমাকে নিয়ে খেলা করিয়ে বেড়াবেন,

কাজে লাগলেন না। তবে এইটুকু স্মরণ করতে পারি, দৈনিক কাগজের পাতায় লিখেছিলাম, ছাপাও হয়েছিল। আজ আর কে তা মনে করে রেখেছে।

কিন্তু একটি কথা মনে এসেছিল। ঈশ্বর গুপ্তই প্রথম তরুণ কবি বঙ্কিমচন্দ্রের প্রথম কবিতাটি ছাপিয়েছিলেন তাঁর কাগজে। নৈহাটি আর কাঁচরাপাড়া বেশি দুখেও না। তবে উভয়ের দেখা-সাক্ষাৎটা বোধহয় কলকাতাতেই হয়েছিল।

চরে দাঁড়িয়ে মূলের কুলের ভাবনা। এখন আমার এসব আর চিন্তার দরকার কী? অল্পবয়সী গাঁট্রাগোঁট্রা, কুতুর সঙ্গীকে বললাম, 'না, আমি কল্যাণী কাঁচরাপাড়া কোথাও থাকি না। তবে ওসব জায়গায় বোরাঘুরি করা আছে। কিন্তু তোমাদের ঘর যেখানে দেখাচ্ছ, সেখানে গঙ্গার ধারে তো বিরাট ইটের ভাটা।'

'শোনছস নি রে বটা, বাবুর সব নখদগ্ননে।' কুতু জাল বোনা থামিয়ে হেসে বললো, তাকালো আমার দিকে, 'ঠিক কইছেন বাবু। তয় বাবু, ইটের ভাটা হইল উত্তরে। দক্ষিণে যে সোঁতভাসি খাড়ি আছে, আমাদের ঘর তার এই পারে। ওই যে ছাখেন আশ্রম, তার কাছাকাছি। ওই যে, ওই ছাখেন আমাদের পাড়া।'

হালিশহরের সবটাই ঘোরা আছে, আশ্রমের মন্দিরের চূড়াটাও দূর থেকে চোখে পড়ে। কিন্তু কুতুদের পাড়াটা আমার পক্ষে চোখে দেখে ঠাঁহর করা মুশকিল। তবে জায়গার অবস্থানটা মোটামুটি বুঝে নিয়েছি। আমি কিছু জিজ্ঞেস করবার আগেই, এবার বটা নামে বটের গুড়ির মতোই গাঁট্রাগোঁট্রা যুবক হেসে জিজ্ঞেস করল, 'বাবু কী করেন?'

তা হলেই তো মুশকিল! কা করি? বলতে পারি, তোমাদেরই আশেপাশে ঘুরিফিরি। কেন? না, খুঁজে ফিরি। কী খুঁজে ফেরেন? ওখানেই ঠেক। কারণ, এই জবাবাটাই জানা নেই। বললাম, 'কিছুই করি না।'

আমার জবাব শুনে কুতু আর বটা নিজেদের সঙ্গে চোখাচোখি করে হাসল। দেখলেই বোঝা যায়, ওদের হাসিতে যেমন কৌতুক তেমনি

অবিশ্বাস। কুত্ব বললো, 'আরে বটা, সব কথা কি সব সময়ে কণ্ডী
যায়? কাজের মানুষ দেখলে চিনা যায়।'

আমাকে দেখে তাহলে কাজের মানুষ বলে চেনা যায়? কুত্ব
এমন নজর কোথায় পেলো? হেসে বললাম, 'কাজের মানুষ হলে কি
এ সময়ে চরে বেড়াতে আসি?'

'সেই কথা কি বাবু কখন যায়?' কুত্ব বললো, 'কে যে কোন
কাজে কোনখানে ঘুরে বেড়াইতেছে, কে কইতে পারে। সংসারে এমুন
মানুষ তো দেখি না, কিছু করে না।'

মনে মনে ভাবলাম, বেকাররা তা হলে কী করে? কিন্তু জিজ্ঞেস
করাটা খুব বিবেচনার কাজ হবে না। কারণ তারাও কাজের কাজ
কিছু না করুক, কিছু যে করে, তা তো নিজের চোখেই দেখতে পাই।
আসলে কুত্ব তো সংসারের আসল কথায় কিছু ভুল করেনি। কিছু
না করার মতন নিপাট মানুষ কেউ নেই। বোধহয় শিশু বা পাগলও
নেই।

'বাবুরে একটা কথা জিগাই।' বটা যেন তার কালো কুচকুচে
চোখের তারায় কেমন একটু রহস্যের ঝিলিক এনে, হেসে বললো,
'আপনে কি পট কমিশনে চাকরি করেন?'

পটকমিশন? সেটি আবার কোন সংস্থা? মনে মনে বারকয়েক
কথাটা আউড়ে, অঙ্ককার মস্তিষ্কে বিজলি হানা আলোর ঝিলিক দিল।
পট কমিশন কি পোর্ট কমিশনার্সের কথা সে জিজ্ঞেস করছে? জিজ্ঞেস
করলাম, 'তুমি কি কোন অফিসের কথা বলছো?'

'হ বাবু, কইলকাতায় বন্দরের আপিস আছে না? পট কমিশন
যার নাম? তার কথাই কই।' বটার চোখের রহস্যের ঝিলিকে এখন
ব্যগ্র জিজ্ঞাসা।

হঠাৎ পোর্ট কমিশনার্সে চাকরির কথা কেন বটার মনে এলো?
গঙ্গার দু-পাশে এতো কলকারখানা। সেসব ছেড়ে একেবারে
'কইলকাতার বন্দরের আপিস'-এর কথা কেন? তার মুখ থেকেই এই
অপার রহস্যের সন্ধান নেবার জন্ম জিজ্ঞেস করলাম, 'কেন, সেই অফিসের

কথা জিজ্ঞেস করছো কেন?'

বটা আর কুত্ব আবার নিজেদের দিকে চোখাচোখি করলো। কুত্ব
যেন একটু বেশি মাত্রায় বিনোত হেসে বললো, 'কথাটা হইল বাবু, শুনছি
এই চরের মালিক নাকি পট কমিশন। হ্যাটকোট পরা এক বাবু ছই-
একবার এই চরে ঘুইরা গেছে। চরের নাকি মাপজোক হবে, খাজনা
বসাইবে। তাই ভাবলাম, আপনে বুঝি সেই আপিস থেকেই আসছেন।'

সে-যার চিন্তায়। দোষ দেওয়া যায় না। এ ব্যাপারে, আমার
থেকে, এরাই খোঁজ-খবর বেশি রাখে। সংসারের কাজে লাগে, এমন
চিন্তা তো সহজে মনে আসে না। গঙ্গার বৃকে জেগে ওঠা, প্রকৃতির
আপন হাতের দানও যে অস্ত্রের মালিকানা আর খবরদারিতে থাকতে
পারে, মনে আসেনি। সংসারের এক কূল থেকে আর এক কূলে
ঘুরে বেড়ালেও, বাস্তবকে এড়িয়ে করে জীবনধারণ সম্ভব হয়েছে।
জীবন তো ছই কূলের টানটানিতে চলেছে। হেসে বললাম, 'কিন্তু
আমি তো হ্যাটকোট পরে আসিনি।'

'তবু আপনের বাবুদের কথা আলাদা।' বটা বললো।

তা অবিশ্বিষ্টিক। বাবুরা বড় সহজ প্রাণী নন। হ্যাটকোটই
চাপান, আর ধুতি পাঞ্জাবীই পরন, জাতে-গোত্রে এক। জিজ্ঞেস
করলাম, 'তা টুপি মাথায় বাবু আর কী বলেছেন শুনি?'

বটা আর কুত্ব পরস্পরের দিকে এবার অবাক চোখে তাকালো।
বটা বললো, 'সেই বাবুর মাথায় তো টুপি ছিল না বাবু।'

কী ব্যাজের কথা। হ্যাটকোট বললেই কি হ্যাট বুঝতে হবে
নাকি? ওটা হলো একটা কথার কথা, হ্যাট কোট পরা। হ্যাট
বললেই যদি টুপি বুঝতে হয়, তবে তো বাবু আপনি খুবই বুঝছেন।
যে নিন পট কমিশনের সেই বাবু আপনাদের কথায় স্মট বট পরে
এসেছিলেন। এক কথায় সাহেব সেজে। আমি ভুল শুধরে নিয়ে
বললাম, 'ও! তা বাবু আর কী বলেছেন?'

'আর কিছু না।' কুত্ব বললো, 'শোনলাম, চর জরীপ হবে,
খাজনা বসবে। তখনই আসল বিলিবাটা হবে।'

কুতু আর বটার চিন্তা অনেক গভীরে। পট কমিশন, হ্যাটকোট পরা বাবু, চরের জমি জরীপ, বিলিবার্টা, খাজনা, তাদের মাথায় সেই চিন্তা। আমাকে দেখে তাদের ধন্দ আর সন্দেহটা সেখানেই লেগেছে। অশ্রু কথা জিজ্ঞেস করবার আগে আমি তাদের ধন্দ ঘোচাবার জন্ত বললাম, ‘না, তোমরা নিশ্চিত থাকতে পারো, আমি কোনো আপিস-টাপিসে চাকরি করি না। এমন মন করলো, তাই চরে একবার বেড়াতে এলাম। তা, এখন তোমাদের বিলিবার্টা কী রকম?’

‘এখন তো বাবু বিলিবার্টার নামে কিছু নাই।’ বটা জবাব দিল, ‘আমরা এই ছাশে যখন আসছি, তখন থেকেই দেখি, ওই মাউড়ারাই চর দখল কইরা রইছে।’

আবার সেই মাউড়া। আমারই বা আবার ঝাকা হতে দোষ কী? জিজ্ঞেস করলাম, ‘মাউড়া মানে?’

‘মাউরা মানে মাউরা, আপনারা যারে ম্যাড়ো কন।’ বটা তার বত্রিশ পাটি শাদা দাঁত দেখিয়ে বললো।

আমি হেসেই বললাম, ‘কেন, ওদের তো হিন্দুস্থানীও বলা যায়।’

‘হ, এইটা ঠিক কইছেন বাবু।’ কুতু বললো, ‘হিন্দুস্থানীও কওয়া যায়।’

আমি আবার বললাম, ‘তোমরাও তো হিন্দুস্থানী। না কি, পাকিস্তানী?’

কুতু আর বটা দুজনেই পরিহাস ভেবে হাস্য করলো। বটা বললো, ‘কথাটা বাবু ঠিক কইছেন। আপনোগো এই ছাশের লোকেরা আমাদের পাকিস্তানি কয়।’

হ্যাঁ, এখনো এ পাপটা সমাজের পাকে পাকে জড়িয়ে আছে। এই পঞ্চাশ দশক থেকে ষাটের বা সত্তরের দশকে কী দাঁড়াবে জানি না। বললাম, ‘ও কথা বোকারা কয়। আসলে তো তোমরা পাকিস্তান ছেড়ে হিন্দুস্থানে এসেছো। তোমরাও হিন্দুস্থানী।’

‘এইটা আবার কী কন বাবু?’ কুতুর মুখে পরিহাসেরই হাসি, বললো, ‘পাকিস্তান ছাইড়া হিন্দুস্থানে আসছি, কিন্তু আমরা

তো বাঙালী।’

কুতু আমাকে ধরতাইটা নিজেই ধরিয়ে দিল। হেসে বললাম, ‘তোমরা যদি বাঙালী হতে পারো, তবে চরের ওই লোকগুলোকে বিহারী বলবে না কেন?’

কুতু আর বটা দুজনেরই হাসি মুখে এবার অপ্রস্তুত ভাব দেখা দিল। আমি সময় না দিয়ে আবার বললাম, ‘বটার যখন তোমাদের বাঙাল বলে, তোমাদের কি শুনেত ভালো লাগে?’

‘তা তো লাগে না বাবু।’ কুতু জবাব দিল।

বটা বলে উঠলো, ‘আমার তো হালার রগে রক্ত উইঠ্যা যায়।’

আমি হেসে বললাম, ‘তা হলেই ভেবে দেখ, তোমরা যদি ওদের মাউড়া বল, আর এদেশী বাঙালীরা যদি মেড়া খোটা বলে, তাহলে ওদেরও রগে রক্ত উঠে যেতে পারে।’

জোকের মুখে হুন্, এমন বলবো না, কিন্তু বঙ্গালের সন্তান ছুটিই হঠাৎ কোনো কথা খুঁজে পেলো না। বটার ‘রগে রক্ত ওঠা’ কথাটা আমার নতুন লেগেছে। মাথার বদলে রগ। কিন্তু এ বিষয়টা নিয়ে আর কথা বাক্যব্যয় উচিত না। কুতু বটারাই যদি মন থেকে মনে নিতে পারে, আমি এতেই সার্থক মনে করবো। আর বেশি জ্ঞানবাবুর ছদ্মবেশ নিয়ে থাকা যাচ্ছে না। আমি জিজ্ঞেস করলাম, ‘তা গোড়া থেকেই যদি দেখে থাকো, বিহারীরা এই চরের দখল নিয়েছে, তবে তোমরা এখানে কী কর?’

‘আমরা বাবু ছাশে থাকতে মাছ ধরতাম, গঙ্গায়ও মাছ ধরি।’ কুতু বললো, ‘তারপরে কিছু লোক আমাদের সলাপারামর্শ দিল, এই চরে আমরাই বা দখল নিমু না ক্যান। ভাবলাম, হ কথাটা অগাধ্য তো কিছু কয় নাই। আমরা ছাশের ঘর-দরজা সব ছাইড়া আসছি, আর এই চরে মাউড়ারা।’ কথাটা শেষ না করে কুতু অশ্রুস্তিতে হেসে উঠলো, ‘ওই হিন্দুস্থানীগো কথা কই, অরা ক্যান চর দখল কইরা থাকব? আমরাও আইসা ভাগ চাইলাম।’

কাজটা উচিত কি অসুচিত হয়েছে, সেই বিচার আমার কর্ম না।

দখল দাখিল শব্দগুলোর মধ্যেই যেন জীবনের একটা অস্তিত্বের অস্তিত্বের চিত্র চরিত্র বর্তমান। অথচ আর কটকচালি বলে, সব ব্যাপারটাকে উড়িয়ে দিলে, সারা পৃথিবীর সিংহাসনে আজ যারা রং-বেরঙের রাজ্য চালাচ্ছে, তারা আমার দিকে আঙুল দেখিয়ে হাসবে। গঙ্গার বৃক্ক এই একফালি চড়া তো সামান্য কথা। পৃথিবীর যাবত চর নিয়ে কতো যুদ্ধবিগ্রহ, খুনোখুনি আর কটকচালি চলছে। এই গ্রহের মহাদেশগুলোও তো এক রকমের চর। সেখানেও দখল নিয়ে, এ গুকে কতোরকমের সলাপারামর্শ দিচ্ছে, তার বয়ানের যতো চাতুরি, সব সংবাদপত্রের পাতায়। অতএব এ-চর নিয়ে সবাই নির্বিকার সদানন্দ হয়ে থাকবে, তা কেমন করে হয়।

মনটা বিমর্ষ হয়ে গেল। এই নিরিবিচলি চরটা ভেবেছিলাম, তাঁটার উজানে ভাসে, জোয়ারে সমুদ্রগামী হয়। আপনাতে আপনি, নদীর মাঝখানে স্নুখে আছে। এখন দেখছি, দখলের লড়াইয়ে সে নিরিবিচলি স্নুখে নেই। আমি সহজভাবেই জিজ্ঞেস করলাম, 'তা, ভাগ পেয়ে গেলো ?'

'সহজে কি আর ভাগ পাওয়া যায় বাবু?' বটা বললো, 'জোর কইরা আদায় করতে হয়।'

কুতু বললো, 'সে বাবু অনেক ব্যাপার। লাঠিসোটা লইয়া মারামারি হওনের যোগাড়। হিন্দুস্থানীরা দিব না, আমরাও ছাড়ুদ না। তারপরে এই গার ওই পারের হিন্দুস্থানী বাঙালীরা এই চরে বইসা ঠিক করল, আপোবে মামলা মিটাইল। আমাগো চার ঘর জাইলাগো এই জমিটা দিছে।' বলে সে লম্বা কোদালে কোপানো ফালা ফালা জমিটা হাত তুলে দেখিয়ে দিল। আবার বললো, 'তবু তো কিছুটা পাইছি।'

দখলের লড়াইটা ধর্মের কী না, বুঝতে পারছি না। চার ঘর বাস্তুহারার পক্ষে এই একফালি এমন কিছু না। সিংহভাগটা এখনও ভরতদেরই হাতে। তবে কুতুরা বাঙালী আর বাস্তুহারী বলেই তাদের দাবী গ্রাহ হব কী না, সেই জিজ্ঞাসার জবাবটা ভরতরাই দিতে পারে।

জীবনধারণের উপায় থাকলে, ওরাও কি এই চরের বৃক্ক এসে বসতো ? দেশ ভাগভাগির জন্তু না হতে পারে, ওরাও হয়তো বাস্তুহারী। কুতু-পাণ্ডবের লড়াই এটা না। তবু মানতে হবে, ভরতরাই বোধহয় প্রথম চরে এসে উঠেছিল। তাদের দাবীটাই আগে মানতে হয়।

'তিরবেণীর চরেও বাবু আমরা কিছু দখল লইছি।' বটা বললো। কুতু শুধরে দিয়ে বললো, 'আমরা না আমাগো ঠাশের লোকেরা নিচ্ছে।'

দখল হোক, আর জবরদস্তি হোক, মিথ্যা কথার বালাই নেই। সহজ স্বীকারোক্তি। দূর থেকে নদীর বৃক্ক ভাসমান সবুজ রেখা দেখে হাতছানি পাই, অথচ তার বৃক্কের খবর আলাদা। আমি যখন মন নিয়েই ঘুরে বেড়াই, মেদিনীর মূল্য প্রাণের অধিক। সেইজন্মই আদি থেকে শুনতে হয়, 'বিনায়ুদ্ধে নাহি দিব সূচ্যগ্র মেদিনী।'

জিজ্ঞেস করলাম, 'তা জমিটা এমন কোদাল কুপিয়ে ফেলে রেখেছো কেন ? চাষ করবে না কিছু ?'

'আর কইয়েন না বাবু।' কুতু হতাশায় হেসে বললো, 'বোঝেন তো, এই চর অখনো ধানচাষের মতন হয় নাই। বর্ষাকালে জলে অখনো অনেকখানি ডুইবা যায়। সোঁতের টানেই সব ভাসাইয়া লইয়া যাইব। রবি চাষের ঘাতঘোত আমরা কম বুঝি। গরমের সময় ভুট্টা কিছু করছিলাম, ত সত্য কথা বাবু, আগে হিন্দুস্থানীদের মতন পারি নাই। এইবারেও নানান ধামেলায় দেরি হইয়া গেছে। মুন্সুরির বীজ দিছি, সামনে গেলে ঠাখবেন এ্যাতটু এ্যাতটু চারা গজাইছে। কপাল মন্দ, বোঝলেন না ? অগো ছোলার চারা ঠাখেন, বৃটি দেখা দিছে।'

কুতুর মুখে হতাশা, গলার স্বরে আক্ষেপ। বটা বললো, 'একটু বিষ্টি হইলে ভাল, তার তো কোন লক্ষণ দেখি না।'

একটা জায়গায় বোধহয় সবাই সমান। রাজ্য জুড়ে ভূমি পেলেই হয় না, তার দান চাই। কুতু বললো, 'তয় হ, একটা কথা কি বাবু আমরা মাছ ধরি। ওই যে ঠাখেন, বান্ধাখান্দি জাল ফালাইছি। জাল টান দিয়া এই চরেই তুলি।'

পূর্বদিকে নদীর বুকে তাকিয়ে দেখি, পূর্ব-পশ্চিমে, সারি সারি খান-কয়েক মাঝারি মাপের লোহার ড্রাম ভাসছে। দু-জায়গায় ছোটো বাঁশের ডগা দক্ষিণ মুখ করে এমনভাবে ভেসে আছে আর কাঁপছে, যেন ছোটো সাপের ফণা মাথা তুলে রয়েছে।

‘তুমি আর কইয়ো না কুতুদা!’ বটা বলে উঠলো, ‘উজানের টান শেষ হইয়া আসল, তারপরে জাল বান্ধলা। এই উজানে কি আর জাল গুটাইতে পারবা?’

কুতু হাতের আধবোনা বাঁকি জালে একটা বাঁকুনি দিল। মুখে তার অশ্রুপ্তের হাসি। বললো, ‘ইচ্ছা কইরা কি আর দেরি করছিরে বটা? দেখলি তো, পরতাপবাবু ঘরের রোয়াক ছাইড়া লামতে চায় না।’

কথা কোন দিকে বইছে, ঠিক ধরতে পারলাম না। আমার ধরবার কথাও না, অতএব কিছু জিজ্ঞাসা করা চলে না। কিন্তু আমার চোখ যেহেতু কুতুর দিকে ছিল, সে কেমন অস্বস্তি হাসলো, নিজের থেকেই বললো, পরতাপ সা, বোঝলেন নি বাবু কাঁচরাপাড়া নৈহাটিতে ব্যবসা করে। মাছের জন্তু আমাগো আগাম টাকা দেয়। মহাজন যারে কয় আর কি। উজানের গোন যায়গা, এই কথাটা সে না বুঝলে, তারে তো আর খ্যাদাইয়া দিতে পারি না। শত হইলেও খাতক তো।’

মাউড়া বলুক, সলাপারামর্শে চরের জমির দখলই নিক, তবু খাতক তো! এরপরে আর ভেঙ্গে বলতে হয় না, আগামের আর এক নাম দাদন। চরের এই জমিটুকুর চার ঘরের সম্বলে কিছুই না। নির্ভর এই গঙ্গার ওপর। আগাম পেটে চলে যায়, মহাজন রোয়াক ছেড়ে নামতে চায় না। কুতুর মুখের হাসিটুকু গরমডাঙ্গার জলের ফোঁটার মতন শুষ্ক নিয়েছে।

জমি দখলের লড়াইয়ের কথা শুনে মনটা বিমর্ষ হয়েছিল। এখন এই শুকনো মুখ, অসহায় চোখ খাতকের মুখের দিকে তাকিয়ে নিজের মুখে বাক্য সরছে না। জলে এখনও উজানের টান। চর ভাসে

বিপরীতে। মূলে আর অকূলে এবার নিরিবিলাি স্নুখের চর তুমিই বলো কোথায় যাই?

‘কুতুদা, এই গোনে জাল টানা হইব না, বাড়ি চল।’ বটা বললো। কুতু বললো, ‘হ, চল। বেলাও হইল।’

আমি জিজ্ঞেস করলাম, ‘আবার কখন আসবে?’

‘তা বাবু, রাতে একেবারে খাইয়া লইয়া আসুম।’ কুতু বললো, ‘আইজ শ্রাব রাত্রের আগে আর জাল টানা হইব না।’ সে কনুই থেকে কবজি পর্যন্ত জাল গুটিয়ে নিতে লাগলো।

আমি না জিজ্ঞেস করে পারলাম না, ‘তা, ওদের সঙ্গে এখন আর ঝগড়াবাটি নেই তো?’

দুজনেই কেউ প্রথমে আমার কথাটা ধরতে পারেনি। কুতু জিজ্ঞেস করলো, ‘কাদের কথা কন বাবু?’

আমি মুখ ফিরিয়ে দক্ষিণদিকে দেখালাম। বটা হেসে জবাব দিল, ‘না বাবু, ঝগড়াবাটি নাই, তবে বোঝেন তো ভাগ লইয়া ভাইয়ে ভাইয়ে ঠাঁই ঠাঁই হয়। কথাবাতা আছে, তবে মনে স্নুখ নাই। আমাগো না, অগোও না।’

অবাক হয়ে জিজ্ঞেস করলাম, ‘তোমাদের মনে স্নুখ নেই কেন?’

‘ভগমানে যদি না ডুবায়, তাইলে এই চরের গতর আরও বাড়ব।’ বটা বললো, ‘আমরা আর খানিক জমি চাই।’

কুতু বলে উঠলো, ‘আমার বাবু মত নাই। লোকেরা আমাগো সলাপারামর্শ দিতেছে, আমার মন লয় না। অগেও তো বাবু অনেক-গুলাইন প্যাট, খ্যাট কই? জোর-জবরদস্তি করলেই তো হইল না।’

ভাবি, সলাপারামর্শ দেবার লোকগুলো কারা? তারা করে কি, সংসারকে দেখেই বা কোন নজরে? অবিশ্বি জানি, ভেবে লাভ নেই। সংসারে এক শ্রেণীর লোক আছে, পরোপকার তাদের পেশা। তুমি কি ভাবো, তুমি কি চাও, সেটা কোনো কথার কথা না। আমরা তোমাদের উপকার করবো, সেবা করবো, লড়াই করবো, তোমাদের জীবনের দায়-দায়িত্ব আমরা নিয়েছি। এই আমাদের কাজ, সংসারকে এই চোখে

আমরা দেখি। তোমরা কুতু বটীরা কেউ না, আমরা তোমাদের মা-বাপ। আমরা যা বলবো, তোমরা তাই করবে! তা না হলেই অশান্তি। ভেবে ত্যাদের চিনতে হয় না, সমাজের বুক তারা লাঠি ঘুরিয়ে বেড়ায়। সবাইকেই ত্যাদের চিনতে হয়। পরোপকার যে তাদের পেশা অর্থাৎ নিজেদের ভরণপোষণ। তোমাদের জ্ঞান লড়ি, তোমাদের স্বার্থের জ্ঞান সলাপরামর্শ দিই, অতএব তোমাদের শ্রমে আর ধনে আমাদের দাবী। আমাদের সঙ্গে থাকো! ভালো। না হলে শত্রু।

কিন্তু খেটে খাওয়া কুতু অল্প মনের মানুষ। সে নিজের 'প্যাট খ্যাট' বোঝে, পরেরটাও বোঝে। তাই সে জোর-জবরদস্তি চায় না। বটীর চিন্তা একটু অস্বরকম। তার অনুমান চরের গভর আরও বাড়বে, তাই তার আরও খানিক জমি চাই। সে অস্ত্রের প্যাট খ্যাটের কথা ভাবতে চায় না। কুতু দক্ষিণদিকে মুখ তুলে দেখিয়ে বললো, 'অয়া আমাগো ডরায়। ডরে ডরে থাকে, কী জানি আবার কোনদিন আমরা আরো বেশি দখল লমু।' বলে হেসে জিজ্ঞেস করলো, 'বাবুর ঘড়িতে কয়টা বাজে?'

আমি কব্জি তুলে দেখে বললাম, 'ছুটো বেজে গেছে।'

'এখন তা হইলে ঘাইতে হয়।' কুতুই বললো, 'এই উজানে গেলে তাড়াতাড়ি ঘাইতে পারুক। বাবুর লগে দেখা হইয়া ভাল লাগল। বেড়াইতে আসছেন, আর বোধহয় দেখা হইব না। কতক্ষণ থাকবেন?'

আমি বললাম, 'কতক্ষণ আর? যতক্ষণ ভালো লাগে, থাকবো, তারপরে চলে যাবো। আমারও তোমাদের সঙ্গে কথা বলে ভালো লাগলো।'

কুতু আর বটা দুজনে দুজনের দিকে তাকিয়ে হাসলো। কুতু দু-হাত কপালে ঠেকিয়ে বললো, 'ঘাই বাবু।'

'হ্যাঁ, এসো।' আমিও কপালে হাত ঠেকালাম।

বটাও কপালে জোড়হাত ঠেকিয়ে, নীচের দিকে নেমে গেল। তার পিছনে পিছনে কুতু। কিন্তু নৌকার আগে উঠলো কুতু। তারপরে নৌকার দড়ি খুঁটি থেকে খুলে, বটা উঠলো। উজানের টানে তাদের

নৌকা উত্তর-পূব কোণ নিয়ে ভেসে চললো তরতরিয়ে। বটা তার ওপরে বৈঠার চাড় দিল। এ গতির সঙ্গে দৌড়েও পাল্লা দেওয়া যাবে না।

আমি পিছন ফিরে তাকালাম। আশ্চর্য, সব হাওয়া। কেউ নেই। যোবতী আর প্রৌচাঁ বহড়ি, সঙ্গের পুরুষটি আর আলু তুলছে না। কিশোরীটি আর তরুণ, অথবা হয়তো কিশোরই, আর সেই কঞ্চি হাতে নেংটিটা, কেউ নেই। নিশ্চয় এ বেলার মতন কাজ শেষ করে সবাই দক্ষিণের চালাঘরে ফিরে গিয়েছে। উত্তরায়ণের বেলা বেশ কিছুটা পশ্চিমে চলেছে। কাজের লোকেরা কাজ শেষে নাওয়া-খাওয়া সারতে গিয়েছে।

ভাবতে ভাবতেই মনটা কেমন খচ করে উঠলো। যেন একটা সন্দেহের কাঁটা ফুটে গেল। আমি কুতু আর বটীর সঙ্গে কথা বলছিলাম বলে, ওরা আবার কিছু ভেবে বসেনি তো? মন গুণই তো ধন। ভাবতে অনুবিধা কী, বাঙালীবাবু বাঙালীদের সঙ্গে ভাব জমিয়েছে। তাহলে আমি নাচার। ওদের চূপচাপ কাজের ব্যস্ততা দেখে কোনো কথা পাড়তেই অস্বস্তি হচ্ছিল।

কিন্তু এখন এই চরের বৃকে দাঁড়িয়ে মনের এই খচখচানি ঝেড়ে ফেলাই ভালো। অনেকদিনের হাতছানিটা আজ দৈবে ঘটে গেল। পরের কি কথা, নিজের মনের অন্ধ-সন্ধি ক'জনে জানতে পারে? নিজেও জানতাম না, ত্রিবেণীর পথে যাত্রা করে, চর দেখতে দেখতে ছুটে চলে আসবো। তখন জানতামও না, কেমন করে আসবো, আর ভরত নামে মরদ বলতে গেলে আঘাটায় নৌকা নিয়ে বসে থাকবে। তবে নৌকাটা চোখে পড়ে, মনে কেমন একটা আশা জেগেছিল। তার আগে গড় করি নানীর গোড়ে, তাকে দেখেই কেমন একটা ভরসা হয়েছিল, নৌকা আসবে এই চরে।

দৈবে যখন চরে আসা ঘটেই গেল, তার ভূঁয়ে একটু শরীর ঠেকিয়ে বসি। বাবুর মন এখন একটু চা-চা করছে। সে-আশায় ছাই। এই চরে আমার জ্ঞান কেউ চায়ের সরঞ্জাম নিয়ে বসে নেই। আমি আরও উত্তরে পা বাড়ালাম। শেষ সীমাহুক দেখি।



বেশিদূর যেতে হলো না। উত্তরের শেষ সীমানাটা, কুতূদের খালি ঘরটা থেকে হাত-দশেক দূরেই শেষ। পাড়টা বেশ খাড়াই। জোয়ারের জল নেমে গেলে, চরের ভূমির আদল কেমন দেখাবে, কে জানে? রোদটা বেশ কড়াই লাগছে। দেখছি উত্তরের এই শেষ সীমায়, কয়েক হাত লম্বা আর, তার থেকে কিছু বেশি চওড়া জায়গায়, কুমড়ো খুঁধুল জড়াজড়ি করে লতায় পাতায় ছড়িয়ে আছে। খুঁধুল চোখে পড়লেও কুমড়ো একটাও দেখলাম না। তবে কুমড়ো ফুল আছে।

যার যেমন নজর। কুমড়ো ফুল দেখলেই ফুলের বড়া ভাজার কথা মনে পড়ে যায়। পড়ে গেলে, চৌক গিলেই সাধ মেটাতে হয়। একেবারে শেষ সীমানায় উঁচু পাড়ের মাটি শক্ত, লম্বা লম্বা চাবড়া আর মুত্বে ঘাস জমেছে গোছা গোছা। জাতের এরা দুর্বা না, তার থেকে চওড়া আর লম্বা। কিন্তু রোদে না বসে, আমি কুতূদের ঘরের পিছনে, বেড়ার বাইরে ফুট-খানেক উঁচু ভিত্তের মাটিতে বসলাম। কারণ এখানে ছায়া আছে। চোখের কালো স্ট্রিটা খুলে, আগে সিগারেটের প্যাকেট বের করে, একটা সিগারেট ধরলাম।

দেখছি, নদী কিছুটা পশ্চিমে বাঁক নিয়েছে। দূরের উত্তরের ত্রিবেণীর চড়ার অংশবিশেষ নজরে আসছে। কুতূদের নৌকাটা ডানলপ ক্যাঙ্কটরির খেয়াঘাটের সীমানা ছাড়িয়ে গিয়েছে। পূর্বপার ঘেঁষে চলেছে। আকারে এখন অনেক ছোট দেখাচ্ছে। খেয়াঘাট, শাশান, আশ্রম সবই দেখতে পাচ্ছি। তারপরে লোকালয় একটু এগিয়ে এসেছে। বাঁকের মুখে যেমনটি হয়। আরও দূরে, পূর্বের ডাঙায়, ইট খোলাটা দেখলেই চেনা যায়। ইট পোড়ানোর কলের চিমনিতে ধোঁয়া উড়ছে। ধোঁয়া উড়ছে বাঁশবেড়ের চটকলের উঁচু চিমনি

থেকেই। ধোঁয়া উড়ে চলেছে দক্ষিণ-পূর্ব কোণে। হাওয়ার আগমন উত্তর-পশ্চিম থেকে। সেই দিকেরই আড়াল থেকে এক-একটা সাদা মেঘের টুকরো, মাঝে মাঝে উঠে আসছে। যেন দূরের আড়ালে, আকাশের কোথাও তারা জমায়েত হয়েছে। যখন যার সময় হচ্ছে, সে নিজের নানা রকমের আকার নিয়ে ভেসে আসছে। আসতে আসতে আবার আকার বদলাচ্ছে, আর যেন ঘুম ঘুম গড়িমসি চালে উড়ে চলেছে। কোথায় যাচ্ছে? পূর্ব-দক্ষিণের সাগর কূলে নাকি?

শরৎকালের মতন, এই সাপা মেঘে স্বপ্ন আছে। যদিও মাঘের আকাশের নীল আর শরতের নীলে তফাত আছে। আর সেই আকাশের মেঘের চালচলন সবসময় এমন গলাইলস্করি না, আকারেও এতো ছোট না। তবে ঠিকানাহীন অচেনা কাকে যেন জিজ্ঞেস করতে ইচ্ছা করে, মনে যদি গুণ্ডবার ডানা দিয়েছিলে, তবে অমন সাদা মেঘের সওয়ার হবার মতন ডানায় জোর দিলে না কেন?

এতক্ষণে লক্ষ্য পড়লো, গঙ্গার এপারে ওপারে কাক যাতায়াত করছে। নিতান্ত প্যাট খ্যাট, নাকি আত্মীয়বন্ধনের সঙ্গে দেখা-সাক্ষাতে যাতায়াত? সীমানা নিয়ে লড়াই নেই তো? উত্তরের পশ্চিম কূলে হুসেনখরীর মন্দিরের চূড়া স্পষ্ট দেখতে পাচ্ছি, অনেক গাছপালার মাথা ছাড়িয়ে উঠেছে। কাঁচরাপাড়ার কেউ রায়ের মন্দিরের মতনই। হুসেনখরীর মতন মন্দির আমি পশ্চিমবঙ্গে আর দেখতে পাইনি। বলতে গেলে, গড়বেষ্টিত রাজবাড়ির পাঁচিলের বাইরেই সেই মন্দির।

হ্যাঁ, রাজবাড়ি। বিরাট সিংহ দরজার মাথার ওপরে, সিংহের অঙ্গের অনেকটাই কালে খেয়েছে। রাজবাড়িটা দেখলে, সাধারণ মধ্যবিত্ত গৃহস্থের বাড়ি ছাড়া আর কিছু মনে হয় না। উঠানের তারে ঝোলে ধূতি শাড়ি, রোয়াকের ওপর সামান্য জামা-কাপড় গামছা। প্রাসাদটি দেখলে বোঝা যায়, এক সময়ে নিশ্চয়ই তার রমরমা ছিল। পিছনে ইতিহাস অবিশিষ্টই আছে। তবে সে-খোঁজে এখন আর কী দরকার। বাঙালীর কাছে নতুন কিছু না। অবাধ কথা যেটা, সেটা হলো এই বংশের আদি পুরুষ রামেশ্বর রায়চৌধুরিকে বাদশা ঔরঙ্গজেব

রাজা মহাশয় উপাধি দিয়েছিলেন। বাদশা যে বড় হিন্দুবিদেবী বলে জানি ? তবে হিন্দুকে এত তৌয়াজ কেন ?

এ-সব হলো কেতাবী কথা, কেতাবী জিজ্ঞাসা। তবে, আমি দেখেছি গড়ের পরিখায় ক্ষীণ জলের ধারা। বনশিউলি আর আশশাওড়ার ঝাড়। শুকনো পাতার ওপর দিয়ে, সড়সড়িয়ে গোসাপের ছুটৌপুটি।

চারদিক চূপচাপ নিরুন্ম। হংসেশ্বরীর মন্দিরের চারপাশেও বিস্তার আপাছার ভিড়। শুকনো পাতার ছড়াছড়ি। সুর্য্যোপেকা যত্রতত্র। সাপের ভয়টা থেকে থেকেই গায়ে শিরশিরিয়ে উঠেছিল। তবু মন্দিরের সিঁড়ি বেয়ে ছ'তলার ওপরে উঠেছিলাম। তলাগুলো নিশ্চয়ই তেমন উঁচু না। তবু মাথার ওপরে ছয়টি চূড়াই মন্দিরের উচ্চতা সত্তর ফুট। এটি আমার কেতাবী জ্ঞান। নিজের হাতে মাপিনি, সম্ভবও ছিল না। যখন কেতাবী মানে আরও জেনেছি, ঘটচক্র ভেদের পাঁচটি নাড়ি; ইড়া পিঙ্গলা সুষুম্না বজ্রাঙ্ক আর চিত্রিত্রী প্রাতীক মন্দিরের পাঁচটি সোপান। হংসেশ্বরী তার মধ্যে কুলকুলিনী রূপে বিরাজ করছেন।

কেতাবের কথা থাক। বাড়ির উঠানের সৌমান্য, পুবে বাসুদেবের মন্দিরটি আমার নজর কেড়েছিল বেশি। বিবর্ণ আর ক্ষয়ের মুখে বটে, কিন্তু মন্দিরের গায়ে টেরাকোটার কাজের তুলনা নেই। বিষ্ণুপুরের মন্দির ছাড়া, আর কোথাও কোনো মন্দিরের মারা গায়ে এতো টেরাকোটা দেখিনি।

দেখিনি কি ? একটু বোধহয় ভুল হলো। আরও কোথাও কোথাও দেখেছি। পুবেপারের হালিশহরেই দেখেছি। এখান থেকে ঠিক চোখে পড়ছে না। গঙ্গার ধারেই যেখানে এখন বালির চিবি সেখানে ধ্বংসোন্মুখ মন্দিরের গায়ে টেরাকোটার অনেক কাজ দেখেছি। দেখেছি শিবের গলির মন্দিরও। সদর রাস্তার ওপরে, গঙ্গার ধারেও মন্দিরের গায়ে টেরাকোটা কেবল কালের গ্রাসেই যায়নি। শুনেছি, মাল্লবের গ্রাসেও গিয়েছে। শিবের গলির মন্দিরের পোড়া ইটের

কারকার্যের খণ্ডগুলো একেবারে নিঃশেষ হতে পারেনি। বোধহয় গলির মধ্যে বলেই। তা ছাড়া, মন্দির সংলগ্ন গৃহের এক বৃদ্ধা মহিলাকে দেখেছি, কড়া নজর রাখতে। মন্দিরটি সম্ভবত তাঁরই মালিকানা স্বত্বের মধ্যে। লোকজন কেউ এসেছে, টের পেলেই তিনি বেয়িয়ে আসেন। ধর্মো-টমমো সব গুলে খেয়েছে। আপদগুলো মন্দিরের গায়ের ইঁট খুলে নিয়ে যায়। তা কাঁহাতক আর চোখে চোখে রাখা যায় ?

বৃদ্ধা মহিলাকে বলতে শুনেছি। তাঁর ভাষা কর্কশ, চোখে সন্দেহ কিন্তু তার জন্ম তাঁকে দোষ দেওয়া যায় না। চোখে চোখে রেখেও যে তিনি হাড় হারামজাদাদের হাত থেকে মন্দিরের পোড়া ইটের পটগুলো বাঁচাতে পারছেন না। নানাভাবে টেরাকোটার টুকরো খুলে নেবার চেষ্টা, অর্ধেক ভাঙা অর্ধেক উধাও মাল্লবের হাতের কীতির ছাপ স্পষ্ট। অথচ এমন না, যে মন্দিরটি লোকালয়ের বাইরে জঙ্গলে পড়ে আছে। পাড়ার মধ্যে। শিবলিঙ্গের নিত্য পূজা এখনও হয়। বৃষতে অনুবিধা হয় না, এক শ্রেণীর শিল্পরসিকদের টাকার লোভে, এক শ্রেণীর উজ্জেরা মন্দিরের শরীরকে বিকৃত করে। প্রাচীন শিল্প সস্তারকে ঘরজাত করতে না পারলে, সেইসব শিল্পরসিকদের শিল্পের ক্ষুধা মেটে না। ভেঙে-পড়া অযত্ন পড়ে-থাকা প্রাচীন নিদর্শন কুড়িয়ে নিয়ে সম্বলিত রক্ষা করা এক কথা। আর ভেঙেচুরে চোরাই মাল ঘরজাত করা আর এক কথা।

কিন্তু আমার এ অলস আক্ষেপের কী দাম আছে ? সবাই জানে, ভারতের প্রাচীন যে-কোনো শিল্প-নিদর্শন এখন আন্তর্জাতিক ব্যবসার ধন। বড় বড় বিগ্রহই চালান হয়ে যাচ্ছে। পোড়া ইটের ছোট ছোট শিল্পও তো কিছুই না। একে বলে মূল্যবোধের পরিবর্তন। একদা যে মন্দিরকে মাল্লব ভয়ে হোক, ভক্তিতে হোক দেবালয়ের চোখে দেখতো এখন তার গায়ের আবরণ খুলে নেবার জন্ম, ছেনি হাতুড়ি সাবল খোঁচাতেও দ্বিধা নেই। কালই শুধু আগ্রাসী না, মাল্লবকেও সে তার সঙ্গী করে নিয়েছে। এটাও বোধহয় কালের ধর্ম কিন্তু কালের

ধর্মে একদা কুমারহট্ট হালিশহর হয়ে যায় কেমন করে? যখন/গঙ্গার পশ্চিমকূল/বারাণসী সমতুল্য ছিল, সম্ভবত তখন সরস্বতী নদীর কূলে সপ্তগ্রাম আন্তর্জাতিক বাণিজ্যকেন্দ্রে ছিল। এ-সব হলো ইতিহাসের কেতাবী সংবাদ। তখন উত্তর চব্বিশ পরগণার সীমান্তের পুবকূলের হালিশহর নাম কেউ জানতো না। জামি না, আদৌ চব্বিশ পরগণা নামটাই তখন ছিল কী না। কুমারহট্ট যে সেকালে শাস্ত্র বিশারদ পাণ্ডিত্যের পাণ্ডিত্যের বিশেষ গৌরবস্থল ছিল, ইতিহাস তাই বলে। কিন্তু সেই কুমারহট্ট নামটা গ্রাস করলো কালের কোন্ নির্দিষ্ট সময়টিতে? অনেক ধোঁরাঘুরি করেও, কুমারহট্ট নামে কোনো গ্রামও খুঁজে পাইনি। একদা ঐতিহাসিক গ্রাম, নামেধামে যার বেজায় রমরমা ছিল, অনেক সময় দেখা গিয়েছে, সেই গ্রাম বাঁশঝাড় আর ডোবায় ছড়াছড়ি এক জরাজীর্ণ কংকাল হয়ে পড়ে আছে।

কুমারহট্টের সেইরকম কোনো চিহ্নও খুঁজে পাইনি। অতএব, পূর্বের হালিশহরই সেই কুমারহট্ট, এমন ধরে নিতে হয়। খ্রীষ্টোত্তর সময় কি কুমারহট্ট নাম ছিল? কবিকঙ্কণ মুকুন্দরামের বর্ণনায় তো দেখছি ‘বামদিকে হালিশহর দক্ষিণে ত্রিবেনী/ঘাত্রীদের কোলাহলে কিছুই না শুনি।’...তার মানে, হালিশহর নামও নতুন না। মুকুন্দরামও কুমারহট্ট বলেননি। তবে ভাবতে গিয়ে একটা দূরকালের ছবি যেন চোখের সামনে ভেসে উঠেছে। আমি এখন গঙ্গার মাঝখানে চড়াই বসে আছি, হয়তো এর ওপর দিয়েই কবিকঙ্কণের নৌকা দক্ষিণে ভেসেছিল। কেমন ছিল সেই নৌকা দেখতে? কতো মাঝি-মালা ছিল?

কল্পনায় একটা ছবি ভেসে ওঠে। যদিও সেই ছবিটার আসল বর্ণনাও রয়েছে কাব্যের মধ্যেই। আধুনিক মুকুন্দরামদের চোখে গঙ্গার ছবিটা আর তেমন খুঁজে পাওয়া যায় না। কারণ, এ নদীর নাম এখন সাহেবদের ভাবায় হুগলি নদী। দুই তীরে কলকারখানার ভিড়। বন্দর সরে গিয়েছে অনেক দক্ষিণে, কলকাতা শহরে। মুকুন্দরাম বন্দর দেখেছিলেন ত্রিবেনীতেই। সেইজন্মই বোধহয় যাত্রীদের

কোলাহলে তাঁর কান পাতা দায় হয়েছিল। হালের কথা বলতে গেলে, দুই তীরকে বোধহয় শিল্পনগরী বলতে হবে। কোলাহল কি আদৌ কিছু কমেছে?

তবে হালিশহর? যে একদা শহরতুল্যা ছিল, এই পঞ্চাশ দশকের মাঝামাঝি তার ধ্বংসস্তূপের ছবি দেখলে সেই কথাই মনে হয়। বাদশাহী জরোপে, হাবেলী পরগণার মধ্যে হালিশহরের নামোল্লেখ আছে। হাবেলী পরগণার সীমানাও কম না। এখন বোধহয় তার সীমানা সহরদের দলিল-দস্তাবেজ ইণ্ডিয়ান জুট মিলস এ্যাসোসিয়েশনের মহাফেজখানায় পাওয়া যাবে। কার আমলে হাবেলী পরগণা নামে একটি পরগণা তৈরি হয়েছিল? মুঘল আমলের কোনো স্থানীয় শাসনকর্তার আমলে কী?

মাঝগঙ্গার চরের কূলে বসে মনে মনে ইতিহাসের পাতা উল্টে লাভ কি। তবে বিভাগাগরের যুগে কোন কুলীন ব্রাহ্মণ কতো ব্রাহ্মণী নিয়ে করেছিলেন, তার একটা গণনার হিসাবে দেখেছিলাম হালিশহরের নাম ছিল অনেক ওপরে। এই কেতাবী কথাটার সঙ্গে আর একটা পুরনো কিংবদন্তী মনে পড়ে যাচ্ছে। কিংবদন্তীটি কি নদীয়ারাজের সময়ে কারোর মস্তিষ্ক প্রসূত? কিংবদন্তীটি ছিল খ্যাতি অখ্যাতি বাই বলে, ‘গুপ্তিপাড়ার বাঁদর/হালিশহরের ত্যাঁদড়।’

ত্যাঁদড় চেনা দায়, বাঁদর চেনা যায়। গুপ্তিপাড়ায় ঘুরতে গিয়ে অনেক কিছু দেখেছি, বাঁদর চোখে পড়েছে বলে মনে করতে পারি না। হতে পারে, নদের রাজা কেষ্ঠচন্দ্রের সময়ে গুপ্তিপাড়ার বাঁদরের বিশেষ প্রাধুর্ভাব ছিল। আর সম্ভবত গোপাল ভাঁড়ের পরামর্শেই তিনি বহু হাজার টাকা খরচ করে গুপ্তিপাড়ার বাঁদর-বাঁদরির নিয়ে দিয়েছিলেন। গোপাল ভাঁড়ের নামটা মনে এলো এই কারণে, মহাশয় সেই গ্রামের কতাকে বিয়ে করেছিলেন। গোপাল ভাঁড়ের শশুরবাড়ি বলেই, গুপ্তিপাড়ার আর একটা কিংবদন্তী মনে পড়ে যাচ্ছে। ‘নদের মেয়ের খৌঁপি/গুপ্তিপাড়ার চোপা।’ চোপা বলতে বগড়া বোঝায়। এটাই আমরা জানি। তার সঙ্গে কি রসিকতার কোনো সম্পর্ক আছে?

থাকলে বলতে হয়, গোপাল ভাঁড়ের রসিকতা হয়তো বউয়ের চোপা থেকেই পাওয়া।



উত্তরায়ণের বেলাটা কখন পশ্চিমে ঢালু বেয়ে তরতরিয়ে নেমে গিয়েছে, খেয়াল করিনি। জলের দিকে তাকিয়ে মনে হলো, চড়া উজানে ছুটছে। জলের স্রোতের চল নেমে চলেছে দক্ষিণে। কখন জোয়ার শেষ হয়ে ভাঁটা পড়েছে লক্ষ্য করিনি। আরও টের পাওয়া গেল, কলকল ছলছল শব্দে। জোয়ারের ভরায় নদী শব্দহীন থাকে। ভাঁটার টানে একটা নাচের ছন্দ আছে। কুলে কুলে ছলছলিয়ে সে জানান দিয়ে যায়। সে আসে নিশ্চন্দে, ভরে গেলে একেবারে চুপচাপ। নামার সময়ে নদী যেন সমুদ্রের ডাকে কলকলিয়ে ওঠে।

বেশ কয়েকটি সিগারেটের মুখু চিবানো গিয়েছে। পশ্চিমের আকাশের দিকে তাকিয়ে দেখি চোখে যায়, এমন একটা লাল থালা দূরের গাছপালার মাথায়। মনে মনে ব্যস্ত হয়ে উঠতেই হঠাৎ প্রায় পিছনেই গরগর চাপা গর্জন শোনা গেল। পিছন ফিরে তাকাতেই দেখি চালাঘরের কোণেই সাদার-কালার মেশামেশি এক সারমেয়। চরের বুক কুকুর? এতক্ষণের মধ্যে একবারও তো আওয়াজ দেয়নি?

আমি ফিরে তাকাতেই শুরু হয়ে গেল খেউ খেউ ধমক। যেন আমার দৃষ্টি আকর্ষণের জ্বাউ প্রথমে চাপা গর্জন। তারপরেই হমবি তমবি। তাড়া দিয়ে এগিয়ে আসার লক্ষণ না দেখা গেলেও, ব্যাপারটা বিশেষ স্তব্ধতার মনে হলো না। তাড়া করলে যাবো কোথায়? যাদের সাহায্য পেতে পারি, তারা তো এখন আমার আড়ালে, দক্ষিণের সীমানায়। কে জানতো চরে এমন একটা চৌকিদার আছে। আর পকেটেও এমন কোনো জব্য নেই যা দিয়ে চৌকিদারকে ঘুষ দেওয়া যায়। সিগারেট বা পয়সার ঘুষে নিশ্চয়ই সে বাগ মানবে না। খাছ-

বস্তুর কণামাত্র আমার পকেটে নেই।

বিপদ আর কাকে বলে। আমরা মাতাল দাঁতালের ভয়ের কথা বলি বটে। সময় বিশেষে সামান্য একটি পশুও অবচন ঘটাতে পারে। যতো দূর জানি, পোষা জীব হলেও পশুকে বিশ্বাস করা যায় না। কিন্তু এটাও জানি, ভয় গেলে, আরোই গোলমাল। অতএব আমি প্রথমে নিরীহভাবে আওয়াজ দিলাম, ‘কী হয়েছে রে?’

জবাবে খেউ খেউ গর্জন বাডুলো। অচেনাকে কেয়ার করবে, চরের তেমন চৌকিদার সে না। আমি জিত দিয়ে তু তু শব্দ করে ডাকলাম। উদ্দেশ্য শাস্ত করা। অথবা বিশ্বাস উৎপাদন করা। কাজে লাগলো না। জ্ঞানি না, বাবুরা যখন দল বেঁধে জরুরি বালবাচ্চা নিয়ে বনভোজন করতে আসে, তখন চৌকিদারটি কী ভূমিকা নেয়। অগত্যা আমাকে উঠে দাঁড়াতে হলো।

দাঁড়ানো মাত্রই চৌকিদার ঝটতি কয়েক পা পিছিয়ে গিয়ে চরের আকাশি বালাপালা করে তুললো। জানি, হাতের কাছে মাটির ঢালার অভাব নেই। সে-রকম বুঝলে ওর সঙ্গে আমাকে যুদ্ধে অবতীর্ণ হতেই হবে। কিন্তু চৌকিদার চিংকার করতে করতে হঠাৎ হঠাৎ এক-আখবার পিছনে দেখে নিচ্ছে। আমি কয়েক পা পশ্চিমে যেতেই চৌকিদার নৌড়ে কয়েক পা পিছনে হটে হাঁক পাড়তে আরম্ভ করলো আর আমি দেখলাম, কঞ্চি হাতে সেই নোংরা হাত কয়েক দূরে দাঁড়িয়ে রয়েছে, হাতে অবিশ্রু এখন কঞ্চিটা নেই। ওর কাছ থেকে আরও কিছুটা দূরে দাঁড়িয়েছিল, মটরশুটি ক্ষেতের সেই কিশোরী। মাথায় এখন ওর ঘোমটা নেই। এদিকে তাকিয়েই দাঁড়িয়েছিল। আমাকে দেখেই মুখ ঘুরিয়ে এক পা এক পা করে দক্ষিণে চলতে লাগলো।

আমি ভরসা পেলাম ছোটো কারণে, নোংরা আর কিশোরী এসে গিয়েছে। আর একটা লক্ষণীয়, আমি নড়াচড়া করলেই চৌকিদার পিছনে হটে। কিন্তু নোংরাটার সাহস কি বেড়ে গেল নাকি? দেখছি, আমার দিকে তাকিয়ে মিটিমিটি হাসছে। অনুমান করলাম, ওর

পিছনে পিছনেই চৌকিদারের আগমন। তারপরে হঠাৎ ভিনদেশীকে দেখেই তৎপর হয়ে উঠেছে। আমি নেংটিটাকে আমার নিজের মতন হিন্দিতে জিজ্ঞাসা করলাম, 'এ কিসকো কুকুর হায় ?'

আবার কথা? আমার জিজ্ঞাসা শুনেই নেংটিটা পিছন ফিরে কয়েক হাত দৌড়ে চলে গেল। গিয়ে আবার পিছন ফিরে তাকালো। আর আমাকে অবাক করে দিয়ে চৌকিদারও নেংটিটার কাছে ছুটে গিয়ে, সেখান থেকে সমানে গলা ফাটিয়ে চৌকিদারি করতে লাগলো। কিন্তু ব্যাপার দেখে আমার ভরসা বাড়লো। চোখ তুলে আরও একটু দূরে দক্ষিণে তাকিয়ে দেখলাম। কিশোরী দাঁড়িয়ে পড়েছে। তবে মুখ ফেরানো পশ্চিমে। ওর বোমটা খোলা মুখে এখন মাঘের শেষ বেলার রাঙা রোদ! রঙ তেমন গাঢ় না, এখন লাল শাড়ি আর মাজা মাজা মুখে হাতে গলায়, হাতের কাঁচের চূড়িতে, বেলা যাবার আগের রক্তাভ একটা চোখ ভরিয়ে দেবার মতন রূপ নিয়েছে। গঙ্গার মাঝখানে সবুজ চরের সঙ্গে কিশোরীটি যেন মিলেমিশে প্রকৃতিকে এক নতুন রূপ দিয়েছে। কী দেখছে ও তম্বর হয়ে?

কিন্তু আমার হাতে আর সময় নেই। ভরত পাটনীর খোঁজ করতে হয়। দেখতে দেখতেই সন্ধ্যা নামবে এবং অন্ধকারও। এতক্ষণে জলের তৃষাও বোধ করছি। দক্ষিণের সীমানায় বাড়ি ঝোপড়ি চালাঘর যাই বলা যাক, একবার সেখানে যেতেই হবে। হয়ত কলের জল এক পাত্র পাবো। তারপরে মূলের কূলে। আমি পা বাড়ালাম। কিশোরীটির যেন তৎক্ষণাৎ আমার দিকে চোখ পড়লো। ও আবার পিছন ফিরে চলতে আরম্ভ করলো। আর নেংটিটাও এবার দৌড় দিল না, কিন্তু পিছন ফিরে ছোট ছোট পায়ের গতি বেশ দ্রুত। চৌকিদারও ওর পিছু পিছু চলেছে। তবে চিংকারের হাঁক ডাকটা যেন একটু কম। এখন আর একটানা না, ক্ষণে চুপ, ক্ষণে হাঁক। দৃষ্টিতে অবিশ্বি তার অবিশ্বাস আর সন্দেহ।

জলের দিকে তাকিয়ে দেখছি, টানে বেশ জোর। চর অনেকখানি জেগে উঠেছে। বালির ওপরে পলিমাটির কালো ছোপ, আস্তে আস্তে

জলে গিয়ে নেমেছে। সীমানা খুব ছোট না। পশ্চিমের অংশটা দেখতে পাচ্ছি না। সেদিকে যতোটা খাড়াই দেখেছিলাম, এদিকে চর ততোটা খাড়াই না। ঢালু হয়ে, নীচের দিকে খানিকটা সমতলের মতোই জলে গিয়ে ডুব দিয়েছে। তবে সবখানে একরকম না। কোথাও কোথাও বেশ খাড়াই।

চরের ধার দিয়ে পায়ে চলা সুরু পথটা দিয়ে এগিয়ে চলেছি। মটর, অবশিষ্ট ফুল আর বাঁধাকপি, আলু, ছোলার সীমানা পেরিয়ে প্রায় চালাঘরগুলোর কাছে। আমিই যেন কিশোরী, নেংটি আর চৌকিদারকে তাড়িয়ে নিয়ে চলেছি। ওরা চলেছে আমার আগে আগে। বাঁয়ে দূরের দক্ষিণপারে হাজিনগর মিলের কুঠি, চিমনি আর ধারে ধারে বিস্তর ঘর। আরও এগিয়ে সারি সারি কলকারখানা। পশ্চিমে ডানলপের কুঠির সীমানা পেরিয়ে দক্ষিণের গোটা ধার জুড়ে গৃহস্থের ঘর আর ঘাট। ব্যাঙেল গির্জার ক্রুশ, আরও কিছু দূরের আকাশে ইমামবাড়ার ছই চূড়া দেখতে পাচ্ছি। রেল সেতুর পুরোটা চোখে পড়ছে না। নদী ওখানেও কিছুটা বাঁক নিয়েছে।

নেংটিটা দৌড়ে কোথায় কোন ঘরের আড়ালে চলে গেল। কিশোরীটি দাঁড়ালো এমন জায়গায় দোতলার চালে ওর শরীরের অর্ধেক ঢাকা পড়ে গিয়েছে। বোধহয় সেখানে চালায় ঢোকায় দরজা। চৌকিদারের চিংকার নতুন করে শুরু হলো। ও বোধহয় আমার এতোটা এগিয়ে আসা পছন্দ করছে না। বলতে গেলে, ভুড়ুক ভুড়ুক টানে, সামনের চালার ডানদিকে দেখতে পেলাম, নানী একটা চটের ওপর বসে হুকো টানছে। তার বাঁ পাশে মাঝবয়সী বহুড়ি।

কিশোরীটিই বোধহয় কুকুরটিকে আওয়াজ দিয়ে তাড়া করলো। মাঝবয়সী বহুড়িটি কিছু বললো। নানী হুকো টানা থামিয়ে আমার দিকে তাকালো। ভুরুতে চুল নেই। ছুঁচোখ ভরা বিষয়, কপালে পলিচরের রেখা। বলে উঠলো, 'এ রউয়া, ইত্তি ডের তক তু কই রহলে? চৌরে পর?'

নানী ভাবতেই পারেনি, আমি এতক্ষণে চরে রয়েছি। হাত তুলে

উত্তরে দেখিয়ে বললাম, ‘হ্যাঁ, ঠিককে বলেছিলাম।’

কুকুরটা চুপ করেছে। নানী আমার বাংলা বুলি বোধহয় ঠিক ধরতে পারলো না। সে তার বাঁ পাশে মাঝবয়সী বহুড়িকে জিজ্ঞেস করলো, ‘কা কইলান?’

মাঝবয়সী বহুড়ি আমার দিকে তাকিয়ে হেসে উঠলো, বুড়িকে বললো, ‘রউয়া কইলান কি, উধার বাঙালীকো জমিন পর বৈঠ রহলে?’

অথচ মাঝবয়সী বহুড়িটি যখন আলু তুলছিল, তখন তার মুখের দিকে তাকিয়ে ভাবাই যায়নি, সে এমন হাসতেও পারে। বাংলা বুলিও যে সে বুঝতে পারে বোঝা গেল। আর ‘রউয়া’ শব্দটা এই প্রথম এদের মুখে শুনেছি। শহরতলীর শিল্পাঞ্চলে কোনো কোনো অবাঙালীর মুখে কথাটা আগেও শুনেছি। মানে জিজ্ঞেস করে জেনেছি, সম্মানীয় ব্যক্তিকে ওই শব্দের দ্বারা সম্বোধন করা হয়। এখন ‘বাবু’ সম্বোধনের বদলে ‘রউয়া’ শুনেছি। যদিও ধারণা নেই, বিহারের কোন্ জেলার লোকেরা শব্দটি ব্যবহার করে। কিন্তু বুড়ি নানীর ‘বাবা’ সম্বোধনটাই আমার ভালো লেগেছিল।

মাঝবয়সী বহুড়ির জবাব শুনে নানী বলে উঠলো, ‘হায় রাম! তু সলই হামে কইলান, বাবু বাঙালীকো নায়ে পর চল গেইলান।’

‘হম না কহলে।’ মনে হলো চালার আড়ালে শরীরের অর্ধেক ঢাকা পড়া কিশোরী আওয়াজ দিল, ‘হম দেখলছি শো বাঙালী নায়ে পর চল গয়লান, ইয়োকো না দেখলবা।’

কথাবার্তা শুনে বুঝতে পারছি, এরা সকলেই ভেবেছে, আমি কুতু আর বটার সঙ্গে নৌকায় করে চলে গিয়েছি। নানীকে সবাই তাই বলেছে। একমাত্র কিশোরী ছাড়া। কারণ সে ছুই বাঙালীকে নৌকায় করে চলে যেতে দেখেছে, আমাকে দেখতে পায়নি। এ কোন্ দেশী হিন্দি বাত হচ্ছে, তাও যথেষ্ট ধরতে পারছি না, কিন্তু বুঝতে পারছি। সকলের কেন এমন ধারণা হলো, আমি বাঙালীদের সঙ্গে নৌকায় চলে গিয়েছি? বাঙালী বলেই কি? অথচ কিশোরীর নজরে পড়েছিল,

ছুই বাঙালীকে সে নৌকায় করে যেতে দেখেছে, আমাকে দেখেনি। দেখেনি যদি তবে কী ভেবেছিল? আমি চর থেকে হাঁওয়া হয়ে গিয়েছি। দোতালার চালে ঢাকা কিশোরীর অর্ধাঙ্গ লক্ষ্য করলাম। নিজেকে ওর এমন আড়াল করার কারণ কী? বিদেশী পুরুষের সামনে লজ্জা? না সহবত?

‘এ হুরি, তু কাহে না কহলে কি বাবা চৌরে পর রহল?’ নানী ডানদিকে মুখ ঘুরিয়ে জিজ্ঞেস করলো।

হুরি! সে আবার কেমন নাম? কিশোরীর শরীর কিঞ্চিৎ চালার বাইরে আত্মপ্রকাশ করলো, কিন্তু মুখ দেখা গেল না, বললো, ‘হম্ কা কইলান? ইয়োকো হম না দেখল বা।’

মাঝবয়সী বহুড়ি আবার হেসে উঠলো। এখন তার কপালে মেটে সিঁছরের কঁটা। ঘোমটা কপাল অবধি ঢাকা। একটি সবুজ রঙের কালো পাড় শাড়ি তার গায়ে। বোধহয় কাজের শেষে, স্নান করে বসন পরিবর্তন হয়েছে। ছ-হাতের কাঁশার বালা জোড়া বকবক করছে। নিশ্চয়ই মাজা হয়েছে।

এবার মাঝবয়সী বহুড়ির পিছন থেকে আগমন ঘটলো সেই যোবতী বহুড়ির। নীল কালোয় ডোরা, লাল পাড়ের শাড়ি তার অঙ্গে। কালে একটি জামাও তার গায়ে। জামা দেখেছি কিশোরী হুরির গায়েও। যোবতী বহুড়ির কপালেও সিঁছরের কঁটা, কিন্তু মেটে সিঁছরের না, বাঙালী বহুড়ের মতন লাল সিঁছর তার কপালে। মুখটি তেলতেলে দেখাচ্ছে। এ চরের চালার বধু কি কোন্ডক্রীম মেখেছে? বোধহয় না। তেল মেখেই চামড়ার কোমলতা রক্ষার চেষ্টা। তার মুখও দেখছি হাসি। তার ঝাঁল ধরে গা বেঁয়ে রয়েছে নেংটিটা। আর একটু পিছনে শাদা-কালো পাহারাদার ল্যাজ নাড়ছে।

যোবতী বহুড়ির সঙ্গে চোখাচোখি হলো মাঝবয়সীর। তাদের সম্পর্কটা কী কে জানে। ছ’জনেই প্রায় বালিকার মতন খিলখিল করে হেসে উঠলো। হাসির অক্ষুট আওয়াজ যেন চালার অগ্রপাশ থেকেও শোনা গেল। নিশ্চয় কিশোরী হুরির। হুরি! কী তার

মানে? নিশ্চয়ই বাঙলা শব্দের হুড়ি না। হলেও অবাক হবার কিছু নেই।

কিন্তু আমি তো দেখছি, নানা বয়সের রমণীদের হাসির পাজ্র হয়ে উঠলাম। নানীও দেখছি আমার দিকে তাকিয়ে হাসছে, আর হাসতে হাসতেই বললো, 'ই লোগন কা কণ্ড, সমঝমে না আইলেবানি হো রউয়া। তু কহাঁ রহলে ইততিডেরতক? কোই না দেখলেবারে?'

আমি এবার নানীকে বোঝাবার জন্ত, উত্তরে হাত তুলে দেখিয়ে, আমার মতন হিন্দিতে বললাম, 'উবার বাঙালীকে ঘরকে পিছে।'

আমার কথা শেষ হলো না। কিশোরীসহ তিন রমণী তিন স্বরে হেসে উঠলো। নেটিটাও দেখি, আমার দিকে তাকিয়ে পোকায় খাওয়া ছুধের দাঁত দেখিয়ে হাসছে। নানী বললো, 'হায় রাম! এ হুরি, ছোটা খাটিয়া কাঁহে না নিকল লে আয়ি? বাবুকো বৈঠনে দে।'

এখন আবার বসা? পশ্চিমের লাল খালাটা গাছপালার আড়ালে ডুবুডুবু। সময় কোথায়? কিন্তু এই প্রথম আমার মনে একটা খটকা লাগলো। ভরত কোথায়? তার বা অথ কোনো পুরুষেরই দর্শন শব্দ কিছুই পাওয়া যাচ্ছে না। আমি জিজ্ঞেস করলাম, 'ভরত কহাঁ? উসকো নৌকামে হম আভি যানে মাভা।'

এবার আবার ছুই বহুড়ির হাসি। কাজের সময় যারা আমাকে দেখে একটি কথা বলে নি, বরং গম্ভীর মুখে নির্বিকার ছিল এখন তাদের মুখে এত হাসির ঝড় ঝড়ানিটি কেন? নানী ডান হাতের হুকা বাঁ হাতে নিয়ে বলল, 'হায় রাম, ভরত ওহার বাপ চাচা, ঘণ্টাভর আগেই নাহে পর চল গেইলান।'

নায়ে পর চল গেইলান? সর্বনাশ! মুখ দিয়ে আমার বাঙলা বুলি বেরিয়ে পড়লো, 'কোথায়?'

এবাব মাঝবয়সী বহুড়ি কৌতুক হেসে জবাব দিল, 'উ লোগন শবজি উবজি লেয়ি শাগঞ্জ বাজার গেইলান।'

শবজি উবজি নিয়ে শাগঞ্জের বাজারে চলে গিয়েছে? চরে এসে জলে পড়লাম? হাতছানির এ কি রহস্য! এখন মূলের কূলে যাবো

কী করে? সন্ধ্যা যে নেমে এলো? আমি একবার দেখলাম যোবতী বহুড়ির দিকে। তার মুখে হাসি, চোখে কৌতুকের ছটা। তাকিয়েছিল আমার দিকে। চোখাচোখি হতেই চোখ নামিয়ে তাকালো মাঝবয়সীর দিকে। জবাব দিল নানী, 'উ কে বাতাইবে হো রউয়া? সবলোগ বাজার গেইলান, আপনা মাল বিকাইবে, ঘরকে মাল খরিদবে। মরদলোগন কো কা কুছ ঠিক বা? সিনিমা উনিমা চল যা সকত।'

আমি অসহায় চোখে একবার উত্তরে তাকালাম, আবার দক্ষিণে। ভরতরা যে কেবল মাল বেচাকেনা করে ফিরে আসবে, তার কোনো নিশ্চয়তা নেই। আবার 'সিনেমা উনিমা'-ও দেখতে যেতে পারে। এক ঘণ্টা আগেই তারা নৌকা নিয়ে চলে গিয়েছে। আর আমি তখন চর, নদী, মূলের কূলের ভাবনায় বিভোর। ধরেই নিয়েছি, আমার তো ভরত আছে, মূলের কূলে যাবার ভাবনা নেই। আসলে, নিশির ডাকে চলে এসেছি, চরের জীবনযাপনের ধারটা জানতাম না। জানলে কখনো এমন ফাঁদে পড়তে হতো না। ভরতই বা ভেবে নিল কেমন করে, আমি বাঙালীদের নৌকায় চলে গিয়েছি?

দোঘটা বোধহয় ভরতদের কারো না। যতক খোয়াড় করেছে, আমার কুতুদের চালাঘরের আড়ালে বসা। দেখতে পেলে নিশ্চয়ই তারা আমাকে ফেলে রেখে যেতো না। আমার এই অগাধ জলে পড়া ছুশ্চিন্তার ফাঁকে মুরি একটি ছোটখাটো খাটিয়া এনে আমার সামনে রাখলো। শুকে দেখেই আমার মনে জিজ্ঞাসা জাগলো, ও যদি আমাকে বাঙালীদের নৌকায় যেতে না দেখে থাকে, সে কথাটা ভরতকে বলবে তো?

খাটিয়াটা রাখবার ফাঁকেই আমি দেখলাম, মটর ক্ষেতের লাল শাড়ি আর এ লাল শাড়ি আলাদা। নীল রঙের একটি জামা ওর কিশোরী গায়ে। চোখে পড়লো, ওর কপালেও লাল সিঁ ছুরের টিপ, সিঁথিতেও তাই। তার মানে, বয়স দশ বারো যাই হোক, ও বিবাহিতা। কে ওর বর, ভরত নাকি? আমি বাঙালাতেই জিজ্ঞেস করলাম, 'তুমি দেখতে পাওনি, আমি ওই ঘরের পেছনে বাসেছিলাম?'

ছুরি আমার দিকে না তাকিয়ে চলে যেতে উজ্জত হয়ে, ফিরে তাকালো। ওর মুখও তেলতেলে। মাথায় আবার একটা এবড়ো খেবড়ো খোঁপাও বেঁধেছে। খোঁপার নিবহুনির বুনট বড় শিথিল। কাঁটাগুলো ভালো করে গোঁজা হয়নি। হয়তো কেশ সজ্জায় তেমন নিপুণ না। ওর শরীরের দিকে তাকিয়ে, বয়সটা নির্ধাৎ অল্পমান করতে না পারলেও, দেখতে পাচ্ছি ও যেন চিত ফান্সনের গঙ্গা। শরীরের কূলে কূলে আঘাট শীতনের অপেক্ষা, কিন্তু লক্ষণ এখনও অস্পষ্ট। ও তুরুর কুঁচকে এক মুহূর্ত আমার দিকে তাকালো, তারপরে ছুই বহুড়ির দিকে। তাকাতাই ওর লাল কৃষ্ণকলি ঠোঁটের কোণে হাসির ঝিলিক দেখা গেল। নিশ্চয় কেবল মাথা নেড়ে, আস্তে আস্তে কয়েক পা সরে গেল। তারপরেই এক দৌড়ে, দক্ষিণের চালাগুলোর আড়ালে।

আমি হতাশ অসহায় চোখে আবার মাঝবয়সী বহুড়ির দিকে তাকালাম। সে তখন যোবতী বহুড়ির দিকে মুখ ফিরিয়েছিল। জানি না, ইশারায় কোনো কথা হচ্ছিল কী না। যোবতী বহুড়ির শরীরে যেন আচমকা মাঝ গঙ্গার ঘূর্ণী লেগে গেল। ঝিলাখিল হেসে পিছন ফিরে চলে গেল আড়ালে। সঙ্গে নেটিটাও। ইতিমধ্যে কখন পাহারাদার সারমেয় আমার কাছে এসে গা শুঁকতে আরম্ভ করেছে।

নানী বললো, 'বৈঠ হো রউয়া।'

বস। আমার মাথায় উঠেছে। এদিকে গলা শুকিয়ে কাঠ। মনে মনে বুঝতে পারছি, ভরতরা না ফিরে এলে, পূব পশ্চিম কোনো কূলেই আপাতত যাওয়া সম্ভব না। কুতু বটার। আসবে রাত্রেব খাওয়া সেরে। সে আগমন কখন ঘটবে, তার কোনো নির্দিষ্ট সময় জানি না। সন্ধ্যার পরে এক ঘুম দিয়েও আসতে পারে। কারণ এই ভাঁটা যাবে, তারপরে জোয়ার। জোয়ার শেষ হবে মাঝ রাত্রি ছাড়িয়ে। শেষ রাত্রে জাল টানা। এসব তাদের নিজেদের মুখের কথা।

বুঝতে পারছি, ছটকটিয়ে লাভ নেই। অতএব খাটিয়ায় বসে নানীকে বললাম, 'খোড়া পানি পিয়েগা।'

'হঁ হঁ, কাছে না পিবে বাবা।' নানী বাঁ দিকে মুখ ফিরিয়ে মাঝ-

বয়সীকে বললো, 'যা বেটি বাবাকে তানি পানি পিয়ে দে।'

মাঝবয়সী তৎক্ষণাৎ উঠে চলে গেল। মাঝবয়সী বলছি বেটে, কেন না তার মুখে কিছুটা বয়সের ছাপ পড়েছে। কিন্তু গোটা শরীরে একটুও টোল টাল খায়নি। ছিপিছিপে না, গড়নটাই তার চওড়া। মেদের চিহ্ন নেই। আমি আমার হিন্দিতে জিজ্ঞেস করলাম, 'এ বেটি তুমকো কৌন লাগতা?'

নানী হুঁকা টানবার উত্তোপ করছিল। মুখের কাছে হুঁকাটা তুলেও সরিয়ে নিয়ে হেসে বললো, 'বেটি না জানত কা বাবা? ও হমারি আপন বেটি ভইলি, ভরত কো মা। ভরত কো বাপুকো দেখল বা কি?'

আমার হিন্দি জবাবের অর্থ করলে দাঁড়ায়, 'চরে যখন এলাম, তখন তোমার বেটি একজনের সঙ্গে আলু তুলছিল।'

'হঁ হঁ, ও হমারি দামাদ ভইল।' নানী বললো, 'ভরতকে বাপু। অর ভরতকে জরু দেখলবানি কি ছুরি বাবা?'

আমি বললাম, 'ভরতের জরু কি বাবা?'

'হায় রাম।' নানী কেসো গলায় খক খক করে হেসে উঠলো, 'ছুরি ভরতকে ছোট। বহিন ভইলি। ছোট। এক লোক। না দেখল বা কি লাবা, অবহি তো ইহ পর আপন মায়ীকে খাড়া রহল বা। ওহি হনা ভরতকে জরু বেটা।'

নানীর কথা শেষ হবার আগেই ভরতের মা চালার পিছন থেকে সামনে এলো। ডান হাতে একটি বর্কঝকে পিতলের ঘটি, বাম হাতে এনামেলের একটি গেলাস। তার ঠোঁটের কোণে মিটিমিটি হাসি। আগেই তার ঝিলাখিল হাসি শুনে বুঝছি, ঠোঁটের হাসিটি কেঁতুকের। একটু যদি বা লজ্জার লেশ থেকেও থাকে, চলায় কাজে সহজ আর আনাম্যাস। আমার দিকে বাঁ হাত বাড়িয়ে গেলাসটা এগিয়ে দিল। আমি হাতে গেলাস নেবার পরে, সে যখন ঘটি থেকে জল ঢাললো আমার নজর চোখা হলো। কিন্তু তার দরকার ছিল না। ঘটির জল যে কলের পানি, দেখেই বোঝা গেল। চুমুক দিয়ে আরও নিশ্চিত

হওয়া গেল। পর পর দু-গেলাস জল পানের পরে আর একটু জল নিয়ে মুখে বুলিয়ে নিলাম।

জলের ছোঁয়ায় আরাম লাগলো কিন্তু ঠাণ্ডাও লাগলো। সূর্য ডুবে গিয়েছে, এখন শ্রাব্ধ সন্ধ্যার ধূসর আলো। মাঝের রোদে ভাত ছিল বটে। মাঝ গঙ্গার চরে এখন ঠাণ্ডায় যেন মা শিরশির করছে। ভরতের মা আমার হাত থেকে গেলাস নিয়ে চলে গেল। নানী ছ'কা টানছে ভুড়ুক ভুড়ুক। কিন্তু খোঁয়া বেরোচ্ছে না। আশ্বিন নিভেছে, অথবা তামাক খতম হয়েছে। আমি চাদরটার উঁজ খুলে গলায় বুক জড়ালাম। ককের দল এপার ওপার করছে। নিশ্চয় যে যার বাড়ি ফিরছে; দূরের উত্তরে ডানলপের খেয়াঘাটের নৌকা পারাপার দেখতে পাচ্ছি। কিন্তু জানি, উত্তরের সৌমান্য গিয়ে ডাকলেও তারা শুনতে পাবে না। হাতের ইশারা যদি বা দেখতে পায়, চড়ায় আসবে কী না সম্ভেদ। আমি পকেট থেকে সিগারেটের প্যাকেট বার করলাম। মনে পড়লো, নৌকায় সিগারেট দেখে, নানীর ব্যগ্র ব্যাকুল হাত বাড়ানো। এখনো কয়েকটি প্যাকেট পকেটে আছে। নেশার ভাণ্ডার পূর্ণ রাখাটাও আমার একটা নেশা। এটা আমার অভিজ্ঞতার ফল। সময়ে অসময়ে বড় বেকায়দায় পড়ে যেতে হয়। অতএব এখনো নানীকে দু-একটা সিগারেট দান করতে আমার কৃপণ হওয়ার দরকার নেই। বললাম, 'নানী, সিগারেট চলেবে?'

নানী বাঁ হাতে ডান হাতের ছ'কা মুখ থেকে সরিয়ে বাঁ হাতে নিল। মুখে অনেকগুলো ভাঁজ ফুটিয়ে ভুট্টা দানা বলসানো দাঁত দেখিয়ে হাত বাড়ালো, 'হঁহা দে রউয়া। দুপহর মে ভাত খায়ি তুমুকে সিগ্রেট পিলেবানি। ছলারি পি লেলি।'

আমার খাটিয়া থেকে নানীর দূরত্ব কয়েক হাত। অতএব আমিই উঠে এগিয়ে গিয়ে নানীকে সিগারেট দিলাম, আর তখনই চোখে পড়ে গেল পিছনের চালার আড়ালে হুরি এদিকেই মুখ করে দাঁড়িয়ে আছে। আমার সঙ্গে চোখাচোখি মাত্র মুখ ফিরিয়ে নিয়ে তাড়াতাড়ি দক্ষিণে পা বাড়ালো। ওর সঙ্গে নেংটিটাও ছিল। সেও দৌড় দিল। এই

প্রথম দেখলাম নেংটিটার গায়ে একটা কাঁপড় জড়িয়ে গলার পিছনে আলগা গিঠ দিয়ে দিয়েছে। তলার নেংটিটা ঢাকা পড়ে গিয়েছে। আমি নানীর কাছে গিয়ে তার হাতে সিগারেট দিলাম। তার মুখের হাসিটি আরও বিস্মৃত হলো। নৌকার মতনই সিগারেটটা নাকের কাছে ধরে নিঃশ্বাস টেনে বললো, 'বাবু, বাসু বহুত আচ্ছা ভইল বা।'

আমি নিজের সিগারেট ধরিয়ে কাঠির আশ্বিন নানীর মুখের কাছে ধরলাম। নানীর সেই একই রস, 'রহে দে বাবা, বাদমে শিওর। রাতে দো খানা খায়ি 'পর ই চিস পিওব।'

আমি আর একটা সিগারেট বের করে নানীর দিকে এগিয়ে দিয়ে বললাম, 'তা হলে আর একটা রেখ দাও, খটা এখন পিয়ে নাও।'

অর্থাৎ, আমি আমার শিল্পাঞ্চলের বাজারি হিন্দিই চালিয়ে যাচ্ছি। নানী একেবারে বিগলিত, তবু বললো, 'এ রউয়া, তোহার কমতি হো খাইব।'

বললাম, 'আমার এখনও বহুত আছে। কমতি হলে তোমার ছ'কো টানবো।'

নানী এবার কেসো গলায় খলখলিয়ে হেসে উঠলো। 'হায় রাম, তু চিলম পিবে বাবা?'

নানীর কথার সঙ্গে সঙ্গেই, ঠিনঠিনে হাসির শব্দে মুখ তুলে দেখলাম, চালার পশ্চিম গায়ে দাঁড়িয়ে ভরতের বউ হাসছে। তার শাশুড়ি ছলারিও দক্ষিণের আড়াল থেকে এগিয়ে এলো। চোখে তার জিজ্ঞাসা। নানী তাদের দিকে মুখ ফিরিয়ে বললো, 'বাবা কহতানি কি চিলম পিবে। দো সিগ্রেট হাম দেওবানি।' সে ডান হাতে একটি সিগারেট তুলে দেখালো। তারপরে আমার দিকে হাত বাড়িয়ে আর একটা সিগারেটও নিল। ছ'কাটা বাড়িয়ে দিল ভরতের বউয়ের দিকে। বাঁ হাতে একটা সিগারেট নিয়ে ডান হাতে আর একটা ঠোঁটের কাছে ধরে, আমাকে বললো, 'দে বাবা, সলাই জ্বালা দে।'

আমি দেশলাইয়ের কাঠি জ্বালিয়ে, এগিয়ে ধরলাম। নানী ঠোঁট ছুঁচলো করে সিগারেট ধরালো, জ্বোর টান দিল। কসতে আরন্ত

করলো খক খক করে। তার মধ্যে রুদ্ধ স্বরে বললো, 'জেরা কড়া বা।'
কথার মধ্যেই ঠোঁটের কবে লাল গড়িয়ে এলো। সিগারেটের গোড়া
ভিজ্জে জবজবে হয়ে গেল। ছলারি বলে উঠলো, 'কড়া বা তো কাছে
পিইতানি?'

'চিঁজ বহুত বঢ়িয়া বা।' নানী বললো ছলারির দিকে হাত বাড়িয়ে,
'লে, তু পি।'

ছলারি হেসে উঠে লজ্জায় চালার আড়ালে চলে গেল। ভরতের
বউও হাসতে হাসতে ছঁকা নিয়ে শাশুড়ির অহুসরণ করলো। নানী
হেসে বললো, 'সরম ভইল।'

আমি ফিরে আবার খাটিয়ায় বসতে গেলাম। দেখলাম, হুরি
চালা ঘরের পূর্ব দিকে দাঁড়িয়ে আছে। পূর্ব দিকেও একটি চালা ঘর।
দু পাশে ছুই চালা, মাঝখানে চলাফেরা, ঘরকন্নার কাজের জায়গা।
নৌকো থেকে প্রথম নেমে মনে হয়েছিল, এক আঁখি চালা না, দক্ষিণের
নীমানায় যেন অনেকগুলো ঘর নিয়ে একটি পাড়া। আসলে সাঙ্কুল্যে
খড়ের দোচালায় চাল জুড়ে তিনটি ঘর। ঘর কয়টির পিছনে সেই
বাড়ালো গাছটি।

আমি সিগারেট ধরলাম। হুরি এবার আমাকে দেখা মাত্রই চলে
গেল না। নীচু চালার ওপর দিয়ে, ও পূর্ব দিকে মুখ করে দাঁড়িয়ে
আছে। নেংটিটা ওর গায়ের কাছে। হুরির নিশ্চলতাই বোধহয় ওকে
মাহল জুগিয়েছে। কালো চোখে প্যাট প্যাট করে আমাকে দেখছে।
চোখাচোখি হলেই, চোখ ফিরিয়ে নিচ্ছে। কিন্তু প্রায় সম্ভ্যার ধূসরতায়
ক্রত রাত্রের অন্ধকার নামছে। আমি সিগারেট ধরিয়ে টান দিলাম।
এত দিনের হাতছানি, আর এতদিনের চরে আসার সাধ, সবই এখন
আমাকে অন্ধ পাখি করে তুলছে। এপারে ওপারে জলে উঠেছে বিজলি
বাতি। এতক্ষণ মূলের কূলের যে-শব্দগুলো পাইনি, সেই ভারি যান-
বাহনের শব্দ স্পষ্ট ভেসে আসছে চরের বুকে। এখন এক চিন্তা, ভরত
কখন আসবে।

এই উদ্বিগ্ন চিন্তার মধ্যেও, একটা জিনিসের অভাবে গোটা শরীর

মনটাই যেন আনচান করছে। জিনিসটির নাম চা। সেই দ্বিপ্রহরেই
একবার চা চা-প্রাণ চাচিয়ে উঠেছিল। কিন্তু চরে আমার নতুন
স্বাদটা প্রাণটাকে আথে ব্যথে আকুল করেনি। এখন চায়ের কথা
মনে হতেই, মূলের কূলের টানটা যেন শক্তে কণ্ঠে বেড়ে গেল। এরা
কি চা খায় না? শহরের সঙ্গে যাদের রোজ পেট খ্যাটের লেনাদেনা,
চায়ে কি তাদের বিরাগ থাকতে পারে? শহরের বাজারে গল্প বেচা
কেনা করতে যায়, আবার সিনিমা উনিমাও দেখতে চায়, চা কেন
খাবে না?

এ হলো আমার যুক্তি। এ চরের সংসারের পান ভোজনের
হালচাল আমার জানা নেই। তা না হয় না-ই হলো। শহরে
ভাঙলোকের আস্তানায় বসে নেই তো। বসে আছি চরে, চারদিকে
জল। একটা যাত্রা ভঙ্গ করে হাজির হয়েছি। আমার ভরত পাটনৌ
এলেই আবার চলে যাবো। জিজ্ঞেস করতে আপত্তি কি, চায়ের ব্যবস্থা
আছে কী না? আমি একবার দেখলাম হুরির দিকে। এখন ওকে
ঈশং আবহা দেখাচ্ছে। নানীর দিকে ফিরে জিজ্ঞেস করলাম, 'নানী
তোমরা চা খাও না?'

'কাঁহে না পিওব হো রউয়া?' সঙ্গে সঙ্গে নানীর পালটা জবাব,
'বোলত কাঁহে না বাবা?' বলেই সে এক হাঁক দিল, 'এ ভরতকে মারী,
এ ছলারি।'

নানীর ভাকের মধ্যেই দেখলাম, হুরি ছুই চালার মাঝখানে দিয়ে
দক্ষিণে চলে গেল। নেংটিটাও সঙ্গে সঙ্গে। এদিকে নানীর চেহারা
ক্রমে অস্পষ্ট হয়ে উঠেছে। তার পাশ থেকেই স্বর শোনা গেল, 'কা
কহতানি?'

'কে বা? মনিয়া?' নানী জিজ্ঞেস করলো।

রমণী স্বরের জবাব শোনা গেল, 'ছঁ।'

'বাবা হমলোগনকে মেহমান বা। তানি চায়ে পিলাই দে।' নানী
বললো।

স্বর শোনা গেল, 'বনাইল যাই। মাতারি কহেলে কি বহারে ঠাণ্ডা

হাওয়া দেতানি। বাবুকা ঘরে কাঁহে না লেয়ি যাতানি ?

‘হুঁ, সচ কহলে তু, হমে ভি জারা লাগতানি।’ নানীর আবছা মুর্তর মুখ আমার দিকে ফিরলো, বললো, ‘এ রুটরা ঘরে পর চল বাবা।’

এ বড় ব্যাজ। ঘরে কেন ? খোলা আকাশের নীচে চরের বৃকে, এই তো বেশ ভালো বসেছি, এমন বস। আর কোনদিন হবে কী না কে জানে ? আকাশে একটি করে তারা ফুটেছে। কোন পক্ষ চলছে জানি না। নীল আকাশ ক্রমে এখন কৃষ্ণকালো। তারাগুলো ফুটেছে যেন হলুদ কৃষ্ণকলির ঝাড়ের ফুলের মতন। পূব দিগন্তের কোথাও আলোর ইশারা নেই। দেখে শুনে তাই মনে হচ্ছে, কৃষ্ণপক্ষ চলছে। ! আমি নানীকে বললাম, ‘তুমি যাও, আমি একটু বাইরেই বসি।’

নানীর কাছাকাছি থেকেই রমণী স্বরে ঈষৎ হাস্য শোনা গেল, তারপর বাত, ‘শহর মোকমবালা বাবু, কেইসান ই ঝোপাড়ি’ পরে বৈঠলবে হই নানী ?

এবার বোঝা গেল, বাত দিচ্ছে ভরতের বউ, নাম তার মনিয়া। মায়ের নাম ছলারি, মেয়ের নাম হুরি। পুত্রবধূর নাম মনিয়া। যতৌদুর জানি, মনিয়া বাঙলা ভাষার ময়না ছলারি কি ছলালী ? হুরি নাম জীবনে কখনো শুনিনি। নানী বললো, ‘হুঁ, তু সচ কহলবাজি, মগর এ জারা মে কৈসান বৈঠল যাওত ? এ রউয়া, তানি তখলিয় লে বাবা, ঘরে’ পর চল।’

‘কমসে কম, উ বগলে পর চুলাহ নজদিক আওত কাঁহে না ?’ এবার সামনের ছুই চালার মাঝখান থেকে নতুন স্বরে শোনা গেল। এ স্বর নিশ্চয়ই হুরির, এবং এই ওর প্রথম বানী।

নানী বলে উঠলো, ‘হ হ, চুলহাকে আগমে জারা কমতি লাগতেনি। চল বাবা ঘরকে পিছে চল।’

নানীর ছায়া মূর্তিকে উঠে দাঁড়াতে দেখলাম। আমি তাকেই অহুমরণ করতে যাচ্ছিলাম। হুরি বলে উঠলো, ‘ই বগলমে কাঁহে না আওত ?’

অন্ধকারে এখন আর স্পষ্ট বৃথতে পারছি না, হুরির মুখ কোন

দিকে। কাকে বলছে ? আমি নানীর দিকে দেখলাম। সে পশ্চিমের আড়ালে অদৃশ্য হয়ে গেল। সেই মুহূর্তেই চোখে পড়লো, ছুই চালার মাঝখানের বাঁ দিকে আঙুনের শিখার আলো কাঁপছে। ছুই চালার মাঝখানে, কাছাকাছি হুরির অধরবটা স্পষ্ট হয়ে উঠলো। এমন কি, ও যে আমার দিকেই তাকিয়ে আছে, সেটাও এখন স্পষ্ট। এবার ওকেই জিজ্ঞেস করলাম, ‘তুমি কি আমাকে বললে ?’

‘না তো কেকারে ?’ হুরিও যেন এবার কৌতুকে ঈষৎ হেসে বাজলো।

এদের কথার সবই স্পষ্ট, কেবল, সব কথাতেই জিজ্ঞাসার সুর। আমি খাটিয়া ছেড়ে উঠে দাঁড়ালাম। ঘরের এদিকটার এমন কিছু এবড়ো খেবড়ো না। আমি পা বাড়াতেই হুরি এগিয়ে গেল। আমি ওকে অহুমরণ করে, ঘরের পিছনে, প্রায় সেই ঝাড়ালো গাছটার কাছে গিয়ে দাঁড়ালাম। পশ্চিমের চালা ঘরটা লম্বা। পূবের দিকে পাশা-পাশি ঘর ছোটো, মাপে পশ্চিমের ঘরের সমান। আসলে, ইতিমধ্যে উত্তরের ঠাণ্ডা বাতাস কিঞ্চিৎ বইতে আরম্ভ করেছিল। দক্ষিণে, ঘরের আড়ালে এসেই সেটা টের পাওয়া গেল। ঝাড়ালো গাছটা যে কী গাছ, এখনও বৃথতে পারিনি। তার ওপর ডালের পাতায় হালকা বাতাসের কাঁপন। কিন্তু আমাদের গায়ে লাগছে না।

দেখলাম, চালা ঘর আর গাছের মাঝামাঝি জায়গায়, মাটির গড়া কাঠের উনোন। ছলারি ইতিমধ্যেই কাঠের আঙুন উসকে তুলেছে। নানী গিয়ে বসেছে উনোনের ধার ঘেঁষে। তার পাশে ভরতের নোটটিটা, গোটা গায়ে কাপড় জড়ানো একটা পুতুলের মতন। চালা ঘরের দক্ষিণের দরজা দিয়ে, মনিয়া যাতায়াত করছে, আর শাণ্ডুড়িক নানান কিছু যোগান দিচ্ছে। হুরি একটা চটের বস্তা, আসন হিসাবে পেতে দিল নানীর পাশে। তারপরে আমার দিকে তাকালো।

তাকানোর ইঞ্জির্ভটা বৃথতে অসুবিধা হলো না। আমি নানীর পাশে গিয়ে চটের বস্তায় বসলাম। ছলারি বোধহয় খেয়াল করেনি। তার মুখে তখনও শাণ্ডুড়ির প্রসাদ সিগারেটের শেবাংশ ছিল। আমাকে

দেখতে পেয়েই, বাটতি শেষ টান দিয়ে, ফেলে দিল উনোনের মধ্যে। আর 'আমিও' খেয়াল করিনি, প্রায় আমার গায়ের কাছেই, গুটিগুটি হয়ে অভ্যস্ত নিরীহভাবে চৌকিদার শুয়ে আছে।

চরের বৃকে এমন একটা অসময়ের কথা কৌনদিন ভাবতে পারিনি। তাও আবার অনেক দিনের অনেক বারের দেখা চর, যেন এক নতুন সময় আর ছবিকে হাজির করে দিল। মূলের কূলে যাবার উদ্দেশ্যে নাময়িক ভাবে ভুলেই গেলাম। আমাদের সকলের গায়েই লাল আঙনের শিখা কাঁপছে। ছলারি উনোনের চওড়া হা মুখে ছুটো লোহার শিক বসিয়ে, তার ওপর চাপিয়েছে একটা এলুমিনিয়ামের ছোটখাটো হাঁড়ি। মনিয়া একটা টিনের গোল চাকতি এনে তার ওপরে ঢাকা দিয়ে দিল।

শাশুড়ি বউ কাজে ব্যস্ত। হুরি পুর্বদিকের ঘরের দক্ষিণ মুখে দরজার সামনে দাঁড়িয়ে। চালা ঘরের উত্তরে কোনো দরজা নেই। দক্ষিণ মুখে যে দরজা আছে, উত্তর থেকে তা দেখা যায় না। আশে-পাশের খানিকটা সীমানা দেখেই বোঝা যাচ্ছে, রীতিমতো লেপামোছা। তার মানে, এই দ্বৈপায়নদের ঘরকন্নাটা এদিকেই। উনোন একটা জ্বলছে বটে। ছ হাত ফারাকে আর একটা উনোনও রয়েছে।

কিন্তু আমার আন্দাজে বিস্তর ভুল। ভেবেছিলাম, চালাঘরগুলো চরের একেবারে দক্ষিণ সীমানায়। তারপরেই বালুর নীচে জলের স্রোত। আসলে, বাড়ালো গাছটা ছাড়িয়েও, প্রায় পনের-বিশ হাত জায়গা। স্পষ্ট দেখতে না পেলেও, উনোনের আঙনের আলোয় দেখতে পাচ্ছি, ওদিকের জমিও খালি নেই। কোনো কিছুর চাষ করা হয়েছে।

‘এ রউয়া তোহার ঘর কই বা?’ নানী চূপ করে থাকতে পারে না।

বললাম, ‘কাছেই।’

বলে চোখ তুলে তাকিয়ে দেখলাম, সকলের দৃষ্টি আমার দিকে। স্বাভাবিক, দৃষ্টিতে তাদের কোঁতুহল। কিন্তু আমার হিলি ভাবার

‘নজদিক মে’ মানে কী? কাছে বলতে তো অনেক জায়গাই বোঝায়। ছলারি অনায়াসেই উনোনের ওপর থেকে এলুমিনিয়ামের হাঁড়িটা নামিয়ে, মুখ ফিরিয়ে তাকালো মনিয়ার দিকে। শাশুড়ি বউ দুজনেই হাসলো। হুরির দিকে মুখ ফিরিয়ে দেখলাম, ও ঠোঁট টিপে রয়েছে। নানী বললো, ‘নজদিক ন সামঝাইলে বাবা, পূর্ব বা পশ্চিম? শাগঞ্জ না, হালিশহর?’

বললাম, ‘আরও দক্ষিণে।’

এবার মনিয়া হেসে উঠে চালার মধ্যে চলে গেল। হুরি পূর্বের ঘরের দরজা ছেড়ে পশ্চিমের ঘরে মনিয়ার কাছে কাছে চলে গেল। ছলারি হাঁড়ির টিনের চাকতির ঢাকনা খুলে, একটা কোঁটা খুলে, আগে গুঁড়ো চা ছুঁড়ে দিল। আর এক কোঁটা খুলে, ভিতরে হাত ঢুকিয়ে তুলে আনলো, চিনি না, বড় এক টুকরো ভেলি গুড়। ছোট একটা এনামেলের বাটি থেকে অল্প কিছু দুধ। সবই করলো চোখের পলকে, এবং আবার ঢাকা দিল টিনের চাকতি দিয়ে। তারপরে একবার আমার দিকে দেখে নানীকে বললো, ‘তোহার বাবা আপন ঘরেকো ঠিকানা বোলত না চাহে হাই মাতারি।’

নানী আমার মুখের দিকে তাকিয়ে হাসলো। আঙনের লাল আলোয়, বৃড়ির মুখের ভাঁজগুলো গাঢ় দেখাচ্ছে। যেন মুখটাই বদলে গিয়েছে। বললো, ‘কাহে হো রউয়া, তোমার মোকাম হম ছিন লিইবকি?’

আমি হাসলাম, বললাম, ‘ছিনিয়ে নেবার মতন আমার মোকাম নেই নানী।’

‘শাদী উদি করলেবানি না কা?’ নানী আবার জিজ্ঞেস করলো।

ছলারি তাকিয়েছিল আমার দিকে। পশ্চিমের ঘরের দরজায় মনিয়া আর হুরির মুখ একসঙ্গে উঁকি দিল। এ জবাবটা শোনবার কোঁতুহলের মাত্রা কিছু বেশি। আমি বললাম, ‘শাদী তো সব পুরুষই করে নানী, সেটা এমন আর কী কথা?’

ছলারি একেবারে বালিকার মতন হেসে উঠলো। মাঝ গঙ্গার চরের

বুকে, কাঠের আগুনের লাল আলোয়, ভরতের মাকে যেন এক আশ্বর্ষ অলৌকিক নারী মূর্তি বলে মনে হলো। এখনো তার কালো চোখে মেঘ বিজলীর খেলা আছে। সে হাসতে হাসতেই একবার আমাদের দেখে নিয়ে, একটা এলুমিনিয়ামের গেলাস কাছে টেনে নিল। গেলাসের মুখে প্রায় একটি খয়েরি রঙের কাপড়ের টুকরো চাপা দিল। বোধহয় চা ছেকে ছেকেই কাপড়ের টুকরোর রঙ এরকম দাঁড়িয়েছে। তা ছাড়া চায়ের সঙ্গে ভেলি গুড়ের ছোপ লেগে, রঙ গাঢ়তর হয়েছে।

ভেলি গুড় কেন, চিনি নেই কেন, এসব প্রশ্ন এখানে অবাস্তর। এমন নয় যে জীবনে এই প্রথম গুড়ের চা হতে দেখছি, বা এই প্রথম খেতে চলেছি। ক্ষুধা তৃষ্ণার দায় কোনোকালে মাথের ইচ্ছা পূরণের মুখ চায় না। এতাবতকাল দেখে এলাম পানি ভোজন, যখন যেমন, তখন তেমন। কিন্তু আপাতত গ্যাপার ভিন্ন। নানী আমার বাজারি হিন্দি বাত শুনে অবাক হয়ে জিজ্ঞেস করলো, 'তু কা কহলেবাড়ে, হমে সমঝসে না আইলান হো বাবা। মরদকে সাদী কা কুছ ছোটী বাত বা?'

ছলারি মুখ ফিরিয়ে একবার তাকালো মনিয়া আর হুরির দিকে। মনিয়া হেসে উঠলো। হুরির কিশোরী মুখে বিলাস্ত কৌতূহল। হাসতে গিয়ে ওর ভুরু জোড়া কুঁচকে উঠেছে। ছলারি বললো, 'এ মাতারি, বাঙালী বাবুকে বদন না দেখল? বাবু মরদ লোগনকে সাদী জায়দা উমরসে হোতানি। বাতসে না সমঝাইলে কি?' ছলারি একবার আমার মুখের দিকে দেখে, আবার অনায়াসেই গরম এলুমিনিয়ামের হাঁড়িটি তুলে, গেলাসের মুখে কাপড়ের টুকরোর চা ছেকে ঢাললো।

ছলারি তার নিজের মতন একটা সিদ্ধান্তে এসে গিয়েছে। নানী আমার মুখের দিকে তাকালো। যেন ছলারির কথা যাচাই করার জগুই উনোনের আগুনের আলোয় আমার বদনটি দেখে নিচ্ছে। তার মুখেও আগুনের আলো কাঁপছে। লোমহীন ভুরু জোড়া কুঁচকে উঠেছে। মনিয়ার তেলতেলে মুখে হাসি, চোখে যেন সন্দিক্ত কৌতূহল। হুরি মা

ভউজীর মতন সাত সতরো ভাবতে শেখেনি। সে অবাক স্বরে বলে উঠলো, 'এততি উমরমে ইয়কো সাদী না ভইল?'

'না ভইল তো কা? তুহকে দিল চাহতানি, কা?' মনিয়া হেসে বেজে উঠলো।

হুরি হাত তুলে মনিয়াকে গুপ গুপ কিলিয়ে দিল পিঠে। ওর হাতের কাঁচের চূড়ি বেজে উঠলো ঠিনঠিনিয়ে। মনিয়া হাসতে হাসতে ছুটে চলে এলো দরজার বাইরে। হুরি চোখ ঘুরিয়ে এক পলক আমাদের দেখে, ঢুকে গেল ঘরের মধ্যে। নানীও কেসো গলায় থুখ থুখ করে হাসছে। ছলারি এখন ঠোঁট টিপে হাসছে। গেলাসের মুখে চা ছাঁকার কাপড়টি নিংড়ে মনিয়াকে বললো, 'যা, বাবুকে চা দে।'

প্রায় যেন বাঙলা বুলি। মনিয়া ধূমায়িত এলুমিনিয়ামের গেলাসটি তুলে আমার সামনে এনে বসিয়ে দিল। আমি তার মুখের দিকে দেখছি, সে দেখছে না। কিন্তু চোখে ঠোঁটে হাসি। কিশোরী মনদটির পিছনে লাগা কেন? বুঝতে পারি, হুরি ওর বয়সোচিত সারল্যে, অবাক প্রশ্নটি করেছে। আমার মতন বয়সের পুরুষের বিয়ে হয়নি, একথাটা ওর কাছে অবিশ্বাস্য ঠেকেছে। ঠেকবারই কথা। ওর বিয়ে হয়ে গিয়েছে। হয় তো ওর পাঁচ-সাত বছরেই বিয়ের পাট চুকেছে। কেবল ওদের সমাজে না, বাঙলার তালুক মুলুকের খবর যারা রাখে, তারাও জানে, আইনকে কাঁচকলা দেখিয়ে এখনও সাত-আট বছরের মেয়ে কপালে সিঁথি সিঁছর পরে ঘরের আঙিনায় একা দোকা খেলছে। স্বামীটি তার কোথায় তখন মাঠে ঘাটে গরু চরাচ্ছে কি হাল বলদ নিয়ে চাষে নেমেছে, সে খবর কে রাখে? বে' হয়েছে তো হয়েছে, আমি আছি আমার মনে, তুমি থাকোপে তোমার মনে। সময় হলে, বাপ মায়ের মাথাব্যথা আগে। তখন নিজেরাই জামাইকে ডেকে মেয়েকে ঘাড়ে তুলে দেবে। শহরতলীর শিল্পাঞ্চলের কি কথা, খোদ কলকাতায়ও হুরির মতন কিশোরীকে আখছার দেখা যায়। সত্যি মিথ্যা আলাদা, আমার বয়সী পুরুষকে যদি অবিবাহিত ভাবতে হয়, তা হলে হুরির মনে ধঙ্ক লাগাটা অবাক হবার কিছু না।

ঘর গেরস্তি নিয়ে আমার জীব-করণ করম নিশ্চয়ই আছে। কিন্তু ঘর ছেড়ে পথে বেরিয়ে, মাঝ গঙ্গার এই চরে এখন আমার ভিন্ন পরিচয়। লম্বা চওড়া বাত দেবো না, যে ‘আত্মসম্মানে’ বেরিয়েছি। কিন্তু ঘর ছাড়া এই ‘আমি’ আপনাতে আপনি আছি। একে যদি কেউ মুখ বলে, সেটা তার নিজের কথা। বিবাগী বললেও তাই। জীবনের নানা টানা-পোড়নে, দুখ দৈতে বলতে পারো, এর নাম, ‘মনভাসির টান’। অনেকটা বানভাসির মতনই। দিনের পরে দিনে, শুকনো খাতের হাছাকারে প্লাবনের টানে ভেসে যাওয়া। বলতে পারো, ‘বাঁচতে চাওয়া।’ স্বস্তি হলো, ক্ষতি কারোর নেই।

আপাতত মন বিচারের হাকিমকে সেলাম। হাত বাঁড়ালাম ধুমায়িত এলুমিনিয়ামের গেলাসে। বাড়িয়েই যেন সাপের ছোবল খেলাম। এলুমিনিয়ামের গেলাস না, কাঠের আগুনের আঁড়া যেন। মনিয়া ভখন নানা আকারের পাত্র ছলারির দিকে এগিয়ে দিচ্ছিল। আমার ছুরবস্থা দেখেও তার হাসির ঝংকার শোনা গেল। ছলারির মুখেও হাসি। তবু যেন একটু গম্ভীর চালেই বললো, ‘পাতিয়া উড়িয়া কাহে না কুছ দেইলে ?’

পাতিয়া উড়িয়াটা কি বুঝতে পারলাম না। নানী তার গায়ের ময়লা চাদরের অংশবিশেষ আমার দিকে এগিয়ে দিলে বললো, ‘তোহার বাবু হাত হো রউয়া, এততি গরম পকাড়ে না সাকতবে। ইয়ে লে।’

আমি তাড়াতাড়ি পকেট থেকে রুমাল বের করে বললাম, ‘এইটাতে কাজ হবে। কিন্তু পাতিয়া উড়িয়াটা কী?’

ছলারি তখন পাঁড়ে পাঁড়ে চা ঢালছে। হাসি মুখ না তুলেই জবাব দিল, ‘প্যাড়কে পাতিয়া হো জী।’

তার মানে গাছের পাতা? এটা একটা নতুন শিক্ষা। গরম পাত্র ধরতে হলে, কিছু না পাও, গাছের পাতা জড়িয়ে ধরো। মনিয়া নানীর সামনে একটা ধুমায়িত চায়ের কলাইয়ের বাটি এগিয়ে দিল। নানী বললো, ‘হঁ, প্যাড়কে পাতিয়া হো বাবা। তু শহরকে বাবুলোগ ক্যায়সে জানলবে?’ বলেও সে কিন্তু অনায়াসেই কলাইয়ের বাটি

তুলে, ছুঁচলো তাঁটি কানায় ছুঁইয়ে শূড়ুত করে চুমুক দিল।

কেন, ওদের হাত কি লোহার গড়া? লোহাও তো তাতে। এদের হাত কি চরের মাটি দিয়ে গড়া? নানীকে বাটিতে চুমুক দিতে দেখে নেংটিটা তার গায়ের কাছে আরও ঘনিয়ে বসলো। নিজের গোটা গা ঢাকা কপড়ের ভিতর থেকে একটা হাত বের করে নানীর কোলে রাখলো। নানী বললো, ‘সবুর যা বেটা, দেতানি!’

মনিয়া চালার দিকে তাকিয়ে ডাকলো, ‘এ ছুরি, চা পিয়ে যা।’

চালার ভিতর থেকে কোনো জবাব এলো না। ছলারি জলন্ত কাঠ উনোনের ভিতর থেকে খানিকটা বাইরে টেনে নিয়ে এলো। তারপরে নিজের চায়ের বাটিতে চুমুক দিল। মনিয়া ছোটো বাটি হাতে নিয়ে ঘরের মধ্যে গেল। শীতে আমি তেমন কাবু না। কিন্তু ভেলি-গুড়ের স্বাদ গন্ধ যাই থাকুক, আর ছুধের স্বাদ বলতে প্রায় কিছুই না থাকে। এ গরম পানীয় এখন অমৃততুল্য। একা আমার না। নানী ছলারি, দুজনেরই দেখছি, মৌতাত জমেছে। জমেছে নেংটিটারও। সে মাঝে মাঝেই নানীর বাটিটা নিজের হাতে ধরে মুখের কাছে নামিয়ে চুমুক দিচ্ছে।

চালার ভিতর থেকে টুকরো টুকরো কথা ভেসে আসছে। সঙ্গে হাসিরও। তারপরেই দেখি দুজনে দুজনের চায়ের বাটি হাতে নিয়ে চালার বাইরে এলো। মনিয়া একবার দেখলো আমার দিকে। তার চোখের তারায় তাঁটের কোণে হাসি। ছুরিও মুখ ভার করে নেই। বঙ্গ কিশোরীর তাঁটে ঈষৎ সলজ্জ হাসির রেখা। দুজনেই ছলারির কাছাকাছি বসলো।

জলন্ত কাঠের আগুনের শিখা একটু কমে গিয়েছে। আলোও কিছু কম। তবু প্রায় সকলের মুখই স্পষ্ট দেখা যাচ্ছে। আমি হঠাৎ জিজ্ঞেস করলাম, ‘ছুরির স্বামীও (মরদ শব্দ ব্যবহার করেছি) কি বাজারে গেছে?’

কথাটা সভার মাঝে পড়তেই, হঠাৎ যেন কেমন একটা স্তব্ধতা নেমে এলো। সকলের হাত মুখ নিশ্চল, চা পানেও ঠেকে। একটু

অপ্রস্তুত হয়ে গেলাম। হয় তো অনুচিত কৌতুহল প্রকাশ করছি। কিন্তু অস্থায় কিছু ভেবে বলিনি। মনে এলো, জিজ্ঞেস করলাম।

প্রথমেই হেসে উঠলো মনিয়া। তারপরেই ছুরি উঠে পড়বার উদ্যোগ করলো। মনিয়া ঝটতি ওর হাত টেনে ধরলো। ছুরি বললো, 'ইয়ো মে সরম কা বাত কা বা? বৈঠ যা।'

নানী বললো, 'হ, সরম কা বাত কা বা? বাবা পুছলবানি, তোকার আদমি কই বা?'

'ছুরিকে আদমি ইটাগড়'প'র আপন বাপ মাতারিকে সাথই রহতানি।' ছুরি বলল, 'ওহি'প'র চটকলমে কাম করতানি। আগাইলা ফাগুয়া বাদ গাওনা হওলবে, বাদে ছুরি শশুরাল ঘর চল যাইব।'

তথাপিও দেখছি ছুরি মনিয়ার হাত থেকে নিজেকে ছাড়বার চেষ্টা করছে। কিশোরী লজ্জা পেয়েছে। জানি না, আমার ওপর বিরক্তও হয়েছে কী না। ছুরি মনিয়াকে বললো, 'ছোড়ে দে বহ।'

মনিয়া ছেড়ে দিতেই ছুরি এক ছুটে আবার ঘরের মধ্যে। নানী সম্মেহে হেসে বললো, 'সরম লাগল বা।'

ছুরির মতন বয়সী মেয়ের স্বামীর প্রসঙ্গে বোধহয় লজ্জা পাবারই কথা। কিন্তু গোটা ব্যাপারটা অনেকখানি আঁকাবাঁকা। ছুরি চরের মেয়ে। ওর শশুর শাস্ত্রি স্বামী থাকে ইটাগড়ে। অর্থাৎ টিটাগড়ে। আজ পর্যন্ত জগৎরলাল নেহরু ছাড়া, কোনো হিন্দিভাষীর মুখে, টিটাগড়কে ইটাগড় বলতে শুনি নি। শুধু এইটুকু জানি টিটাগড় আসল নামের মধ্যে নাকি একটা অঙ্গীল শব্দ রয়েছে, যা মুখ ফুটে উচ্চারণ করা যায় না। কিন্তু চরের সঙ্গে মূলে কুলের বৈবাহিক সম্পর্ক ঘটলো কেমন করে?

এ আবার জিজ্ঞাসার কী আছে? অনুমান করেই নেওয়া যায়, দেশ ঘর ছেড়েও প্রবাসে নিজদের সমাজ সভা থাকে। সামাজিকতার অসুবিধা কী? মেলাতে পারছি না যেটা, তা হলো, চরের মেয়ের বর কারখানার কর্মী। সেটাও আমার ভেবে লাভ নেই। মূলকি

যোগাযোগের সূত্র একটা নিশ্চয় আছে। মনিয়া চায়ের বাটি রেখে উঠে দাঁড়ালো, ছুরির দিকে তাকিয়ে বললো, 'গাওনাকে মতলব বাবু নামবাইলেন কি?'

কথাটা বলেই সে একবার আমার দিকে দেখে, নিজেও আবার চালার মধ্যে ঢুক গেল। আমি তার দিক থেকে মুখ ফিরিয়ে তাকালাম ছুরির দিকে। ছুরি আমার দিকে তাকিয়ে ঠোঁট টিপে হাসছে। চোখে তার জিজ্ঞাসা। আমি বললাম, 'শুনেছি শাদীর পরে গাওনা হয়।'

ছুরি আর নানী একসঙ্গে হেসে উঠলো। ছুরির দুই রকমের স্বর। ছুরি বললো, 'হ, ঠিক কহলেবারে বাবু, মগর সাদী হওত বচপনেমে, গাওনা হওত লেড়কি যবে জোয়ান হোতি।'

'গাওনাকে আগে আদমিকে সাথ লেড়কিকে সুরত দেখ না পায়ো।' নানী আরও একটু ব্যাখ্যা করে বললো, 'তু বাঙালীকে এইমান বলতহি কি?'

জবাবটা কী দেবো, হঠাৎ ভেবে পেলাম না। গাওনার ব্যাখ্যাটা আমার একেবারেই যে অজানা, তা না। শহরতলীর শিল্পাঞ্চলে বাস, বিহারের অধিবাসীদের সঙ্গে মেলামেশা নেই, এমন না। সাদীর পরে গাওনা, আর সেটা যে গ্রাম বাঙালারও একরকমের সাবৈকি প্রথা, তাও জানি। বিবাহিতা বালিকাতে যখন রমণী লক্ষণ দেখা দেয়, তখন স্বামীর ডাক পড়ে। শাস্ত্রীয় ভাষায়, এর নাম দ্বিতীয় বিবাহ।

আমি নানীকে জবাব দিলাম, 'চলে, গাঁয়ে ঘরে, যেখানে বাচ্ছা মেয়েদের বিয়ে হয়।'

'হঁ, গাঁয়ে পর হওত, শহরবাবুকে ঘর না হওত।' ছুরি বললো।

তার কথা শেষ না হতেই, চালার ভিতর থেকে রমণী স্বরের গানের গুনগুনানি ভেসে এলো। গানের কথা একান্তই অস্পষ্ট, আমার পক্ষে বোঝাও মুশকিল। কেবল টুকরো কয়েকটি কথা কানে এলো, 'হোই লায়ো.....নাচে বিচে.....করত সিংহার.....' এ গানে সুর আলাদা গায়কি আলাদা। বিহার অঞ্চলের বাঙলা প্রবাসীদের বিয়ের সময়,

মেয়েদের গানের শুর অনেকটা এইরকম শুনছি। তবে, আমার মনে কোনো সন্দেহ নেই, গান গাইছে মনিয়া। তাকে বাধা দিচ্ছে হুরি। বোধহয় দুজনের মধ্যে যত্নাধিক্যও চলছে, তার কাঁকে কাঁকে খিলখিল হাসির টুকরো। নন্দ ভাজের রঙ্গ জমেছে ভালো।

এদিকে দেখছি, ছলারি আর নানীও নিজেদের মনেই হাসছে। গান শুনছে তারাও আর আমার থেকে বেশি উপভোগ করছে নিশ্চয়ই। কারণ তারা গানের ভাষা অহুসরণ করতে পারছে। নেংটিটা চৌকি-দারের মতনই নানীর কোলের কাছে গুটি-গুটি হয়ে পড়েছে।

চরের হাতছানিটাই দেখেছি এতোকাল। কোনো এক তারা ভরা মাঘের শেষের রাত্রে কলকল ছলছল জলের শব্দে, চরের এমন একটি অঙ্গনে এসে বসবো এমনকি আজ সকালেও ভাবিনি। কেউ বলেন, জীবনের ধন কিছুই যাবে না ফেলা। আমি ভাবি ধনাগরের অঙ্কি-সঙ্কি বেবাক ভিন চালে চলে। ছকের ঘরে তার গণাগণিত মেলে না। যদি বেরিয়ে থাকি মনভাসির টানে, তবে মানতে হবে, জীবনের অলক্ষ্যেও এক দুরন্ত মাঝি বৈঠা রেখেছে তার হাতে। না হলে, চরের বুক এ আসরে, কে আমাকে টেনে আনলো।...

আমি পকেট থেকে সিগারেটের প্যাকেট বের করে, আগে একটি নানীর দিকে বাড়িয়ে ধরলাম। নানী দেখে নিয়ে এই প্রথম আমার কাঁধে হাত রেখে বললো, 'তুমি বাবা, হমে তানি চিলিম পিবে।'

ছলারি উঠে ঘরের দিকে যেতে যেতে বললো, 'বানাকে লিতানি হোই মাতারি।'

ছলারি ঢুকলো ঘরের মধ্যে। কাঠের আঁপন অনেকটাই ঝিমিয়ে গিয়েছে। তবু মনিয়া আর হুরিকে চালায় বাইরে আসতে দেখলাম। ওরা দুজনেই এসে বললো উনোনের কাছে, পাশাপাশি। মনিয়া কাঠটাকে ভিতরে খুঁচিয়ে, নেড়ে চেড়ে, আঁপনের শিখা উসকে তুললো।

আমি সিগারেট ধরিয়ে, পাঞ্জাবীর হাতা সরিয়ে কবজির ঘড়ি দেখলাম। মাত্র সাতটা বেজে পাঁচ। মূলর এই কুলে আলো। এখানে তার রেখা এসে পড়েনি। এ চরে মনে হচ্ছে, ইতিমধ্যেই রাত

গভীর। কথা না বললে, স্তর নিরুপ, কেবল তাঁটার জলের চেউয়ের পাড়ের গায়ে ছলছলানি। সুনলে মনে হয়, বহুকালের যুগ যুগান্তের কতো কথা যেন বলে চলেছে।

'ঘড়িয়া কাঁহে দেখলবানি ছোট ভউজী।' হুরি বলে উঠলো মনিয়ার গায়ে যৌচা দিয়ে। তার মধ্যেই একবার দেখে নিল আমার দিকে।

মনিয়া চোখ তুলে আমাকে একবার দেখলো, তারপর হুরির দিকে তাকিয়ে স্বরে চেউ দিয়ে বললো, 'হমে কাঁহে পুছতানি? হমারি হাতে পর কি ঘড়িয়া বা? হমে দেখতবানি কি?'

নন্দ ভাজের তেপতেলে মুখে, আঁপনের শিখার আলোয় চকচক করছে। সারা গায়ে কাঁপছে আঁপনের শিখা। তাদের দুজনের কথাই বুঝতে পারছি। বুঝতে পারছি, নন্দ ভাজের খুনশুটি ঝগড়ায় একটা আপোষ বোধহয় হয়েছে। কিন্তু হুরির ভাষা ভাববাচ্যে কেন? খাটিয়া থেকে এখানে ভেদে এনে আসবার সময় তো সরাসরি কথাই হয়েছিল। হঠাৎ বিগড়ে গেল নাকি?

মনিয়াকে রীতিমতো ছুঁতে বলতে হয়। ঠোঁটের কোণের হাসিটি তার এমন স্থায়ী হয়েছে, কখন কোন কথায় খিলখিলিয়ে উঠবে, বোঝার উপায় নেই। চোখের উজ্জল তারা ছুটিতেও ঝিলিক লেগেই আছে। কিশোরী হুরির পাশে তাকে সব দিক থেকেই আলাদা দেখাচ্ছে। হুরির চোখে মুখে ক্ষণে হাসি, ক্ষণে ছায়া, ক্ষণে আবার আরও অবাক জক্রুটি। এটি তার সারল্যেরই প্রমাণ। তুলনায় মনিয়ার কথায় চাতুরি, হাসিতে রহস্তের ছলনা। এসব হলো যৌবতী বহুড়ির জীবনের অভিজ্ঞতার ফল। কিন্তু তার মানে এই না, সে কুটিলা। নির্দোষ কপটতা আছে, কিন্তু তার নিজের মতন সব নিয়ে, সেও সরল। শরীরে তার যৌবনের উজ্জ্বল উচ্ছ্বাস। চালায় ছন্দে কাব্যের ভাষায় বোধহয় মনিয়ার চালায় দাপে 'দামিনী কাঁপে।' শব্দর শাস্ত্রির সঙ্গে আলু ভোলায় সময় একবারও তার চলন বলন চাউনি টের পাওয়া যায়নি।

সেই তুলনায় হুরি যেন সত্যি অবলা কিশোরী, কেবল দু চোখে অগাধ কৌতুহল! সেটাই স্বাভাবিক। ওর শরীরে মনে ছোয়ারের প্রতীক্ষা। দেখলে মনে হয়, ওর মনে ও ধমনীতে সেই প্রতীক্ষা স্তূপ সংকেত দিয়েছে। সেইজন্মই সহজে ও মুখ ফুটতে চায় না, অথচ ভাবে ভঙ্গিতে ও বড় হয়ে উঠতে চায়। কিন্তু অনভিজ্ঞা কুমারীটি জীবনের বোধ থেকে বঞ্চিত না। অতএব ভউজীর ইশারা ইঙ্গিতে লজ্জা পায়, আর অনায়াসেই চিনিয়ে দেয়। অবিশ্বি জানি না, মনিয়া নন্দিনীটিকে কিলিয়ে পাকাচ্ছে কীনা। কেন না, একটু আগেই চালার মধ্যে মনিয়ার গানের ভাষায় একটি কথা কানে ঠেকে আছে, 'করত সিংহার'। সেই সিংহার মানে কি শূদ্রার? তবে তো বিপদের কথা! কিংবা এমনও হতে পারে, 'শূদ্রার' শব্দটি আমাদের ভাবনায় যতোটা সংকোচের ওদের ততোটা না।

এমন দাবী আমার পক্ষে সম্ভব না, আমি ওদের কথিত ভাবাকে যথাযথ রূপ দিতে পারছি। শিল্পাঙ্কলে আরও অনেক অবাঙালীর মুখেই এমন ভাষা শুনে থাকি আমার ভুল হওয়া স্বাভাবিক। ব্রজবুলি নিশ্চয়ই আলাদা ভাষা, বিহারের কোনো আঞ্চলিক ভাষা হওয়া সম্ভব না। তথাপি, ওদের কথাবার্তা যেন আমার কানে অনেকটা সেই জাতের। অতএব ওদের গানে শূদ্রার কথাটা হয়তো আখ্চার ব্যবহৃত হয়। দেশ, সমাজ, পরিবেশে, যে যার নিজের মতন। চিন্তা ভাবনা রুচি, কারো সঙ্গে কারো ছকে বাঁধা নেই।

'দরিয়াকে পানীয়ে 'পর তো গিরল না গেইলান।' হুরি কথাটা বলে একবার আমার দিকে দেখলো, তারপরে আবার মনিয়ার দিকে তাকিয়ে বললো, 'ঘড়িয়া দেখেন কা জরুরত কা বা?'

হুরির ভাববাচ্য ভাষা বুঝতে অসুবিধা হচ্ছে না। ওর উদ্ভিষ্ট লোকটি আমি, সন্দেহ নেই। আমি তো নদীর জলে পড়ে নেই, তবে ঘড়ি দেখবার দরকার কী? হুরির এটাই প্রশ্ন। মনিয়ার সঙ্গে আমার চোখাচোখি হলো। দেখেই বোঝা যাচ্ছে, সে তার উচ্ছ্বসিত হাসি চাপবার চেষ্টা করে, চোখের দৃষ্টি হুরির দিকে ফিরিয়ে বললো, 'যে

ঘড়িয়া দখল হামি, উছকে কাঁহে না পুছত? হমে কা হাতে পর ঘড়িয়া বানলে বানি?'

হুরি আমার দিকে ভুরু কঁচুকে তাকালো। কালো চোখে জিজ্ঞাসা। দেখে আমার হাসি পেলো। কিন্তু মুখে সিগারেট দিয়ে প্রায় হাত চাপা দিয়ে টান দিলাম, আর ঠোঁট ছুঁচলো করে ধোঁয়া ছাড়লাম কে জানে, হাসলে আবার কিশোরীটি কী বলে উঠবে, আমি তো দেখছি, যোগ্য দোষ মনিয়ার। কৌতুকের ঝিলিক তার চোখে। হাসি চেপে হুরিকে উসকে দেবার চেষ্টা। তা ছাড়া, হুরিই বা আমার ঘড়ি দেখার ব্যাপারে এতোটা উত্তাজ্জ কেন?

নানী আমার পাশ থেকে বলে উঠলো, 'হুরি সচ্-কহলেবানি। ততো দরিয়াকে পানীয়ে পর না গরল গেইলান হো বাবা? ইহ পর আদমিলোগন রহে না কি?'

সে-কথা কী করে অস্বীকার করি, এখানে মাহুষ থাকে না? নদীর জলেও পড়িনি। বরং জীবনের এক অবিশ্বাস্য আসরে বসে আছি। ফেরার সময় সম্পর্কে নিশ্চিন্ত হতে পারলে, চরের এই রঙ্গ কৌতুকের আসরকে প্রাণ ভরে ভোগ করতে পারতাম। যাদের সঙ্গে অমিলের কথাই ভেবেছি, এখন দেখছি, তারা নিজে থেকেই ঘনিষ্ঠ হয়ে উঠেছে। মনে মনে একটা কৃতজ্ঞতা বোধ করছি, তবু মন-ভাসির টানে ভেসেও, নিজেকে ভুলতে পারছি না। ভেসে যাবার টানের মধ্যেও, সংসারের নিয়ন্ত্রণটাকে একেবারে গোলায় পাঠানো যায় না। চেনা পরিচয়ের সময় সূত্র আর কতোটুকু?

তা ছাড়া সত্যি বলতে কি, চরের মরদ পুরুষরা ফিরে এলে, আমার উপস্থিতি তাদের চোখে কেমন ঠেকবে সেটাও মনের মধ্যে খচখচিয়ে উঠছে। রমণীর মন পাওয়া নাকি হাজার বছরের সাধনার ধন। এ ক্ষেত্রে মন না পেয়ে থাকি, আতিথ্য পেয়েছি। হয়তো অনাড়ম্বর, কিন্তু আন্তরিক অবিশ্বিই। যে-চর আমাকে হাতছানি দিয়ে ডেকে এনেছে, এ আতিথ্য যেন তার আপন প্রকৃতিরই হাত দিয়ে এসেছে। কিন্তু বৈপায়ন পুরুষরাও কি এই অচেনাকে তেমন হাত বাড়িয়ে দেবে?

অবস্থেলা সইতে পারি, অসম্মানকে ভয়।

আমি নানীকে আমার মতন হিন্দিতে বাতলালাম, ‘কিন্তু ফিরতে তো হবে নানী, কতো রাত হবে, তাই ভাবছি।’

‘পলট কাঁহে চল যাওবেমি হোই নানী?’ হুরি বলে উঠলো নানীর দিকে তাকিয়ে, ‘এক রাত চরে পর রহল তো, শিব গোসমা হো যাওবে কি?’

এতো দূর? আমি এক রাত চরে থাকলে কি শিব ঠাকুর গোসা করবেন? হুরি মনে মনে এতোটা এগিয়ে আছে, মূলে ভাবতে পারিনি। আর আমার মনের কথাই প্রতীক্ষনি করে যেন মনিয়া খিলখিল করে হেসে উঠলো। হুরি মুখ ফিরিয়ে এক মুহূর্ত হতবাক হয়ে মনিয়ার দিকে দেখলো, তারপরেই কাঁচের চূড়িতে আওয়াজ তুলে মারবার জ্বা হাত তুললো।

মনিয়া ভৎসনাৎ পিছন দিকে খানিকটা এগিয়ে পড়ে হাত তুলে মার বাঁচালো, বললো, ‘হমে কুছ না কহলবানি, হমে পর কাঁহে গোসমা ভইল?’

নানী বললো, ‘বাবা কয়সে হমলোগনকে মাথে হই পর রহবে? শহরকে বাবু ভইল।’

হুরি আমার দিকে মুখ ফিরিয়ে তাকালো। চোখে ওর জরুটি জিজ্ঞাসা। মনে কোনো জট জটিলতা নেই। কিন্তু মুখ ফুটে কিছু জিজ্ঞেস করতে পারলো না। মনিয়া এক হাত দূরে সরে বসেছে। তার ঠোঁটের কোণে হাসির উচ্ছলতার রাশ টেনে ধরা। এই বোধহয় সে প্রথম সরাসরি আমাকে উদ্দেশ্য করে বললো, ‘হ, কাঁহে না রহল, যাই হো রউয়া? সহরকে বাবুলোগ, আওত, যাওত দিন ডর বহত খানাপিনা করত, তু কাঁহে না এহেবানি?’

মনিয়া বাবুলোকদের বনভোজনের কথা বলছে। অথবা চর-ভোজনের। কিন্তু সেটা হলো দিনের বেলায় ঘটনা। আমার মতন একলা সহরবাসী কি কখনো এই চরে রাত কাটিয়েছে? আসলে মনিয়ার সবটাই ঠাট্টা। আমাকে না, হুরিকেই। কথার মধ্যে তার চোখের

তারা ঘুরে ঘুরে হুরির দিকে দেখছিল। হুরিও বারেবারেই মনিয়ার মুখের দিকে দেখছে এবং ওর তেলতেলে মুখ প্রসন্ন হয়ে উঠছে। মনিয়ার ঠাট্টার মধ্যে ছলনা কতোটা আমিও অনুমান অক্ষম। তার বুলিতে হুরি খুশি এটা স্পষ্ট।

আমি মনিয়ার দিকে তাকালাম। তার ভুরু কাঁপলো, না কপালের লাল টিপ কাঁপল বুঝতে পারলাম না। অথবা চোখের কালো তারা দুটি। কিন্তু আমার জবাবের প্রত্যাশা তার চোখে। আমি বললাম, ‘আমিও তো দিনভর রইলাম। রাতে কি করে থাকবো? বাবুলোক-যারা আসে তারা কি রাতেও থাকে?’

‘উলোগনকে মাথে ইয়কে কা বাত বা?’ হুরি মনিয়ার দিকে তাকিয়ে জিজ্ঞেস করলো।

আমার সঙ্গে সেই বাবুলোকদের কী কথা? তা বটে। কিন্তু হুরি আমাকে এমন আলাদা করে দেখছে কেন? আমার বিপর্যয় দেখে? কিন্তু এমন বিপর্যয় তো ঘটেনি নিরুপায় হয়ে রাত্রিবাস করতেই হবে। নানী যেন ছেলেমানুষের কথায় হেসে উঠে আবার বলল, ‘সহরকে বাবু ভইল না? তোকার এ ঝোপড়িয়ে পর কয়সে রহেবানি?’

হুরি আমার দিকে তাকালো। চোখে ওর জিজ্ঞাসা। অর্থাৎ স্পষ্ট। কেন হে বাবু তুমি কি আমাদের এঘরে থাকতে পারবে না? জবাব তো আমার মুখের উগায় আছে। চালা ঝোপড়ি কেন খোলা আকাশের তলেও অনেক জায়গায় অনেক রাত কেটেছে। সেই তুলনায় এই চরের ঘর তো স্বর্গ। কিন্তু এতোটা জবাব দিতে আমি সক্ষম না। মনিয়ার অপলক বিজলি হানা চোখের দিকে একবার দেখে আমি মুখ তুলে পশ্চিমের কুলে তাকালাম। এবং এই প্রথম আমার জাণে তামাকের গন্ধ স্পষ্ট হলো।

অনুমানের প্রয়োজন নেই, ছলারি শাশুড়ির জ্বা তামাক সেজে আগে নিজের মৌতাতটি সেরে নিচ্ছে। হয় তো বাইরে এসে উনানের ধারে বসেই ছঁকা টানতে পারতো। কিন্তু বয়সটা এখনও বোধহয় সে পধীয়ে পৌঁছয়নি, বাইরের অচেনা বাবুর সামনে বসে ছঁকা টানবে।

এটা সহবত বা লজ্জা বুঝতে পারছি না। আমি না থাকলে যে শাণ্ডি
বউ একসঙ্গেই হুঁকা হাতাহাতি করতে তা ছলারিকে সিগারেট টানতে
দেখেই টের পেয়েছিলাম।

শিল্পাঞ্চলে এটা একটা স্বাভাবিক দৃশ্য। নানী বা ছলারির মতন
স্ত্রীলোকেরা ঘরের উঠানে দরজায় বসে হুঁকা টানছে। এ বঙ্গে অল্প
বিস্তর চোখে পড়েছে। কিন্তু ছেলেবেলায়, পূর্ববঙ্গে পাড়াগাঁয়ে, হিন্দু-
মুসলমান নির্বিশেষে বাঙালী বয়স্ক স্ত্রীলোকদের হুঁকা টানতে দেখেছি।
খাবমানকাল ভারতীয় জীবনের কতোটা লুটেপুটে, কতোটা নতুন
দান দিয়েছে, হিসাবে আমার মন নেই। কেননা, ওসব তর্ক বড়
খিটকেল ব্যাপার। কিন্তু নানী বা ছলারির মতন হাতের হুঁকা
একবারে লুটে নেয়নি। পাখে চলতে বিড়ি চলে। সেটা তো এ চরে
আসবার আগে নানীকেই দেখেছি।

তামাকের গন্ধ পাবার সঙ্গে সঙ্গেই প্রায় হুঁকা হাতে ছলারি বেরিয়ে
এলো। নানীর কাছে এগিয়ে এসে হুঁকা বাড়িয়ে দিল। জানি না,
মনিয়ারও এই নেশাটা আছে কী-না। আমার অনুমান তার বয়স
কুড়ি-বাইশের বেশি না। বিহার বা উত্তরপ্রদেশে তার বয়সী মেয়ে
বহুড়িকেও যে ধূমপান করতে দেখিনি, এমন না। কেবল বাবুদিগের
বাড়ির বিবিদিগের সিগারেট পান দেখলেই, বাঙালী ভদ্রলোকদিগের
সমাজ সংস্কৃতিতে নাভিস্থান গুঠে। ঘুরে ফিরে সেই সমাজ পরিবেশ
রুচির কথা।

নানী ভুড়ুক ভুড়ুক হুঁকা টানছে। ছলারি ঘরের দিকে যেতে
যেতে, মনিয়ার দিকে ফিরে বললো, 'কা ভইল বহু, আজ রাতমে খানা
না পাকাওবে কি?'

মনিয়া তাড়াতাড়ি উঠে, ঝাঁচস দিয়ে কোমরের পিছনে ধূলা ঝাড়
দিল। দেখলো একবার হুরির দিকে, ঘরের দিকে যেতে যেতে
আমাকে। তার দিক থেকে চোখ ফেরাতেই, হুরির সঙ্গে চোখাচোখি।
এখনও যেন ওর চোখে সেই একই জিজ্ঞাসা, কিন্তু ও আমাকে
অবাক করে দিয়ে বললো, 'কেকার বাতে পর তু রহলে সকত? ভউজী?'

প্রথমটা হুরির বাতপুছটা ধরতে পারিনি। পর মুহূর্তেই বুঝতে
পেরে, হেসে উঠতে গেলাম। কিন্তু নিজেকে দমন করতে হলো। হুরির
সরল জিজ্ঞাসার মধ্যে, একটা গুরুতর ইঙ্গিত আছে। এখন আর
ভাববাচ্যে না, প্রশ্ন সরাসরি, 'কার কথায় তুমি থাকতে পারো, বউদির?'
শারল্যের গুণ বলো, দোষ বলো, পাঁচ পয়জার নেই। বুকের
কথা, অনায়াসেই মুখে ফোটে, কোথায় গিয়ে লাগবে, সে-খোঁজ সে করে
না। হুরি কি মনিয়াকে প্রতিদ্বন্দ্বী ভাবছে নাকি? আমি হেসে
বললাম, 'না আমি কারো কথায় আসিনি, কারো কথায় থাকবো কেন?
তোমার বাবা দাদারা এলেই আমি চলে যাবো।'

হুরি মুখ ফিরিয়ে তাকালো উনোনের দিকে। তারপরে হঠাৎ
উঠে পড়ে চলে গেল পশ্চিমের চালার আড়ালে। ভেবেছিলাম, নানী
ছিলম টানতেই ব্যস্ত। কিন্তু সে হঠাৎ হেসে বলে উঠলো, অবতক
ছোটি বালি বা।'

ছোটি বুঝলাম, বালি কী? মনের জিজ্ঞাসা মনের অতলে ডুবে
গেল। হুরি পশ্চিমের বেড়ার পাশ থেকে মুখ বাড়িয়ে ঝামটা দিয়ে
বলে উঠলো, 'ছোটি বালি কি বুড়ি মাতারি ভইলি, কেকার কি বা?'

হুরির অস্পষ্ট মুখ মুহূর্তেই আবার অদৃশ্য হয়ে গেল। নানী আমার
দিকে তাকিয়ে চোখ টিপে হাসলো। কোনো কথা না বলে আবার
ভুড়ুক ভুড়ুক শব্দে হুঁকা টানতে লাগলো। হুরির রাগটা কার
ওপরে? কিশোরীরা চিরদিনই অবুঝ। নাকি রমণী মাত্রেই? এতোটা
বলার দায়িত্ব নেবো না। কুঁকি আছে। কিন্তু হুরির রাগটা বোধহয়
ঝিকে মেরে বউকে শেখানোর মতনই। অবুঝ কিশোরীটিকে আমার
অবস্থা বোঝাবো কেনম করে?

চালা থেকে বেরিয়ে এলো ছলারি। হাতে তার একটা মাঝারি
মাপের চ্যাঙারি। পিছনে এলো মনিয়া। তার দু-হাতে ধরা কালা
উঁচু বেশ বড়সড় একখানি কাঠের পাত্র। কাছে আসতে দেখতে পেলাম,
আটার পরিমাণ আমার চোখে পর্বত প্রমাণ। ছলারি উনোনের
কাছাকাছি চ্যাঙাড়ি নিয়ে বসলো। দেখলাম, তাতে রয়েছে সবজী।

তরিকা পর কাম নহি কইলেবানি। সবহি দিল চাহতানি, এ চৌরে পর রহল যাওত। তো, কা বাবা, আপনে খুশি পর কি কুস্পানিকে নোকরি জৌয়েতক রহবে ?

নানীর স্বরে এই প্রথম যেন কিঞ্চিৎ অশান্তির সুর শোনা গেল। সত্যি এভাবে সারা জীবন কোম্পানীর নোকরি কি থাকে ? নানী তার ভাবায় আরও যা বললো, তা হলো, রামাবতারের জরু মারা গিয়েছে অনেককাল। তার কোনো বালবাচ্ছা হয়নি। তখন সিবন ছলারিকে নিয়ে রামাবতারের সঙ্গে, বাঁশবেড়ের এক বস্তিতেই থাকতো। সিবনের বাবা-মা এই চরে প্রথম এসেছিল। চাষবাস করতো, আর বর্ষাকালে জেলের কাছে বস্তিতে গিয়ে থাকতো। নানী থাকতো তার নিজের ব্যাটার কাছে হাজিনগরে। কারণ, তার ব্যাটা হাজিনগরের মিলে কাজ করে। কিন্তু 'বেটয়োকো বহ' 'সামুকো' দেখতে পারে না। নাতীরাও সেই রকমই। অতএব, নিজের বেটি ছলারির আশ্রয়েই তাকে আসতে হয়েছে।

উনোনের আঙনের আলো ছাড়া আলো নেই। তাঁটার চেউয়ের ধাক্কায় চরের পাড়ে কেবল ছলছল কলকল শব্দ। মাঘের আকাশ শরতের মতন কৃষ্ণ, আর সেই কৃষ্ণ বাগিচায় অজস্র ফুলের মতন নক্ষত্রের বিকিমিকি। তার মাঝখানে নানীর জীবন কাহিনী, তার স্বরে শোনাচ্ছে যেন এক বিধবা বৃদ্ধার হৃৎ গাথার মতন।

'যব হরদেও বিমুখ হওত, তব জোয়ানীকে নাথ ছোড় যাতানি।'
...বিমুখ শব্দ অবাঙালীর মুখে এই প্রথম শুনলাম।

'যখন মহাদেব বিমুখ হন, তখন যুবতীর স্বামী তাকে ছেড়ে যায়।' নানীর একটি কথাতেই তার জীবনের সব দুঃখের কাহিনী স্পষ্ট হয়ে উঠলো। ভারতীয় জীবনের যে কোনো নারীর পক্ষেই বোধহয় এইটি চরম ব্যথা, লাঞ্ছনা আর অসম্মানের কথা।

নানীর সামান্য জীবনকাহিনীর দীর্ঘখাসের সঙ্গেই, রামাবতারের প্রসঙ্গও সে টেনে নিয়ে এলো। যার জরু বাল-বাচ্ছা নেই, তার সব থেকেও কিছু নেই। বাঁশবেড়ের বস্তিতে তার ঘর আছে। কিন্তু

সে এখান থেকেই কারখানায় যায়। বস্তির ঘরে থাকে না। খালি ঘরে একটা লোক থাকে কেমন করে ? তবে হ্যাঁ, সে আর একবার শাদী করতে পারতো। সবাই তাকে বলছে। সে করেনি। কেন করেনি ? তা কে বলবে ? রামাবতার শাদী না করায় কেউ খুশি হয়নি। নানীর পছন্দ না, সে এই চরে এসে পড়ে থাকে। কোনো রকমে নোকরিটা বজায় রেখেছে, তাও অনেক কামাই করে। আর গাঁজা ভাও মদ খায়।

নানী এই পর্যন্ত বলে থামলো। তাকালো ছলারির দিকে। মনিয়া বোধহয় কোনো কাজে চালার ভিতর গিয়েছে, লক্ষ্য করেনি। ছলারির তরকারি কোটা শেষ। ছুরির এখনও পাতা নেই। নানী বললো, 'রামাবতারকে যারে হামে কুছ না কহতানি। হামকে বাতে পরে কেছকে গোসলা লাগে কি ছুখ পাওয়ে, ই না চাহতানি।'

নানী কথাগুলো বললো ছলারির দিকে তাকিয়ে, তারপরে দুৱের পশ্চিমে। ছলারি যেন না তাকাবার ছলেই পলকে একবার আমাকে দেখে নিল। এখন তার মুখে হাসি নেই। রাগও নেই। একটু বা গম্ভীর। সে উঠে চলে গেল চালার ভিতর। মুহূর্তেই নানী আমার হাঁটুর কাছে আঙুলের খোঁচা দিয়ে ফিসফিস করে বলে উঠলো, 'বেটি হমারি জরু সিবনকে। অগুরত আপনেকে বুব সমঝেবনি তো কে সমঝাওবে ?'

নানীর কথা শেষ হবার আগেই মনিয়া একটি ছোট চৌকা লঠন এক হাতে, অজ্ঞ হাতে দড়িতে ঝোলানো একটা চায়ের পেটির মতন কাঠের বাকস নিয়ে চালা থেকে বেরিয়ে এলো। নানী তৎক্ষণাৎ গলা খুলে যা বললো, তার অর্ধ, ভরতও বাঁশবেড়ের চটকলে মাসে ছ মাসে দু-তিন হস্তা বদলি কাজ করে। বস্তিতে রামাবতারের ঘরের লাগোয়া। ভরত ওর বাপের ঘরটাই রেখে দিয়েছে। কেন না, সেই ঘরেই তো ভরতের জন্ম হয়েছে না ?

নানীর হঠাৎ প্রসঙ্গ পরিবর্তন এবং আগের কথার খেই ধরতে আমাকে বেগ পেতে হলো। ভরত যে চটকলে বদলি কাজ করে, এ খবর নতুন। নতুন সবটাই। ছুরির বিয়ের যোগসূত্র খুঁজে পেতে

এখন আর অশুবিধা হচ্ছে না। একদা সকলেরই লক্ষ্য ছিল, চটকলের কাজ। এখনও সে সম্পর্ক একেবারে ঘোচে নি। সিবন তার জীবন শুরু করেছিল চটকলে। চরে আসবার আগে হয় তো সিবনের বাবাও চটকলেই কাজ করতো। সিবন ছাঁটাই হয়ে চরে এসেছে, ভরত এখনও মাসে দু মাসে দু-তিন হপ্তা বদলি কাজ করে। বাঁশবেড়ের বস্তিতে গরও আছে। কিন্তু ছলারি উঠে যাবার পরেই, চুপিচুপি কথাগুলোর শ্রোত কোন দিকে? ছলারি বেশ থাকতেই বলেছিল। 'রামাবতারের ব্যাপারে সে কিছুই বলতে চায় না, কারণ তার কথায় কেউ রাগ করে বা ছুঁখ পায়, সে চায় না।' এ কথা বলার আগে সে ছলারির দিকে একবার তাকিয়েছিল। তারপরে ছলারি ঘরে চলে যাবার পরেই, সেই চুপি চুপি কথা তাও আমার হাঁটুতে খোঁচা দিয়ে, 'ছলারি আমার বেটি, সিবনের বউ। জীলোক নিজে বুঝে সমঝে না চললে কে তাকে বোঝাবে?'...

কী এর অর্থ? নিতান্ত হিং টিং ছট? সকলের অবর্তমানে, হঠাৎ নানী চুপি চুপি ধাঁধার কথা বলবে, এমন বুদ্ধা সে না। জগত সংসারকে সে যুবতীকাল থেকে অনাখিনীর চোখে দেখে এসেছে। আমার মনে অকারণ ধন্দ ধরাবার পাত্রী সে না। প্রমদ ছিল রামাবতার। ঘোষিত নীতি কারোকে সে রামাবতারের কথা বলে ছুঁখ দিতে চায় না। তারপরেই ঝটতি চুপি চুপি ছলারির বুঝে-সমঝে চলার কথা। কথা নাকি ষোল ধারায় বহে। এ কোন ধারায় বইছে?

ধারাটা এমন কিছু অস্পষ্ট না। কথার ধারায় পরকীয়া প্রেমের ছটা চাপা নেই। একমাত্র রামাবতারকেই চোখে দেখিনি, আর আর সবাইকেই দেখছি। আমার কানে আরো বাজছে, 'সিবন আর রামাবতার দোস্ত।' আমার চোখের সামনে সিবনের মূর্তি ভেসে উঠলো। শব্দ সমর্থ চণ্ডা শরীর বিরাট এক জোড়া পৌঁফ। 'রাম রাম' বলে নমস্কার জানিয়েছিল। তার চোখে মুখে স্পষ্ট ব্যক্তিত্বের ছাপ। ভরতের জন্মের আগে থেকে যদি রামাবতারের সঙ্গে তার

দোস্তি, তবে কি সে দোস্তের চরিত্র জানে না? ঘরনীর মন বোঝে না?

প্রশ্ন যেখানে, জবাবও সেইখানে। সেই জগুই কি ছলারিকে এখনও মনিয়ার সঙ্গিনীর মতন দেখায়? যদিও সে ভরত, গোবিন, হুরির মা তবুও কি তাই তার চোখের তারায় এখনও কালো মেঘের কোলে বিদ্যুতের ঝিলিক। অথচ তার কথাবার্তা আচরণে কোথাও বাচালতার প্রকাশ নেই। কেবল বয়সের তুলনায় যা অধিক সেটা তার নায়িকা রূপ।

ছলারি দেখা দিল চালার দরজায়। হাতে হামানদিস্তা। দৃষ্টি আমার দিকে। আমি চোখ তুলে তাকালাম। ছলারি সহসা চোখ সরালো না। কয়েক মুহূর্ত আমার চোখে চোখ রেখে, এগিয়ে এলো উনানের দিকে। সময় বহে যাবার পরে, আমি চমকে উঠলাম। আবার তাকালাম ছলারির দিকে। সে একটা বড় লোহার তাওয়া উনানে তুলে দিচ্ছে। ঠোঁটের কোণে ঈষৎ হাসি। মনিয়া অবাক চোখে একবার দেখলো আমাকে, তারপর নানীকে। এবার মনিয়া কোথাও খেই হারিয়েছে।

আমি শুনছি, চরের পাড়ে পাড়ে স্কলের ছল ছল শব্দ। তারা ভরা আকাশ। বেঁটে ঝাড়ানো গাছটার উঁচু ডালের পাতায় হালকা বাতাসের দোলানি। আমি একটা সিগারেট ধরাবার আগে, নানীর দিকে বাড়িয়ে দিলাম। নানী সিগারেট হাতে নিয়ে বললো, 'অব না পিণ্ডব বাবা, বাদে পিইবেনি।'

আমি সিগারেট ধরিয়ে উঠে ঝাড়াবার আগে, আর একবার পাঞ্জাবীর হাতা সরিয়ে দেখলাম। রাত্রি মাড়ে আটটা। ইতিমধ্যে ছলারি গরম তাওয়ায় শুকনো লক্ষা ছেড়েছে। বাতাসে তার ঝাঁক। আমি দু পাশের চালাঘরের মাঝখান দিয়ে এগিয়ে গেলাম। নানী জিজ্ঞেস করলো, 'কই চলত হো রউয়া?'

বললাম, 'আসছি।'



যেমন কর্ম, তেমন ফল, কথাটা জানি। কিন্তু ভাগ্যটাকে বোধহয় একেবারে বাদ দেওয়া যায় না। নিজের নাক কেটে তো পরের যাত্রা ভঙ্গ করিনি। নিজেরই যাত্রা ভঙ্গ করেছে। নাক যদি কাটা গিয়ে থাকে, নিজেরই গিয়েছে। এপার ওপারের মূলের কুলে যাওয়াতে, অনেকদিনের হাতছানির সাড়া দিয়ে এলাম। এমন বলতে পারবো না, গঙ্গার বৃক্ক সবুজ রেখাটি আমাকে কোনােদিক থেকে বঞ্চিত করেছে। কিন্তু মূলে আর অকূলে রূপের ভেদে, চলমান জীবনের সুরে কোথায় একটা মিল রয়েছে। না হলে এই নিরিবিলি চরের বৃক্কও জীবন বিচিত্রার এমন নাটকের মুখোমুখি দাঁড়াতে হতো না।

দেখলাম, যে খাটিয়াটা হুরি প্রাক সন্ধ্যায় পেতে দিয়েছিল সেটা এখনও সেখানেই রয়েছে। আমার দৃষ্টি পশ্চিমের কুলে, যেখানে রাস্তার ধারে টিম টিম করে বিজলি বাতির বিন্দু জ্বলছে। ওখানেই আছে সেই ঘাট, যেখান থেকে ভরত পাটনীর নৌকায় এসেছিলাম। খাটিয়ায় বসবো ভেবেও, আমি আস্তে আস্তে পশ্চিমদিকে সাবধানে পা বাড়ালাম। হাতে জলস্ত সিগারেট, কিন্তু পায়ের নীচে দেখতে পাচ্ছি না কিছুই। একটা টর্চ লাইট থাকলে ভালো হতো। সে কথা ভেবে কোনো লাভ নেই। অতএব সাবধানে চলছি। এ চলাটাও অর্থহীন। পশ্চিমের সামান্য গিয়ে দাঁড়ালেই ভরতর নৌকা নিয়ে ফিরে আসবে না।

পায়ের নীচে মাটির ঢালা। ভয় হচ্ছে, পাছে কোনো শব্দ নষ্ট করি। খানিকটা যাবার পরেই মনে হলো হুরি আমার পাশ থেকে বলে উঠলো, 'কই যাতানি?'

আমি চমকে প্রথমে পিছন ফিরে তাকালাম। তারপরেই অন্ধকারের আবছায়ায়, আমার ডান দিকে দেখলাম, হুরি দাঁড়িয়ে আছে। আমি জিজ্ঞেস করলাম, 'তুমি কোথায় ছিলে?'

'ঘরে কি পিছে খাড়া বা।' হুরি জবাব দিল, 'তুহকে ইউর যায়ে দেখুতো চল আইলাম। কই যাতানি?'

বললাম, 'কোথাও না, এমনি একটু পাড়ের কাছে যাচ্ছিলাম।'

হুরি কোনো কথা বললো না। অন্ধকার যতোটা মনে হয় ততোটা না। যাকে বলে নিকম কালো। আকাশের নিচে, মাঝ-গঙ্গায় আকাশ ভরা তারার আলো যেমন অন্ধকারকে অনেকখানি হালকা করে দিয়েছে। আমি হুরির চোখ মুখ স্পষ্ট করে কিছুই দেখতে পাচ্ছি না। এই চরের ধূলামাটি শব্দ আর সরষের এবং নারকেল তেলের মিশ্রিত একটা গন্ধ পাচ্ছি, আর ওর হাতের কাঁচের চুড়িতে কি তারার ঝিকমিকি? চুড়িগুলোতে অস্পষ্ট বিলিক দিচ্ছে। আমার মনে হলো হুরি আমার মুখের দিকে তাকিয়ে আছে। হয়তো 'ওর অভ্যস্ত চোখ এ অন্ধকারে আমার থেকে স্পষ্ট দেখতে পাচ্ছে। এভাবে দাঁড়িয়ে থাকতে অস্বস্তি হচ্ছে।

আমি আবার পা বাড়াবার উত্তোগ করে বললাম, 'তুমি কি আমার ওপর রাগ করছো?'

'আরে, তুহকে দিমা ক খারাপ ভইল কা?' হুরি অনায়াসেই আমার একটা হাত টেনে ধরলো, 'ই কা তুহকে সহরেকে রাস্তা বা? গিরল যাই তো কা হোই?'

কথাটা হয় তো মিথ্যা না। কিন্তু আমার অস্বস্তিটা পতনের আশঙ্কার থেকে বেশি। রাত্রে নিরালা চর। হুরির বয়স যাই হোক। ওর মা নানী ভউজীর চোখে দুশুটা কি খুব সহবত দেখাবে। অথচ ওর যা গোসা দেখছি, স্কোর করে হাত টেনে ছাড়াবার চেষ্টা করতও দ্বিধা করছি। ও তখন বলতে আরম্ভ করেছে, 'এততি পরবন্ধ করতানি, তো তু কাই চল যাওবকে মতলব করতানি?'

'পরবন্ধ' শব্দের অর্থ কী? অনুবোধ? আমি জানি, শিল্পাঞ্চলে এ

জাতীয় ভাষা অনেকের মুখে শুনি, কিন্তু আমার পক্ষে তাদের সঠিক ভাষা বলা সম্ভব না। পঞ্চাশ দশকের স্মৃতিই কেবল আমার সঙ্গে বিধাসঘাতকতা করছে না। আমার মতন কোনো বাঙালীর পক্ষেই, বিহারের বিভিন্ন দেহাতী ভাষাকে সঠিকভাবে উচ্চারণ করা অসম্ভব। ব্যাকরণের তো কথাই নেই। আর বাজার চলতি বাজার হিন্দির তো কোনো মাথা মুগুই নেই। বললাম, 'মতলব তো কিছু করিনি। থাকবো ভেবে তো আসিনি।'

কথাটা বলতে বলতেই হোঁচট খেলাম। হুরি শক্ত হাতে আমাকে সামলে নিয়ে হেসে উঠলো, 'দেখলেবানি কি? বাঙালীবাবু আমার কথা কাঁহে না মানছে?'

আমি পতন থেকে সামলে ওঠবার আগেই, অবাক হয়ে জিজ্ঞেস করলাম, 'তুমি কি বাঙলা বলতে পারো?'

'খোড়া খোড়া সাকতবা,' হুরি হেসে জবাব দিল, 'হামিনলোগ সব বাঙলা বুলি জানি। বাঁশবেড়িয়া, শাগঞ্জ, হালিসহর সবহি জায়গে' পর আমার বহুত বাঙালী দোস্তানি আছে। উলোগ কছ' আমার কথা না বুঝে, না বুলতে জানে। আমি জানে। তুমি রামপরসাদকে মন্দির কথুন গেইছ?'

রামপ্রসাদের মন্দির না বলে, আমরা ভিটেই বলি। বললাম, 'অনেকবার গেছি।'

'আমি হর হপ্তেমে এক দো রোজ কাই।' হুরি ওর নিজের মতন বাঙলায় বললো, 'উধারে আমার পাঁচ সাত দোস্তানি আছে। আমার সাথে এ চৌরে পরে বেড়াইতে আসে।'

হুরির বাঙলা কথা শুনে ভারতের বাঙলা বুলি আমার মনে পড়ে যাচ্ছে। কিন্তু এখন আমি পদে পদে বুঝতে পারছি, একলা চলতে গেলে ইতিমধ্যেই আমার কয়েকবার পতন ঘটতো, আর তার চোট সামলাবার জন্ত অন্ধকার চরে আমাকে দিশেহারা হয়ে দাঁড়িয়ে থাকতে হতো। হুরি এখন আমার একটি হাত ধরে নেই। কাঁধের চাদরটা ও অঙ্গ হাতে মুঠি পাকিয়ে ধরেছে। সেই সঙ্গে পাঞ্জাবীর গলাটাও।

আমার শরীরের সঙ্গে ওর শরীরের স্পর্শে আমার যদি বা অস্বস্তি হচ্ছে, ধর কোনো সংকোচই নেই। সংকোচের অবকাশ কি ওর শরীরে মনে একেবারেই অনুপস্থিত? অথচ, আমারই অস্বস্তি না হবার কথা। কিন্তু সংবাদগুলো সবই নতুন, যদিও আশ্চর্যের বা অবিশ্বাস্য মোটেই মনে হচ্ছে না। চরের বৃকে বাস বটে, মুলের কুলে যাতায়াত আছে। জন্মকাল থেকে বাঙালীদের সঙ্গে মেলামেশা। বাঙালী সহী সখী না জোটাটাই অস্বাভাবিক।

আমি জিজ্ঞেস করলাম, 'হুরি মানে কী?'

'হুরি?' ও হেসে উঠলো, 'হুরি না কহ, হুরী।' দীর্ঘ ই-কারটা ও টেনে আওয়াজ করলো, 'হুরী তো পঞ্জী আছে বাঙালীলোগ পাখী বলে।'

হুরি না, হুরী। তাও আবার পাখী। মনিয়াকে ময়না ভেবেছি, কারণ গুটা ওরকম জানা। 'হুরী নামে কোনো পাখীর নাম আজতক শুনিনি। জিজ্ঞেস করলাম, 'দেটা কী পাখী?'

'উ আমি জানি না।' হুরী জবাব দিল।

আমি আবার জিজ্ঞেস করলাম, 'হুরী তুমি তো আমাকে কখনো দেখনি, আমাকে থাকতে বলছো কেন?'

হুরী কোনো জবাব দিল না। বরং এবার যেন ও নিজেই হোঁচট খেতে গিয়ে সামলে নিল, আর ওর নারকেল তেলের গন্ধ খোঁপাটা আমার কাঁধে ঠেকলো। আবার কয়েক পা এগিয়ে জিজ্ঞেস করলাম, 'তুমি কি আমার কথা বুঝতে পারো নি?'

'কী কথা?' হুরীর স্বরে যেন অস্বাভাবিকতা।

আমি আমার কথার পুনরুক্তি করলাম, 'তুমি আমাকে কখনো দেখনি, জানো না, ওবু আমাকে থাকতে বলছো কেন?'

হুরী পরিষ্কার ওর নিজের ভাষায় জবাব দিল, 'হমে না জানত।' অদ্ভুত উক্তি। ও জানে না, কেন আমাকে থাকতে বলছে। তারপরই আমি জিজ্ঞেস করলাম, 'তোমার কেন মনে হলো, তোমার ভউলী বললে আমি থাকবো কী না?'

‘উ হেমসে সুরভবালী না?’ হুরী বললো, এবং অন্ধকারেই আমার মুখের দিকে তাকালো।

হুরীর তাকানোটা আমার অল্পমান, কিন্তু ওর কথার মধ্যে যে একটা গুরুতর ইঙ্গিত ছিল, সেটা মিথ্যা ভাবিনি। ইঙ্গিতটাকে গুরুতর বললো কী না, বুঝতে পারছি না, কিন্তু ওর কথার মধ্যে কোথাও দ্বিধা দ্বন্দ্ব নেই। একে ঈর্ষা বলবো, না সহজ প্রকৃতি বলবো? ওর মনে হয়েছে, মনিয়া ওর থেকে সুন্দরী, অতএব আমি তবে তার কথায় চরে রাত্রিবাস করতে পারি। ঈর্ষা হোক আর প্রবৃত্তিজাত হোক, এ আচরণকে আমি ‘রমণী ধরম’ মাত্র বলতে পারবো না। এক্ষেত্রে নারী পুরুষ বোধহয় সমান। কেবল বয়স আর অভিজ্ঞতা মানুষের বাহ্য প্রকাশকে সংযত করে। মনের তলিটা বাজে একই তালে। হুরী ওর বয়স আর অভিজ্ঞতার ওজন, নিজেকে প্রকাশ করেছে।

আমার চোখের সামনে মনিয়ার স্বাস্থ্যোন্নত শ্রামাঙ্গিনী মূর্তি ভেসে উঠলো। হুরীর থেকে সে সুন্দরী কী না জানি না, তার কৌতুকদীপ্ত চোখ, চর শিউরে তোলা হাসি, সবই পুরুষের প্রথম নজর কাড়ার চুষকে ভরা। অন্তত মনে মনে এ কথাটা স্বীকার না করলে, নিজের কাছে মিথ্যাবাদী হতে হয়। কিন্তু রূপের ভেদে মনের গতি নানা ধারায় বহে। প্রকৃতির দ্রুত আয়ুধ মনিয়ার সর্বাস্ত্রে। এমন কি তার চোখে মুখে কথায় বলায়। যে কারণে মনে হয়েছিল এমন রমণীর চলার দাপেই বোধহয় দামিনী কাঁপে। কিন্তু হুরীকে প্রথম দর্শনেই বুঝেছি, ওর কিশোরী শরীরে ও মনে প্রকৃতির সকল আয়ুধ, মহা সমারোহে ওর ধমনীতে সংকেত দিয়েছে।

আমি ওদের দুজনের রূপের বিচার একবারও করি নি। রমণীর চরিত্র ভেদে, দুজনকে আলাদা করে দেখেছি। আমি হেসে বললাম, ‘তোমাকে কে বলেছে, মনিয়া তোমার থেকে সুন্দরী?’

‘আমি সমঝতে পারি।’ হুরী বললো।

অন্ধকারে এখন আর অল্পমান না, স্পষ্টই বুঝতে পারছি, হুরী আমার মুখের দিকে দেখছে। ও কি অন্ধকারেও আমার মুখ দেখতে

পাচ্ছে? আমি আবার হেসে বললাম, ‘কিন্তু আমি তো দেখছি, তুমি অনেক বেশি সুন্দরী।’

হুরী আমার হাতটা ঝাঁকুনি দিয়ে বললো, ‘ঝুট কাঁহে কহতানি?’ ‘না, মিথ্যা বলিনি। আমি জানি, তুমি বড় হলে আরও সুন্দরী হবে।’ হুরী কোনো জবাব দিল না। কিন্তু দাঁড়িয়ে পড়লো। আর এগোবার উপায় নেই। দেখলাম, আমাদের পায়ের নীচে, জলের স্রোতে আলোর রেখা। ছলছল শব্দ বাজছে। আলোর রেখা কি ওপারের আলোর না তারার বুঝতে পারছি না। কিন্তু এটা বুঝতে পারছি, চরের বুকের এই খেলাটা সংসারের ধরা ছোঁয়ার বাইরে না, আবাস্তবও না। আকস্মিকতার চমক আছে, তথাপি জীবনটাকে তার আপন আলোয় দেখলে, স্থান ও কাল ভেদে, এ একটা জীব ধর্মের সহজ খেলা। কিন্তু কবির ভাষায় ‘সহজীয়া’ করণ কারণ না।

কয়েকটি মুহূর্ত চুপচাপ। অল্পভব করছি, চরের মাটিতে শব্দ ফলানো কিশোরীর হাত ভিজে উঠছে। হঠাৎ পিছন থেকেই মনিয়ার চেনা স্বরে গানের গুনগুনানি শোনা গেল। কথাস্থলো ত্রুত, কেবল গুনতে পেলাম, ‘সে আওল ফুলহার ..দেই ওরতারি...’

আমি ঝটিতি ফিরে দাঁড়ালাম। মনিয়া খিলখিল করে হেসে উঠলো। কিন্তু হুরী আমার হাত আরও শক্ত করে ধরলো। মনিয়া আবার তৎক্ষণাৎ পিছন ফিরে চলে যেতে লাগলো। তার মিলিয়ে যাওয়া অবয়ব দেখতে পাচ্ছি। হুরীর শক্ত করে ধরা হাত কিফিৎ নরম হলো। ডেকে বললো, ‘কা বাতাওয়ে আইলবানি হোই ভউজী?’

একটু দূর থেকে মনিয়ার হাসির ঝংকার শোনা গেল, তারপরে, ‘কুছ না ননদী, পঞ্জী ধায়ে মন হরই.....’

হুরী ফিক করে হেসে উঠলো। আমার হাত ধরে ফিরে যেতে পা বাড়িয়ে আবার ডেকে উঠলো, ‘এ ভউজী, মা বোলাওত কি?’

‘মসলা বিধিলেকেবারে, লাসু তোহে যায়ে কহতানি কি তুহে না! দেখলেন বা।’

মনিয়ার স্বর ভেসে এলো, ‘হম বোলাওত।’

হুরী আমাকে নিয়ে চলতে চলতেই, এবার ঝিলঝিল করে হেসে উঠলো, 'কুছু না কহে, হমে যাতানি।' হুরীর কথা শেষ হবার আগেই দূর থেকে একাধিক পূক্‌ষের গলা ভেসে এলো। তার মধ্যে, সব থেকে চড়া আর মোটা স্বরে গান ভেসে এলো, 'রাঘব রাম কহলে যাই, জগ 'পরে অণ্ডর রহ না।'.....

হুরী বলে উঠলো, 'বাপু ভাইয়ালোগন আ গেইলান। চাচা গানা গাওত।'

দূর থেকে একটা গভীর স্বস্তির নিঃশ্বাস উঠে এলো। যাক, আমার পাটানী আর নৌকা আসছে। অন্ধকারে ঘড়িতে এখন ন'টা। ওদের আসতে আসতে সাড়ে ন'টা। তারপরে.....



তারপরে সবটাই হিমাবের বাইরে। চরের পূক্‌ষরা ফিরে এসে আমাকে দেখে প্রথমটা থ! তারপরে প্রায় এক সঙ্গে নানী, ছলারি, মনিয়া আর হুরী কথা বলতে আরম্ভ করে দিল। ওরা যে কে কী বললো, প্রায় কিছুই বুঝতে পারলাম না। কেবল দেখলাম, পূক্‌ষের দল চর গঙ্গা আকাশ কাঁপিয়ে হেসে উঠলো। খানিকটা অহমান করা গেল, আমার চরে থেকে যাওয়াটা তাদের চোখে পড়েনি বলেই হাসির হুরা।

হররার পরেই বোধহয় গরুরা। কারণ এমনিতেই রামাবতার আর সিবনকে আমার আদৌ স্বাভাবিক মনে হচ্ছিল না। রামাবতার দীর্ঘদেহী, তামাটে রঙের তার মাথার চুল বড়; গৌঁকজোড়াও বিরাট, এবং চুল গৌঁফের রঙও তামাটে দেখলাম। তার আর সিবনের চোখ ছুটি বেশ লাল। আমি দাঁড়িয়েছিলাম। হঠাৎ ছুজনে ছদিক থেকে আমাকে ধরে একেবারে মাটিতে বসে পড়লো। সিবন তো আমার

গলা জড়িয়েই ধরলো, বললো, 'ও রউয়া, আজ রাতেমে তোহে ছোড়োব নাই। হামলোগনকে সাথে রহল যা।'

আমি কিছু জবাব দেবার আগেই রামাবতার আমার হাঁটুর ওপর প্রায় মুয়ে পড়ে বলল, 'হ, রউয়াকে আজ ছোড় না যাইল, পাকড়ি রাখ লেইবান।'

রমণী মহলে হা'সির ধূম। আর আমার ডাণে দেশী সুরার শ্রবল গঙ্গ। রামাবতার সিবন, ছুজনেরই। ছুপুরের সিবন, আর এই সিবন, আকাশ পাতাল তফাক্। ভরত আমার সামনে দাঁড়িয়ে, তার সেই বাঙলা বুলি ছাড়লো, 'কাঁহে যাইবেন বাবু, হামিনলোগ গরীব হইতে পারে-হ, আপনি হামিনলোগের মেহমান আছেন। ভগবান আপনাকে রাখিয়ে দিছে, নানী মাতারি বলছে, আজ থাকিয়ে যান।'

কথাবার্তা চলছিল, দক্ষিণের উনোনের ধারে নিকানো অঙ্গনে। ভরতের চোখ লাল না। তার ভাব ভঙ্গি দেখেই বোঝা যাচ্ছে, সে বাপ চাচার সঙ্গে পান করে আসে নি। গোবিন্দ হাসছে লাজুক লাজুক। বছর পনের ষাল বয়সের ছেলোটরও মনের কথা চোখ খুলে ফুটেছে, কেবল কথাই নেই।

কিন্তু কাকে কী বলবে। সকলে এক সঙ্গে কথা বলছে, হাসছে। হুরীর চোখ আমার চোখের দিকে। কিন্তু রামাবতার আর সিবন এর পরে আমাকে বোধহয় মাটিতে শুইয়ে ফেলবে। তারা এখন কেবল আমাকে জড়িয়ে ধরে রউয়া রউয়া ক'রে যাচ্ছে। আমি ছলারির দিকে তাকালাম। সে মজা দেখছে। মনিয়া হুরীর পাশে দাঁড়িয়ে, এখন ওর কোলে নেংটিটা জেগে উঠে, বড় বড় চোখে তাকিয়ে দেখছে। সাদা কালো পাহারাদারটি একবার রামাবতারের মুখ চাটছে, আর একবার সিবনের। আর লাজ নেড়ে নেড়ে নানা রকম শব্দ করছে। মাতাল ছুটির সেদিকে খেয়ালই নেই।

ভরত মায়ের দিকে ফিরে বললো, 'এ মাতারি, এ ছুনোকো। তু ঘর কাঁহে না লে যাতানি? বাবুকে তখলিব, হওতানি।'

ছলারি এগিয়ে এলো। ছ হাত বাজিয়ে ডাকলো, 'শুনহো, তু

দুনো ঘরে চলতানি, উঠ, উঠ হো ?

ভোজবাজীর মতন কাজ হলো। দুজনই মুখ তুলে থাকালো। ঘাড়ের ওপর দুজনের মাথাই যেন বাতাসে ছুলছে। দুজনই দুলারি দুহাত ধরে উঠে দাঁড়ালো। কিন্তু মুখের বুলি এক, ‘রউয়াকে ছোড়ব না।’

‘ইহ, ঠিক বা। আর দুনো ঘরে চলতানি।’

দুলারি দুজনকেই দুহাত ধরে, পশ্চিমের বড় চালায় ঢুক গেল। ভরত এসে আমার পাশে বসলো। ইনিও দেখছি গন্ধমাদন। ওরে, সরাব না গজিকা। হাসতে হাসতে বললো, ‘বাবু, ভগবানজীর মজির ওপর কিসিকে কথা চলে না। নাহি তো, আপনাকে ছোড়ে গেইলাম কী করে, আপনে বলেন।’

মনিয়া ধমকের স্বরে বললো, ‘আর উঠতানি। বাবুকে ভূখ লাগলবা, খানা দেওবানি। তু লেড়কাকে ঘরে পরে লেই বাহ।’

‘ই ই।’ ভরত উঠে মনিয়ার কোল থেকে ছেলেকে নিয়ে, পুবের একটা চালায় ঢুক গেল। নানী ছঁকা টানছে, আর হাসছে। বললো, ‘মনিয়া, বাবুকে সাথে হনে ভি খানা দেই দে।’

মুরী ছুটলো পশ্চিমের চালায়। চোখের পলকেই বেরিয়ে এলো হাতে একটি ঝকমকে কাঁশার থালা আর গেলাস নিয়ে। মনিয়া হেসে আমার দিকে একবার তাকিয়ে, পশ্চিমের চালাতেই ঢুকলো। উনোনের ধারেই ভোজ্য বস্তু সব রয়েছে। রুটি আর তরকারি। মুরী থালায় এক গোছা রুটি আর এক পাশে গাদা খানেক তরকারি বেড়ে দিল আমার সামনে। ইতিমধ্যে কখন মাটির কলসী বাইরে এসেছে, দেখি নি। জল গড়িয়ে দিয়ে বললো, ‘ই শহর কলেকে পানী লা।’

নানী এসে বসলো আমার পাশেই। মনিয়া একটা এলুমিনিয়ামের থালায় রুটি তরকারি বেড়ে নানীর সামনে দিল। ঘটতে করে জল দিল।

কোথা থেকে কী ঘটে গেল, কিছুই যেন বুঝতে পারলাম না। আমার সামনেই ভরত আর গোবিন খেয়ে নিল। নেটিটার খাওয়া

বোধহয় আগেই হয়ে গিয়েছিল। তবে স্বীকার করতেই হবে, এ রুটির তরকারির খাদ আলাদা। তরকারির মসলাটা কি জানি না। তবে দুলারি হাতে মাথে অনেক ভোজবাজী।

পশ্চিমের বড় চালায়, দক্ষিণের বেড়া ঘেঁষে, ভরত নিজে আমার খাটিয়া পেতে দিল। তারপরে সে যখন কাঁথা বালিশ বিছানা টেনে আনলো, আমি বাধা না দিয়ে পারলাম না। খোলা আকাশের নীচে শুতে পারি, সত্যি। কিন্তু জীবন ধারণের সব ছক পেরিয়ে আসতে পেরেছি, তা বলতে পারবো না, ক্ষেত্র বিশেষে বিছানায় থেকে ভূমি শয্যা সহনীয়, কিন্তু বিছানা না।

আমি আমার পশমী চাদরটা সব জাঁজ খুলে গায়ে চড়ালাম। শোবার উত্তোষ করতেই, মুরী ছুটে এলো। নাকে গন্ধ লাগলো স্নাপখলিনের। ঘরে আলো না থাকলেও, বুঝতে পারলাম ওর হাতে রয়েছে বড় একখানি মোটা আর খোয়া বিছানার চাদর। জড় হাতে সেটি পেতে দিল খাটিয়ার ওপর। আর বালিশের মতন একটা কিছু। হাত দিয়ে মনে হলো, একটা চৌকো পুঁটলি। মুরী বললো, ‘গন্ধা কিছু নাই আছে, সব নয়া কাপড়ার পুঁটলি।’

অন্তঃপর আর কোনো কথা চলে না। মুরী কেবল আমার কানের কাছে মুখ এনে নীচু স্বরে বললো, ‘হরদেওকে কুপা।’

চরের হাতছানিটাই এতকাল দেখে এসেছি। সেই ডাক যে এমন ঘটনা ঘটাবে, ভাবতে পারি নি। এ চর কি অঘটনঘটন-পটিয়সী ?

আমি শোবার পরেও, বাইরে কথাবার্তা শুনতে পাচ্ছিলাম। দুলারি যে কোথায় গেল দুজনকে নিয়ে, কিছুই জানি না। এক সময়ে মূমিয়ে পড়েছিলাম। কোথাও কোনো সাড়া শব্দ নেই, কখন এক সময়ে স্নুম ভেঙে গেল। আস্তে আস্তে উঠে বসলাম। ঘরের মধ্যে। কোথায় একটা টিমটিমে আলো জ্বলছে। সেই চৌকো লঠনটিই মনে হলো। তার আলোয় দেখলাম, পাশাপাশি ছোটো খাটিয়ায় ভরত আর গোবিন শুয়ে আছে। আরও খানিক উত্তরে, মাটিতে পাতা বিছানার

ওপর সিবনকেও চিনতে পারলাম।

খাটিয়া থেকে নেমে চালার বাঁপে হাত দিলাম। টান দিতে বুঝলাম, কোথাও আটকানো আছে। হাতড়ে পেলাম, একটি কঞ্চির সঙ্গে, দড়ির ফাঁস লাগানো। ঘুম আসছে না। রাতের চরটা দেখবার কৌতূহল তীব্র হয়ে উঠছে। নিঃশব্দ দড়ির ফাঁস খুলে বাইরে এলাম। আকাশের কৃষ্ণ স্বচ্ছতায় কেমন একটা কুয়াশার বাপসা ছায়া। তারাগুলো আবছা দেখাচ্ছে। আমি পায়ে পায়ে পুর্বের দিকে গেলাম। মূলের কূলে রাস্তায় তেমনি আলো। পুবে কিছু অন্ধকার। পশ্চিমে ডানলপের কুঠির আলো উজ্জ্বল। তারপরেই চোখে পড়লো, পুবদিকে, নদীর বৃকে নৌকায় একটা হারিকেন জ্বলছে। কুতু আর বটা কি জাল টানছে? সম্ভবতঃ।

হঠাৎ স্পর্শে চমকে উঠলাম। সূর্দা কালো পাহারাদার আমার পায়ের কাছে এসে, ল্যাজ নেড়ে ফৌঁস ফৌঁস করছে। এখন আর আমি শত্রু নেই। ওর দিকে ফিরে তাকাতে গিয়ে, আমার চোখ পড়লো ঝাড়ালো গাছটির নীচে। সেখানে গায়ে গায়ে পাশাপাশি ছুটি মূর্তি। গাছের গায়ে হেলান দিয়ে বসে আছে। কারা?

অবাক হবার অবকাশ পেলাম না, মুহূর্তেই বুঝতে পারলাম, দক্ষিণ দিকে মুখ করে বসে আছে ছলারি আর রামাবতার। কিছুই জানি না, ছলারির জীবনটা কোন্‌ চালে চলে। তবে, এটা বুঝছি, জীবনে সবকিছু বলে কয়ে ছকে চলে না। কোনো কোনো ক্ষেত্রে প্রকৃতি তার আপন হাতে কিছু গড়ে তোলে। ছলারির ছ হাত বাড়িয়ে ছই পুরুষকে নিজের গায়ে টেনে নিয়ে চলে যেতে দেখেই বুঝেছিলাম জীবনটা দলিলপত্র না।

তবুও হয় মূলের কূলের মানুষ, আমি যেন লজ্জার আর সংকোচে কঁকড়ে গেলাম। আগে জানলে কখনও ঘরের বাইরে আসতাম না। যেমন নিঃশব্দে এসেছিলাম, তার থেকেও সাবধানে চালার ভিতরে গিয়ে ঢুকলাম। কোনোরকমে বাঁপের ফাঁস পরিয়ে দিয়ে শুয়ে পড়লাম।

সকালে যখন আমার ঘুম ভাঙলো, দেখলাম, পাশের খালি খাটিয়ায় মুরী বসে কী যেন একটা সেলাই করছে। ও আমার দিকে তাকিয়ে হাসলো।

ভেবেছিলাম, সকালেই চরের পর্ব শেষ। তা হলো না। মাতাল কেউ ছিল না বাটে। কিন্তু এক রাত যদি থেকেই গেলাম, আর একটা বেলা নয় কেন? কিন্তু খেতি চাষবাসের কাজ? আজ ছুটি। রামাবতার কাজ কামাই করেছে। মনিয়ার পরিষ্কার উক্তি আমি নাকি গত রাতে মুরীর কথায় থেকে গিয়েছি। আজকের একটা বেলা, সকলের কথা রাখতেই হবে।

সম্মোহন বলবো, না সংক্রমণ বলবো, জানি না। রাজি হয়ে গেলাম। কুতু আর বটা তখন জাল টেনে মাছ তুলছে। ওদের কাছে গিয়ে দাঁড়াতেই, অবাক। ভারতে পারে নি, আজ সকালেও আমাকে দেখবে। আমার লক্ষ্য ওদের মাছের দিকে। কারণ, আগেই জেনে নিয়েছি, সিবনের পরিবারের সকলেই মৎস্যাসী। কিন্তু ছ একটা মাঝারি বোয়াল ছাড়া, সবই ছোট মাছ। ছুটি বোয়াল কিনে নিয়ে এলাম। কুতু বটাও কৌতূহল দমন করতে পারলো না। সিবনদের চালাঘরের সীমানায় ছুজনেই এলো। বটা হেসে বললো, ‘বাবু বুঝি অগো লগে চড়াইভাতি করবেন?’

বললাম, ‘একরকম তাই।’

ছলারি তার সেই ছুরি নিয়ে মাছ কটিতে শুরু করলো। বটার চড়াইভাতি কথাটা একেবারে মিথ্যে নয়। ঘর ছাড়া জীবনে, এ আমার একটা নতুন স্বাদ। মন-ভাসির টানে, চরে ঠেকে যাওয়া এক নতুন রঙ্গ। তবে, সেই কথাটাই মনে মনে বারে বারে বললাম, ‘মানুষ, তোমার রূপের তুলনা নেই। জীবনের শেষদিনেও যেন তোমাদেরই নমস্কার করে যেতে পারি।’

আমাদের চরের ভোজনপর্ব শেষে, এবার বিদায়ের পালা। ভরত পাটনী প্রস্তুত। নানী চোখের জল মুছে। মনিয়া হাসতে পারছে না। ছলারি যেন এক অলৌকিক দেবীর মতন বারে বারে আমার সঙ্গে

চোখাচোখি করলো। আর নিমন্ত্রণ জানালো, ছুরীর গাওনার সময় যেন আমি আসি। ফাগুয়ার সময় একবার খবর নিলেই গাওনার দিনটি জানতে পারবো।

কিন্তু ছুরী কোথায়? মনিয়া পুবের একটা ঘর দেখিয়ে বললো, 'ঊ ঘরকে ভিতর না।'

আমার এখন আর সংকোচ নেই। পুবের সেই ঘর দেখিয়ে বললো, 'ঊ ঘরকে ভিতর না।'

আমার এখন আর সংকোচ নেই। পুবের সেই ঘরে গিয়ে দেখলাম, ছুরী বেড়ার গায়ে মুখ চেপে, পিছন ফিরে দাঁড়িয়ে আছে। যুক্তি দিয়ে এর ব্যাখ্যা চলে না। ডাকলাম, 'ছুরী।'

ও ফিরলো না। কাছে গিয়ে দাঁড়ালাম, ডাকলাম, 'ছুরী।'

ও ফিরে তাকালো। লাল চোখ দুটো ভেজা। হাসবার চেষ্টা করলো। তারপরে বললো, 'সার্ কি তুমি আমার গাওনায় আসবে?'

বললাম, 'আসবো, তোমার মাকে বলছি।'

'আমাকে বল।' ছুরী বললো।

বললাম, 'তোমাকেও বলছি।'

ছুরী তখন গুর বাঁ হাতের মুঠিটা আমার দিকে এগিয়ে দিয়ে বললো, 'তা হলে এটা রাখ, গাওনার সময় এসে আমাকে দিও।' ও মুঠি খুলে আমার সামনে ধরলো।

দেখলাম, নতুন এক প্যাকেট সিঁড়র। অবাক হয়ে জিজ্ঞেস করলাম, 'এটা কেন দিচ্ছ?'

'তাহলে তুমি কথা রাখবে।' ছুরী বললো, 'সিন্দুর নিয়ে কেউ বুটা বলে না।'

এই কথা শোনার পরে হাত বাড়তে এক মুহূর্ত দ্বিধা করলাম। তারপরে সিঁড়রের প্যাকেটটা হাতে নিয়ে পকেটে রাখলাম। তাকালাম ছুরীর মুখের দিকে। কিশোরীর মুখটি লজ্জায় লাল হয়ে উঠেছে। চোখের পাতা নামিয়ে নিল। আমি আন্তে আন্তে বাইরে বেরিয়ে এলাম।

ভরতের সঙ্গে নৌকায় যখন উঠলাম, তখন জোয়ার চলেছে। উজানের টানে এসেছিলাম, উজানের টানে নিয়ে যাচ্ছে। নৌকা ভাসলো। সকলেই চরের উঁচু পাড়ে দাঁড়িয়ে। হয় তো আমার প্রাণের শক্তি কম। চরের ওপরে সারি সারি মূর্তিগুলো চোখের সামনে ঝাপসা হয়ে গেল, কাঁপতে লাগলো। মনে মনে বললাম, 'আবার আসার কথা যদি না রাখতে পারি, ক্ষমা করো।'...

ক্ষমা পেয়েছি কিনা জানি না। তবে স্মৃতির পটের মুখোমুখি দাঁড়িয়ে এখনো বুকের কাছে হুঁহাত জড়ো করি।

উরাতীয়া সমরেশ বসু

যখন বেলা পড়ে আসত, সারাদিনের রোদজ্বলা আকাশটায় ছড়াত রং-এর তীর ছটা, জনহীন হয়ে আসত মাঠ ও বন, তখন মনে হত রেললাইনের উঁচু জমিটা আরও উঁচু হয়ে উঠেছে। যেন সারাদিন পরে নুয়ে পড়া মাথাটা আড়মোড়া ভেঙে তুলে ধরেছে আকাশের দিকে। আর গাঢ় বর্ণের আকাশটা যেন নেমে আসত একটু একটু করে। আকাশটাই ঘিরে থাকত উঁচু জমিটাকে।

তখন, দূর থেকে মনে হ'ত দুটো অতিকায় দানব নেমে এসে মুখোমুখি দাঁড়িয়েছে ঐ উঁচু জমিতে। বিশ্ব সংসারের এ নির্জনতার সুযোগে তারা নেমে এসেছে ধরাতলে। আকাশের অনেকখানি জুড়ে থাকত তাদের বিশাল দেহ। তাদের স্ফীত সুগঠিত মাংসপেশীর প্রতিটি সুস্পষ্ট রেখা ঢেউ দিয়ে উঠত আকাশের বুকে। তারপর, যখন তারা হঠাৎ খানিকটা সরে গিয়ে, বুক পড়ে দাঁড়াত মুখোমুখি, এবং পরস্পরকে আচমকা আক্রমণ করে উঠে পড়ত, তখন শক্তি প্রয়োগে মাংসপেশীগুলি আরও উদ্দাম হয়ে উঠত। আকাশের বুকে ছিটকে যেত ধুলো মাটি। উঁচু জমিটা যেন থরথর করে কাঁপত তাদের দেহ ও পায়ে চাপে। তখন প্রাগৈতিহাসিক যুগের একটা ভয়ঙ্কর দৃশ্যের অবতারণা হত সন্ধ্যাকালের এ জমিটার উপরে।

তারপর এ লড়াই চলতে চলতে রং-এ রং-এ আকাশটা যখন কালো হয়ে আসে, জমি আর আকাশ হয়ে যায় একাকার তখন তারা দুজনেই আকাশ মাটির সঙ্গে একাত্ম হয়ে হারিয়ে যায়।

এমনি ঘটে রোজই। লড়িয়ে দু'জন দুই মস্ত মল্লবীর। লাখপতি আর ঘামারি। তারা দুজনেই রেলওয়ে গেটম্যান।

মফঃস্বল শহর থেকে মাইল সাত আটেক দূরে স্থানীয় স্টেশন থেকেও প্রায় দু'মাইল দূরে, মাঠের মাঝে এ ক্রসিং গেট। লাইনের পূর্বদিকে গ্রাম কিছুটা আছে। পশ্চিমের গ্রামটা একটা ঝাপসা কালো রেখায় মিশে থাকে আকাশের গায়ে। গেটের দু'দিকে দুটো ঢালু সড়ক নেমে গেছে ঐকে বেঁকে, হারিয়ে গেছে মাঠ ও গ্রামের মধ্যে। চওড়া সড়ক। গরুর গাড়ির চাকার দাগে দুপাশে গভীর রেখা পড়েছে। আর

চারপাশে সবুজ ফসলের ক্ষেত।

ক্রসিং-এর দুপাশে ঢালু জমিতেই গেটম্যানদের ঘর। এমনভাবে ঘরদুটো তৈরি হয়েছে, রেল লাইনের উপর থেকেই লাফিয়ে ঘরের ছাদে চলে যাওয়া যায়। এপার থেকে ওপারের ঘর দেখা যায় না, ওপার থেকে এপারের না।

কাছাকাছি কোন বড় গাছপালা নেই। পাখির জটলা বড় একটা শোনা যায় না। এখানে সারাদিন প্রজাপতি ফড়িং রঙিন পাখা মেলে অবাধে উড়ে বেড়ায়। ঝিঝির গলা ফাটানো ডাক আরও ভারি করে তোলে নৈশকালকে।

সারাদিন লোকেরও যাতায়াত কম এ পথে। সকালে আর বিকালে দেখা যায় কিছু লোককে যেতে। হয়ত যায় কয়েকটা গরুর গাড়ি সারাদিনে। তাও গরুর গাড়িগুলোকে অধিকাংশ দিনই বেশ খানিকক্ষণ ধরে দাঁড়িয়ে থাকতে হয় কেননা এই সীমান্তের যারা প্রহরী লাখপতি আর ঘামারি, তাদের যতক্ষণ দয়া না হবে, ততক্ষণ সীমান্তদ্বার খোলার কোন উপায় নেই।

তারা অবশ্য লোক খারাপ নয়। কিন্তু এই নির্জন গ্রামের সীমানায়, চাকরি ছাড়া জীবন-ধারণের যে আর মাত্র একটি দিক তাদের আছে, তা হল মল্লযুদ্ধ। সেজন্য দেহ তৈরি কাজটি তাদের সর্বাগ্রে। যখন ঘণ্টার পর ঘণ্টা তাদের তৈল মর্দনের সময় কিংবা সকালের বুকডন বৈঠকের উত্তেজনায় চোখ লাল, মাথাটা অবসাদগ্রস্ত আর দেহের শিরায় শিরায় রক্তপ্রবাহ পাগলা গতিতে থাকে লাফাতে, তখন পাচন বাড়ি হাতে কোন গাড়েয়ানের খোলেন গো পবন-পো শব্দ তাদের কানেই ঢোকে না।

পবন-পো কথাটি খুব শ্রদ্ধা ও ভয়ের সঙ্গেই গাঁয়ের লোকে তাদের বলে। তারাও সাগ্রহে ও আত্মসন্তোষের সঙ্গে এই সম্মান গ্রহণ করে। কেননা পবন পুত্র বলতে ভীম এবং হনুমানকেই নাকি বুঝিয়ে থাকে। লাখপতি আর ঘামারি, পরস্পরকে তারা ঐ শক্তিমান বীর দুজনেরই অংশবিশেষ বলে মনে করে। আর দুই বীরেরই পূজারী তারা। বজ্রবলী তাদের দেবতা। অর্থাৎ বীর শ্রেষ্ঠ হনুমান।

কথাটা মিথ্যে নয়।

এই নির্জন পরিবেশে, লোকালয়ের বাইরে, দূর প্রান্তরে তারা দুই বন্ধু যেন গহন অরণ্যের দুটি জীব। এখানে এই পরিবেশে তারা একাত্ম ও মুক্ত।

লাখপতি এখানে এসেছিল তার বিশ বছর বয়সে। ঘামারি তার চেয়ে বড় বছর দুয়েকের। আজ দশ বছর ধরে তারা একত্র রয়েছে। এই দশ বছরের মধ্যে তারা কখনও ফারাক হয়নি। এই দশ বছরের মধ্যে পৃথিবীতে হয়েছে অনেক ওলটপালট। অনেক রাজ্য ভেঙেছে গড়েছে। অনেক মানুষ বেঁচেছে মরেছে। নদী ভিন্ন পথ ধরেছে, ঘটে গেছে ভৌগোলিক পরিবর্তন। এমন কি ঐ দূরের গ্রামগুলিতেও

পরিবর্তন হয়েছে কিছু কিছু। কিন্তু এখানে কোন পরিবর্তন নেই। উদার আকাশের তলায় এই নির্জন লেবেল ক্রসিং-এর দু-পাশে যেন পৃথিবীর কোন দুর্গম অঞ্চলের প্রাগৈতিহাসিকতা বিরাজিত।

পরিবর্তন যেটুকু হয়েছে, সেটুকু লাখপতি আর ঘামারির দেহে ও রক্তে। দিনে দিনে তাদের দেহের রূপ বদলেছে। সঞ্চিত হয়েছে রক্ত, স্থিত হয়েছে মাংসপেশী। এখন ক্রমে বাধাহীন হয়ে উঠেছে যেন তাদের রক্তপ্রবাহ। দেহের মধ্যে সে অস্থির, প্রতি মুহূর্তে একটা ভয়ঙ্কর বন্যতা ফেটে পড়তে চাইছে। ক্রমশ অধ্যবসায়ে একদিন যা ছিল কোমল সুন্দর ও সুগঠিত, আজ তা বন্য পাহাড়ের মত খোঁচা খোঁচা পাথর। তাদের প্রেম, ভালবাসা, তাদের হাসিখুশি, আলাপ আলোচনা সব এই দেহকে ঘিরে। এই দেহ ও পরম্পরের সঙ্গে মল্লযুদ্ধই বন্ধুত্ব। আর দিনে দিনে পরিবর্তন হয়েছে রেললাইনের তারের বেড়ার বাইরে তাদের মল্লভূমির প্রশস্ত স্থানটুকুর। সেই মাটিটুকুকেও তারা দেহের মত ভালবাসে, দেহের মতই তার সেবা করে, তার প্রতিটি কণাকে তৈরি করে। এই মাটিতে তাদেরই গায়ের গন্ধ, তাদেরই ঘামে তাদেরই উদ্ভাপে শুকনো ও বুরবুরে।

এবেলা ওবেলা দিনে ও রাত্রে কয়েকবার করে নিশান দেখানো, দেখানো নীল আলো, তাদের কাছে কোন কাজই নয়। মাসে তারা একবার করে সাত আট মাইল দূরের জংশন স্টেশনে যায় মাইনে আনতে। খোরাকি ও দরকারী বস্তু কিনে নিয়ে আসে তখনই। বাদ বাকী দরকার দিনে একবার করে গাঁয়ে গেলেই মিটে যায়। তাদের দুজনের দুটো গরু আছে। কিনতে হয়নি, দিয়েছে পুষতে না পারা হা-ভাতে গাঁয়ের লোকেরা। গরু পুষতেও তাদের ভাবতে হয় না। লাইনের ধারে বেঁধে দিলেই জীব দুটির পেট ভরে। রাত্রে কিছু জাব আর জল। তাইতেই দুধটা তাদের লাভ। সকালের দুধটা একজন এসে নিয়ে যায়। বিকালের দুধ তারা তাদের কুস্তির পর, জলের মত কাঁচা-ই পান করে। রাঁধে খায় একসঙ্গে, রাত্রে শোয় আলাদা।

সকাল থেকে রাত্রি পর্যন্ত, এই কাজগুলি সামান্য। কিন্তু, এই নির্জন পরিবেশে যা একদিন প্রয়োজনের জন্য তারা আরম্ভ করেছিল আজ তা দারুণ নেশার মত জড়িয়ে ধরেছে রক্তের মধ্যে। অসামান্য হল দেহচর্চা। রাত পোহালেই রক্তপ্রবাহে জাগে কলরোল। দেহের মধ্যে আছে তাদেরই অপরিচিত আর একটা খাপা জীব। সময়ের একটু এদিক ওদিক হলে, প্রতিটি ধমনীতে সে পাগলের মত খোঁচাতে থাকে, ছুটোছুটি করে।

তখন আর চূপ করে বসে থাকা যায় না। তখনি ল্যাঙট এঁটে, তুলসী মঞ্চের গর্ভে সমস্তে রক্ষিত চন্ডমানেব ছোট মূর্তিটিকে নমস্কার করে বুকডন বৈঠকে মেতে যায় তারা। বিকাল না হতেই আবার সেই বজ্রবৎসলীর পূজা, তৈল মর্দন, ব্যায়াম ও মল্লযুদ্ধ। মল্লযুদ্ধের শেষে দুধের মধ্যে বাটা সিদ্ধি মিশিয়ে খায়। খেয়ে গরিলার মত

রক্তবর্ণ দুটো চোখে স্নেহ ও সোহাগ ভরে দেখে শুধু নিজেদের দেহ। যেন তাদেরই পোষা দুটি অতি স্নেহের জীব এই দেহ দুটি।

এই সময়ে তাদের অতি ভয়ঙ্কর দেখায়। মাথা আর ঘাড় তাদের সমান হয়ে উঠেছে। কোথাও যেন উঁচু নীচু নেই। কান দুটোও আঘাতে আঘাতে দুমড়ে চেপ্টে যেন অনেকখানি মিশে গেছে। মল্লবীরদের নিয়ম ভাই। কান পিটিয়ে পিটিয়ে একটা ডালা ডুমড়ি গোছের করে ফেলতে হয়। সেই কানে আবার অতি যত্নে পরানো আছে সোনার মাকড়ি। নাকগুলো চেপ্টে ঐঁকে বেঁকে গেছে। চোখের কোল ও গালের মাংসও শক্ত ফোলা, চোখ দুটো ঢাকা পড়ে গিয়েছে কোটরে। ঘাড়ের মাংসপেশী যেন নিয়ত আক্রমণোদ্যত ভল্লকের মত ঠেলে হুমড়ি খেয়ে পড়েছে সামনের দিকে।

তারা বসে থাকে মুখোমুখি। আর তাদের মুখোমুখি হাঁ করে চেয়ে থাকে মাঠ, বন, সর্পিল সড়ক আর আকাশ। তাদেরই ক্রান্তি ও অক্রান্তিতে বিরতি দিয়ে দিয়ে ডাকে ঝিঝি।

তখন ঘামারি হয়তো বলে, 'আচ্ছা লাখুয়া, ভীমের চেহারাটা কিরকম ছিল বলতে পারিস?'

কথাটার মধ্যে কোন ঠাট্টার আভাস নেই। লাখপতি একটু ভেবে বলে, 'ঠিক বলতে পারছি না। তবে শুনেছি দৈত্যের মত। তা নইলে আর হিড়িম্বা রাক্ষসীকে মেরে ফেলেছিল?'

ঘামারি বলে, 'হঁ, ঠিক।'

ভীম হনুমান, এদের নিয়ে প্রায়ই তারা এরকম আলোচনা করে। ইচ্ছে করে নয়। আপনি ওসব কথা তাদের মনে আসে।

কোন সময় হয়তো লাখপতি বলে, 'জানিস ঘামারি, আমার মনে হয় মহাবীর হনুমান আমাদের জরুর দেখভাল করে, আসে এখানে।'

অমনি ঘামারির ভাং নেশাচ্ছন্ন লাল চোখ দুটো ওঠে চকচকিয়ে, বলে, 'হঁারে, আমারও শালা ওরকম মনে হয়।' বলতে বলতেই আপনি আপনিই তাদের দেহের মাংসপেশীগুলি নাচতে থাকে।

তখন ঘামারি বলে, 'আমার কি মনে হয় জানিস। এ রেল-লাইনের জমিটা আমি একলাই সিরিফ গর্দানের ধাক্কা দিয়ে ফেলে দিতে পারি। কেন বল তো?'

লাখপতি বলে, 'কি জানি মাইরী। আমরা শালা ওরকম মনে হয়। মনে হয়, দুনিয়াটা বেমালুম হালকা। ঘাড়ে করে নিতে পারি।'

সত্যি, দেহে তাদের এত শক্তির প্রাচুর্য, যে শুধু নেশা নয়, এমন একটা অপরিসীম ক্ষমতা অনুভব করে তারা। এই প্রচণ্ড শক্তিটা একসঙ্গে জমাট হয়ে যেন আগুনের মত ঠিকরে পড়ে তাদের চোখে। দেহ তাদের গৌরব, তাদের সব।

তখন ঘামারি হয়তো বলে, 'আয়, আর একবার লড়ি।'

লাখপতি বলে, 'সেই ভাল।'

কিন্তু আবেগবশত যেদিন লড়ে, সেদিন সময়ের কোন স্থিরতা থাকে না। অন্ধকারে শুধু দুপদাপ হঠাৎ চাপা ছন্ধারের তীক্ষ্ণ শব্দ, জন্তুর নিঃশ্বাসের ফোঁস-ফোঁসানি রাত্রিটাকে চমকে দেয়। বিমূঢ় অন্ধকার ও নক্ষত্রখচিত আকাশ চেয়ে থাকে হাঁ করে। আর অন্ধকারেও তাদের ঘর্মান্ত শরীরে এমন একটা চমকানি দেখা যায়, যেন পাথরের ঘর্ষণে জ্বলে ওঠে আগুনের ঝিলিক। কখনো শুধু মাথা ঠোকাঠুকি করে পরস্পর! তখন মনে হয়, লেঠেলদের লাঠি ঠোকাঠুকি হচ্ছে।

এই দৈহিক শক্তির খেলাই তাদের নেশা। তাদের মাতামাতিতে রাত্রিচর বাদুড়গুলিও দূর দিয়ে উড়ে যায়, জানোয়ারগুলি ফারাক দিয়ে পাশ কাটায়। কারণ প্রকৃতির গড়া ভয়ঙ্করের মতই তাদের তখন দেখতে হয়।

এই দশ বছর কেউ তাদের কোথাও যেতে দেখেনি। গাঁয়ের লোক জানত তাদের কেউ নেই। তারাও সেই রকমই জানত বোধহয়। কেননা তাদের মুখে কেউ কখনো অন্য কথা শোনেনি। গাঁয়ের সঙ্গে তাদের সম্পর্কও কম। কেবল মাঝে মাঝে গাঁয়ের ছেলেরা আসে তাদের কুস্তি দেখতে। তাও ভয়ে ভয়ে। তাদের এই নীরস দেহ সাধনা মানুষের কাছ থেকে তাদের সরিয়ে দিয়েছে। নীল পুঞ্জোর দিন, গাঁয়ের মেয়েরাও আসে। আর সপ্তাহে একদিন, শুক্রবার কিছু ভিড় হয়। ওইদিন হাটবার, ক্রসিং পেরিয়ে যেতে হয় হাটে, সেই জন্যই ভিড়।

লোকে যেমন জানত, তাদের কেউ নেই, তারাও সেই রকম বিশ্বাস করত। কেননা, ঘামারির বউ মরে গেছে দেশে থাকতেই। তার আর কেউ নেই। তারপর থেকে সে এখানে আছে।

লাখপতিও পিতৃমাতৃহীন। ভাইবোনও নেই। ভগবান জানে, তার বাপ-মা কি ভরসায় তার নাম রেখেছিল লাখপতি। পাঁচ বছর বয়সে তার বিয়ে দিয়ে দশ বছর বয়সে তার বাপ মা তাকে সংসারে একাকী করে রেখে গেছে। না ঘর, না ক্ষেতি জমি। ভাগ্যি ভাল, খুড়ো ছিল শিয়ালদহ লোকের কুলি। সে বেঁচে থাকতেই জুটিয়ে দিয়েছিল কাজটা। পাঁচ বছর বয়সে বিয়ে হয়েছিল। নিয়ম হচ্ছে বর কনে বড় হলে, জোয়ান হলে গাওনা হয়। ওইটাই আসল বিয়ে। তখন থেকে স্বামী স্ত্রী একসঙ্গে ঘর করে। কিন্তু লাখপতির ভাগ্যে তাও ঘটে ওঠেনি। কি দিয়ে গাওনা হবে, বউ আসবে কোথায়।

তারপরে কাজ জুটেছে এই বাংলাদেশে। কেউ তাকে দেশে আজ অবধি ডাকেনি, সে-ও যায়নি। বউটাকে হয়তো আর কেউ ঘরে তুলেছে, কিংবা বাপ-মা বিক্রি করে দিয়েছে কাউকে। কিন্তু সেকথা দশবছরে দশবারও তার মনে পড়েছে কিনা সন্দেহ। এমন কি পাঁচ বছরের সেই স্মৃতির কথাও নেই তার মনে।

নারী সংক্রান্ত কথাবার্তা তাদের আলোচনায় খুব কম। ওদিক থেকে তারা নির্বিকার ও নির্লিপ্ত। গাঁয়ের কোন মেয়ের সাথে দেখা হওয়া ও মেশার অবসর নেই তাদের।

তারা আছে তাদের কাজ, দেহচর্চা ও মল্লযুদ্ধ নিয়ে। তারা শোনে শহরের মল্লযোদ্ধাদের কথা। তারা শহরে গেলে শহরের লোকেরা হাঁ করে তাকিয়ে থাকে তাদের দিকে।

তবু তাদের এই অসীম শক্তি ও বিশাল দেহটার মধ্যে কি যেন আটকা পড়ে আছে। যেন একটা খাঁচায় পোরা পাখি ছুটফট করছে সব সময়েই মুক্তির জন্য। কিন্তু এই পরিবেশ ও দেহ ভেদ করে সে কখনোই বাইরে আসতে পারে না। এ যে কিসের বন্ধন তারা জানে না। তবু একটা দুর্বোধ্য আবেগ আসে তাদের মনে। তা-ও এতই ক্ষণস্থায়ী যে, আ গর তারা মল্লভূমিতে ঝাঁপিয়ে পড়ে। ক্রান্ত হলে পড়ে ঘুমিয়ে। ঘুম ভেঙেই গর্ব ও আনন্দভরে তাকায় পাহাড়ের বৃকের দিকে, নাড়া দেয় মাংসপেশী। যেন পাথর কাঁপছে। তারপর আধঘুমন্ত, আড় মাতালের মত কাজে হাত দেয়।

দেহ প্রধান। মস্তিষ্ক যেন কোন কুলুপ কাঠি দিয়ে আটকানো, অবসাদগ্রস্ত, নিষ্ক্রিয়। হৃদয়টাও কেমন যেন আবদ্ধ অন্ধকার। এই তাদের জীবন।

এমনি অবস্থায় একদিন, হেমন্তের মাঝামাঝি এক দুপুরে গাঁয়ের ডাকঘরের পিয়ন এসে ডাকল, 'কই গো পবন-পো দাদারা।'

জবাব এল, 'এখন দরজা নাই খোলা যাবে গো।'

পিয়নটাও অবাক হয়েছিল। চিঠি দেখে হাঁক দিল আবার, 'লাখপতি চামারিয়া কে আছেন গো আপনাদের মধ্যে?'

লাখপতি চামারিয়া? দুই মল্লবীরই উঠে এল দিবানিদ্রা ছেড়ে। তারাও ভারি অবাক।

লাখপতি বলল, 'কি হয়েছে?'

'আপনার নাম লাখপতি চামারিয়া?' এ গ্রাম্য বাঙালি পিয়ন চামারিয়া পদবীটা একটা বর্ণহিন্দুর পদবী ঠাউরেছে বোধহয়।

লাখপতি বলল, 'হ্যাঁ হ্যাঁ।'

'আপনার একটা চিঠি আছে।'

'ইংলিশ চিঠি?'

'না। হিন্দি।'

বোঝা গেল অফিসের নয়। লাখপতি আর ঘামারি মুখ চাওয়াচাওয়ি করে, মাটি কাঁপিয়ে গিয়ে চিঠিটা নিল। পড়বে কে? ঘামারি সামান্য পড়তে জানে। তবে দেহাতী অক্ষর। সৌভাগ্যের বিষয় চিঠিটা ধুলোকাদামাখা দোমড়ানো হ'লেও দেহাতী

ভাষায় লেখা।

পিয়ন বলল, 'ছ'মাস আগে চিঠিটা আপনাদের হেডঅফিসে এসেছে, এখনকার ঠিকানা নাই কি না? তা কি বিস্তারিত?'

দুজনেই তাড়াতাড়ি খাটিয়া পেতে বসল পড়তে। প্রথম অঙ্করটি পড়তে প্রায় পাঁচমিনিট লাগল। পিয়ন বিদায় হল হতাশ হয়ে।

বিকালের দিকে চিঠি পড়া শেষ হলে তারা অবগত হল, চিঠিটা দিচ্ছে লাখপতির বিধবা খুড়ি। বক্তব্য, সে এবার মরবে। আশা করছে, এতদিনে লাখপতি গুছিয়ে নিয়েছে। সে যেন তার বউকে এবার নিয়ে যায়। বউ খুড়ির কাছেই আছে। তাই উপদেশ হচ্ছে, জোয়ান আওরৎ, খর নদীর নৌকা! মাঝি হাল না ধরলে এবার তরী যাবে। অতএব আর দেরি নয়।

দুজনেই তারা তাদের এবড়ো-খেবড়ো মুখ দুটো আরও ভয়ঙ্কর করে বসে রইল। জীবনে একটা বাধা এসে উপস্থিত হয়েছে। নিতান্ত আচমকা। হোক দেহের মধ্যে সীমিত তবু জীবন তাদের ওখানেই পরিপূর্ণ। দেহের নানাস্থানে কতগুলি মাংসপেশী ফুলে উঠে অস্বস্তিতে থমকে রইল।

ঘামারি বলল, 'অওরৎ?'

লাখপতি বলল, 'এখানে?'

একটা ধিক্কার দেখা দিল তাদের চোখে, কিন্তু এদিকে বিকালের অস্থিরতা মাথা চাড়া দিয়ে উঠল তাদের রক্তধারায়। কথা অসমাপ্ত রেখে নেশার ডাকে সাড়া দিতে চলল তারা। দুজনেই ঝাঁপিয়ে পড়ল নরম মল্লক্ষেত্রে।

তারপর রাতে যখন দুধ সিদ্ধি খেয়ে বসল দুজনে, তখন এই ভাবনা ঘিরে এল আবার তাদের মনে। দেহকে ঘিরে তাদের ঘোর স্বার্থপরতা, পৃথিবীর আর সবদিক থেকে এমনই ভাবে বিমুখ করে রেখেছে চোখ ও মন। তাদের দেহ সাধনার যে পরম আনন্দ, তাতে নিরানন্দের অঙ্ককার ঘন হয়ে আসছে। এই দেহ থাকলে তার সুখ, পরমায়ু ও ভগবান। আওরৎ তো তাতে শুধু ক্ষয় ধরিয়ে দেবে।

অঙ্ককারের মধ্যে পরস্পরকে একবার দেখল। তারপর স্থির হল, এটা নিশ্চয়ই মহাবীরের ইচ্ছা। সুতরাং আনতেই হবে। তবে লাখপতি তার এই দেহের ভাগ তাকে দেবে না। দুই বন্ধু এই স্থির করল। বউ থাকবে নিজের কাজ নিয়ে।

তারপর ছুটি নিয়ে লাখপতি দেশে গেল। নিয়ে এল বউ।

ছাব্বিশ বছরের এক মেয়ে, নাম তার উরাতীয়া। খুড়ি শাওড়ির ঘরে ক্রীতদাসীর মত খেটে যাওয়া মেয়ে। স্বাস্থ্য ও যৌবনে পূর্ণ তার সুগঠিত দেহ। বেশ আঁটো, সামান্য খাটো, রংটা আধা ফরসা। রূপসী বলা যায় কিনা জানিনে। তার নিরাভরণ শরীরের পুষ্ট হাতপায়ের গোছায় একটা বিহারী রুক্ষতা, কিন্তু চোখ দুটি ভরা কালো দীঘির মত ভাসা ভাসা অথচ গভীর। আর হয়তো প্রথম স্বামী সাক্ষাতের

গোপনলীলায় একটা দুর্বোধ্য হাসি তার গালের টোলে।

একটা হুলাদে শাড়ির ঘোমটা টেনে সে এল লাখপতির সঙ্গে, হাতে পুটলি ঝুলিয়ে। এল নির্জন মাঠের বুক, লেবেল ক্রসিং-এর ঢালু জমির কোলে গেটম্যানদের ঘরে। একদিন যাদের পদক্ষেপে ঘরটা কাঁপত, আজ আর একজনের পদসঞ্চারে সেই ঘর নিঃশব্দ, কিন্তু বিচিত্র শিহরণে, পুলকে ভরে উঠল। মল্লবীরের সাজানো গোছানো গুমটি ঘরে আলো এল, হাওয়া বইল।

ঘামারি এসে দাঁড়াল। লাখপতি দুহাতে জড়িয়ে ধরল তাকে। বুক বুক ঠেকল। কয়েকদিনের যন্ত্রণাকাতর চাপাপড়া রক্তধারায় জোয়ার এল আবার। তারপর দুই মল্লবীর চোখ দিয়ে চেটে চেটে দেখল দু'জনকে। উজ্জ্বল হয়ে উঠল দু'জোড়া চোখ।

লাখপতি বলল, 'চল, একবার দেখা যাক।'

ঘামারি বলল, 'তুই দেখিস নি?'

লাখপতি বলল, 'ধু-স শালা, মনেই হয়নি। চল একসঙ্গে দেখিগে।'

ঘামারি : 'কি আর দেখব? আওরৎ আওরৎ।'

লাখপতি : 'তবু একবার—'

দু'জনে হাত ধরে ঘরে ঢুকল। উরাতীয়া বসে রয়েছে ঘোমটা টেনে। তারা দুজনে বসল অদূরের খাটিয়ায়। উরাতীয়াকে দেখে আর চোখাচোখি করে।

একটু পরে উরাতীয়া ঘোমটা তুলে খুব ধীরে ধীরে মুখ ফিরিয়ে তাকাল তার কালো চোখে। দু'জনের সঙ্গে তার চোখাচোখি হতেই শান্ত অথচ মিঠে হাসি চমকে উঠল তার চোখে ও গালের টোলে। মাথাটি গেল নেমে, রুম্ব খোঁপাটি ভেঙে পড়ল ঘাড়ের পাশ দিয়ে।

হাসি দেখে অবাক বিস্ময়ে মুখ চাওয়া-চাওয়ি করল মল্লবীরেরা। আবার উরাতীয়ার চোখ উঠল, দূরে মেঘে যেন হালকা বিদ্যুৎ চমকালো মিঠে হাসির। বিশাল দেহে দুই বন্ধু আবার মুখ চাইল পরস্পরের।

তারপর হেসে উঠল। হাসতেই লাগল উচ্চরোলে। যেন এক রুদ্ধধারা হঠাৎ মুক্ত হয়ে অনর্গল বয়ে চলল অটুরবে।

আর সেই অটুরবের সঙ্গে এক বিচিত্র সুর যোজনা করল নূপুর নিক্কণের মত চাপা গলার খিলখিল হাসি, থরথর করে কেঁপে উঠল উরাতীয়ার শরীর ও ভাঙা খোঁপা।

এমনই অভাবনীয়, অচিন্তনীয় এই বিচিত্র হাসির রোল যে, প্রাগৈতিহাসিক যুগের ক্রসিং গেটের এই চারপাশের সীমা, তার বনপালা সড়ক ও আকাশ থমকে রইল এক মুহূর্ত। পরমুহূর্তেই হেমন্তের অপরাহ্ন নেচে উঠল হাওয়ায়। ইতিহাসের যুগ ফিরে এল যেন, সমস্ত পরিবেশটায়।

আজ এল মাঠের পাব। আমনের গন্ধ, গাভীর হাস্য রব, মাঠের মানুষের হাঁকাহাঁকি ডাকাডাকি। আর আশ্চর্য! এই কান পেটানো, নাক খ্যাবড়ানো, চাঁছা মাথা, এবড়ো খেবড়ো মুখ এই পাহাড়ে মানুষ দুটোকে দেখে একটু ভয় পেল না গেলো উরাতীয়া। সে সমান তালে হেসে হাসিয়ে এক নতুন রং ছড়িয়ে দিল এখানে। তারপর খুলে ফেলল তার পুটলি।

কণ্ঠরোল থামল। কিন্তু যেন যুগ যুগান্তরের চাপা পড়া হাসি কাঁপতে লাগল মল্লবীরদের পেশীতে পেশীতে, হাসতে লাগল গর্তে ঢোকানো চোখ। নিজেদের হাসিতে তারা নিজেরাই বিস্মিত। কৌতূহলিত হয়ে তারা দেখল আবার উরাতীয়াকে।

উরাতীয়া পুটলি খুলে বার করেছে বাঁকমল। পরেছে পায়ে। এইটুকু তার বাপের বাড়ির সম্বল। লুকিয়ে রেখেছিল খুড়িশাশুড়ির ঘরে এসে। আসল লোকের ঘরে এসে একদিন সে পরবে, এই ছিল সাধ। আজ তা পূর্ণ হল।

মল পায়ে উঠে দাঁড়াল সে। অসঙ্কোচে ঘুরল সারাটি ঘর। আপন মনে হেসে হেসে দেখল চারদিক। রাবণের লঙ্কা পোড়ানো, গন্ধমাদন বহন, বুক চিরে দেখানো রামসীতা, এমনি ছ'সাত রকমের শুধু মহাবীর হনুমানের ছবি টাঙানো আছে ঘরটায়।

তারপর বাইরে এসে দাঁড়াল উরাতীয়া। দুই মল্লবীর বন্ধুও উঁকি মেরে দেখতে লাগল এই অদ্ভুত ব্যাপার। উরাতীয়া গিয়ে দাঁড়াল তুলসীমঞ্চের কাছে। নীচু হয়ে দেখল মহাবীর হনুমানের মূর্তি। সেখানে গড় করল। মল্লক্ষেত্রের চারপাশে দুই বন্ধু লাগিয়েছে বেল ও গাঁদার চারা। সৌন্দর্যের জন্য নয়। মল্লক্ষেত্রের পবিত্রতার জন্য। হনুমানজীর পূজার জন্য। কয়েকটা গাঁদা ফুল ফুটেছে এর মধ্যেই।

উরাতীয়া টপাস করে ছিঁড়ল একটি ফুল। আড় চোখে দেখল দুই পুরুষকে। তারপর লাইন পেরিয়ে নেমে গেল ওপারে। গিয়ে খোঁপায় গুঁজে দিল ফুলটি।

দুই বন্ধু এগিয়ে উঁকি দিল। দেখল, উরাতীয়া ঘামারির ঘরটিও দেখছে ঘুরে ঘুরে। তার ঘোমটা গেছে খসে। বাইরে এসে দুজনের সঙ্গে চোখাচোখি হতেই লজ্জার বিচিত্র রাগে হেসে মুখ ঘুরিয়ে নিল।

আর একটা হাসির উচ্চরোল পড়ল ফেটে। কেন, তারা নিজেরাই জানে না। কেবলই হাসি আসছে, হাসি পাচ্ছে। প্রাণ চাইছে, ভাল লাগছে।

তারপর দেখা গেল তাদের গায়ে আঁচলের হাওয়া দিয়ে উরাতীয়া দুলে দুলে চলে গেল পুবের সড়কের পাশে ছোট্ট পুকুরটিতে। স্নান করে এসে কাপড় পরে খুঁজে পেতে বার করল দুধের বালতি। গাইয়ের বাঁট দেখে সে টের পেয়েছে সময় হয়েছে দুইবার। মরদগুলোর সে খেয়াল নেই। কোনদিন ছিল নাকি।

একটা নয়, ঘামারির গরুরও দুধ দুইল সে। দুয়ে অবাক-মুগ্ধ মল্লবীর পুরুষদের সামনে এসে দাঁড়াল। মুখ ফিরিয়ে জিজ্ঞেস করল, 'উনুন কোথায়? আগুন দেব।'

দুই বন্ধু বিস্ময়ে চোখাচোখি করল। চোখে চোখেই তাদের কথা। পরস্পরের

চোখের দিকে তাকালেই তারা মনের ভাব বুঝতে পারে। মল্লক্ষেত্রে ঐ শিক্ষাটি তারা আয়ত্ত্ব করেছে। তাদের চোখ বোবা জানোয়ারের মত বলাবলি করছিল, 'এসব কি হচ্ছে? সত্যিই কি আমাদের জীবনে একটা নতুন কিছু ঘটতে বসেছে? একটা কোন সর্বনাশ কিংবা সুখের ব্যাপার ঘটতে যাচ্ছে?' তবু তাদের মস্ত বুক দুটিতে একটা খুশির বন্যা পাক দিয়ে উঠছে।

ঘামারি বলল, 'তোর উনুনটা বার করে দে।'

লাখপতি বলল, 'কেন? তোরাটা দে।' বলেই আবার কি হল, তারা হেসে উঠল। এক নাম না জানা মদির বসে আকর্ষণ ভরে উঠেছে তাদের। একটা মাতলামির ঘোর লেগেছে মনে।

শুধু তাদের মাঝে হাসি উচ্ছল উরাতীয়ার গা বেয়ে যেন একটা মানুষিক মোহের ঝরনা পড়তে লাগল গড়িয়ে গড়িয়ে।

ঘামারি তেল আর ল্যাঙট নিয়ে এল। লাখপতির চাপা বস্ত্রে লাগল ঢেউ। নুজনে ঝাঁপিয়ে পড়ল মল্লক্ষেত্রে। এতদিন শুধু মল্লযুদ্ধের জন্য মল্লযুদ্ধ হয়েছে। এতদিন শুধু নানান কায়দা ও চাপা ছকার উঠেছে ভয়ঙ্কর শক্তির ঘোরে। আর থমকে থেকেছে চারিদিকের পরিবেশ।

আজকের লড়াই উল্লসিত। আজ প্রাণখোলা উল্লাসের বান ডেকেছে মল্লক্ষেত্রে। রান্না চাপিয়ে থেকে থেকে এসে দাঁড়াচ্ছে উরাতীয়া। কখনো বাঁকা হয়ে, সোজা দাঁড়িয়ে, ঘোমটা তুলে ও খুলে, চোখ বড় বড় করে নয়তো খিলখিল হাসির বাজনা বাজিয়ে দেখছে। এই অল্প সময়ের মধ্যেই অসঙ্কোচে দিয়ে উঠেছিল হাততালি।

মাঝে মাঝে শক্তিত হয়ে লক্ষ্য করছে কার ক্ষমতা বেশি। আশ্চর্য! কেউ কাউকে আঁটতে পারছে না। ঘামারিকে ফেলে লাখপতি তার ঘাড়ে মাটি ফেলছে আর হাঁকাচ্ছে রদ্দা। তারপর বগলের তলায় হাত দিয়ে চেপ্টা করছে উন্টে ফেলতে। পারছে না। আবার পাল্টা লাখপতিকে নিয়ে চলল চেপ্টা। হল না!

তখন আবার হাসি। তিনজনের হাসি। এতদিন এই সন্ধ্যাবেলার উঁচু জমিটার উপরে, আকাশের কোলে দেখা যেত দুটি দানবের মূর্তি। আজ আর একটি বিচিত্র রূপের দ্যুতি মূর্তি ধরে দাঁড়িয়েছে তাদের মাঝখানে। আজ তারাও যেন ধরেছে মানুষের মূর্তি। মানুষিক স্বপ্নের ঘোর লেগেছে আজ এখানে।

তারপর দিন চলে গেল। একটা নতুন যুগের নবরূপায়ণের সূচনা ঘটল এখানে।

উরাতীয়া ছোট ঘরের মেয়ে ও বউ। ক্রীতদাসী ছিল খুড়িশাওড়ির ঘরে। নিষিদ্ধ যৌবন বাসর থেকে নিয়ত হাতছানি দিয়ে ডেকেছে তাকে। যেমন ডাকত আরও অনেককে। যেতও অনেকে। সে প্রতীক্ষা করেছিল একজনের জন্য।

এখানে এসে তার ছাব্বিশ বছরের পিপাসিত যৌবন প্রাবিত হল। সেই প্রাবনের ধারায় পলি পড়ল এখানকার মাটিতে, দুটি মল্লবীর মানুষের হৃদয়ে। সে একজনকে

দিয়ে খুশি, পেয়ে খুশি আর একজনকে। লাখপতি তার ঝোলআনা জীবন ও যৌবনের দেবতা। ঝোল আনার হিসেবের পর যেটুকু মানুষকে করে নিঃশঙ্ক, বৃকে আনে বল, তার সেটুকু হল ঘামারি। ঘামারি তার সহচর। তারা তার প্রেম ও প্রীতি, ভালবাসা ও সৌহার্দ্য, সুখ ও দুঃখ।

দেবতা ও সহচর, দুই মল্লবীরের মনে সে বোধ ছিল না। অবোধ খুশিতে রচিত হয়েছে তাদের নতুন জীবন। তারা এতদিন শক্তি অনুভব করেছে মাংসপেশীতে। এবার হৃদয়ে হৃদয়ে। তাদের বিশাল শক্তিশালী শরীরের মধ্যে যে বন্দী বিহঙ্গটা এতদিন ছটফট করেছে, সে অকস্মাৎ মুক্ত হয়ে ঝাপ দিয়ে স্নান করে নিল এক মুক্ত ফল্লুধারায়। জানত না, বন্দীর এই মুক্ত ফল্লুধারা হল উরাতীয়া।

এখন কুস্তির শেষে, যখন তারা দুজন দুখ সিদ্ধি খেয়ে হাওয়ায় বসে দোলে, তখন তাদের মাঝখানে এসে বসে উরাতীয়া। আগে তাদের মস্তিষ্ক থাকত অবসাদগ্রস্ত আর শরীরে বহিত রক্ত। এখন মস্তিষ্কের একটা নতুন টঙ্কার অনুভূত হয়।

উরাতীয়া বলে ঘামারিকে, 'তারপর সেকথাটা বল। তোমার বউ কেমন করে মরল?'

মহাবীর, ভীম নয়, কুস্তি কায়দা নয়, বউয়ের কথা। ঘামারি বলল, 'কি আর বলব।'

লাখপতি বলে, 'বল না। আমি তো কোনদিন শুনিনি?'

উরাতীয়া ব্যথা পায়, অবাক হয়। বলে, 'সচ্! ওমা এত বন্ধুত্ব আর একথাটা কোনদিন বলা কওয়া হয়নি?'

অমনি ঠোট ফুলিয়ে অভিমান ভরে বলে উরাতীয়া, 'যাও! তোমরা যেন কি?'

বলতে বলতে চোখ ছলছলিয়ে ওঠে তার। আর ওই কথা, ওই জলটুকু তাদের গলায় একটা বিস্মিত ব্যথা ও আনন্দের গোঞ্জানি এনে দেয়। সত্যি তারা অনেক কথা এতদিন বলেছে, হেসেছে। কিন্তু এমন বিচিত্র হাসি ব্যথা ও আনন্দ, এত অজ্ঞানিত সুখ দুঃখ হৃদয়ের ছোটখাটো অসামান্য বিষয়ের আদান প্রদান হয়নি।

অনেক কথা, অনেক হাসি, এমন কি কোন কোন রাতে মোটা ও হেঁড়ে গলায় বেসুরো গান পর্যন্ত শোনা যায়।

ধোকে কে নিউ'পর

ইমারৎ নহি বনতে।।

অর্থাৎ মিথ্যার ভিত্তে সত্য দাঁড়ায় না। এ গানটা লাখপতি শুনেছিল কোন কালে মাইনে আনতে গিয়ে জংশন স্টেশনে। হনুমানের কীর্তিগাথা নয়, হিড়িম্বা বধের কাহিনী নয়, একেবারে সত্য কথা। তাও এতদিন পরে।

বেসুরো ও হেঁড়ে গলার জন্যও তাদের তিনজনের হাসির অস্ত ছিল না। কখনো ঘামারি সব উদ্ভট হাসির গল্প করে। ছেলেমানুষের মতো উৎকট অঙ্গভঙ্গি করে

নাচে। কোন কালে দেখা সিনেমার নায়ক নায়িকার অভিনয় করে দুজনে দেখায়।
উরাতীয়াকে।

উরাতীয়া হেসে বাঁচে না। বলে, 'ছি ছি! দূর দূর!' তারপর আদুরে মেয়ের
মতো বলে, 'আবার দেখাও না?'

আর দুই মল্লবীর তাই করে। পবন-পোয়েরা যে এত সরল ও হাসিউচ্ছল তা
জানত না গাঁয়ের মানুষেরা। রাস্কসের মূর্তির মধ্যে মানুষের দেখা পেয়ে, তারাও
যাওয়া আসা করতে থাকে।

কিন্তু তাদের দশ বছরের ঘুণধরা রক্তে লুকিয়েছিল এক ভয়ঙ্কর বিষধর।
লুকিয়েছিল নিতান্ত দেহসাধক, সংসার ও ভালবাসাবিমুখ মল্লযোদ্ধাদের মনের
অগোচরে। সুযোগ বুঝে সে কুণ্ডলীর পাক খুলতে লাগল।

এত সুখ কথা ও হাসি। এত বন্ধুত্ব। তবু মল্লযোদ্ধাদের কোথায় চাপা ছিল
আগুন, সে এবার থেকে জ্বলে জ্বলে উঠল আড় কটাক্ষে, শুধু চোখে চোখ। চোখে
চোখ ভাব বিনিময়ে ছিল তারা দুরন্ত ও অভ্যস্ত। আজও তার ব্যতিক্রম হল না।

যে মুক্ত ধারায় স্নান করে তারা দুদিন হেসেছিল অনর্গল, সে হাসি আড়ষ্ট হয়ে
গেল। ওই মুক্ত ফল্গুধারাটা তাদের কাছে শুধু ছাব্বিশ বছর বয়সের একটি যৌবন
কলঙ্কিত দেহ। মুক্ত আনন্দ, পাশব কামনার একটি যন্ত্র। দশ বছর ধরে তারা শুধু
দেহের সেবা করেছে, দেহকে ভালবেসেছে। দেহাশ্রিত প্রবৃত্তি বার বার তাদের ওই
দিকে অঙ্গুলিসঙ্কেত করল। তাদের বন্ধুত্বের বন্ধন কবে ছিঁড়ে গেছে টেরও পায়নি।
যে ভয়ঙ্কর দৈহিক শক্তি তাদের মিলনের সূত্র ছিল, আজ তা পরস্পরকে আক্রমণে
উদ্যত করল।

তারা মুখে কিছু বলল না। কিন্তু একজনের চোখ, 'খবরদার! এদিকে নয়।'
আর একজনের 'নয় কেন?'

কিন্তু তারা লড়ে রোজ। খায় একসঙ্গে, গল্প করে। তবু যেন ভয়ে না। হাসিটা
যেন ধাক্কা খেয়ে খেয়ে বেরোয় গলা থেকে।

অবাক হয় উরাতীয়া। সব না বুঝলেও এটা বোঝে অদৃশ্য কী যেন ঘটছে। ওরা
হঠাৎ এমন করছে কেন? জিজ্ঞেস করলেই ওরা দুজনেই বোকার মতো হেসে
ফেলে। আসর জমে উঠতে চায়। উঠতে পারে না।

সেই প্রাগৈতিহাসিকতা আরও নিষ্ঠুর রূপে যেন ফুটে উঠছে। অবাক হয়ে
চেয়ে দেখে উরাতীয়া। বোঝে না, কেবল আড়ালে নিঃশব্দে কেঁদে মরে। ওরা
আমার দেবতা ও সহচর। ওরা দুদিন হাসল। কিন্তু আমি আসার আগেও কি ওরা
এমনিই ছিল? মনে হয়নি তো? তবে?

ঘরের মধ্যে রাঙা লাথপতির চেহারাটা বদলে যেতে লাগল। তার সোহাগ হয়ে
উঠল নিষ্ঠুর। আদর হয়ে উঠল ভয়ঙ্কর। অসহ্য আদরে সোহাগে উরাতীয়ার দেহটার

উপরে একটা ভয়ঙ্কর প্রতিশোধের আকাঙ্ক্ষা যেন তার।

আর ঘামারি সেই সময়, অনেক রাতে চালু সড়কের পাশ থেকে উঠে আসে একটা ক্ষিপ্ত ভল্লুকের মতো। দাঁড়িয়ে থেকে লাখপতির বন্ধ ঘরটার দিকে। যন্ত্রণাকাতর জানোয়ারের মতো বুক থেকে ফেটে পড়া শব্দটাকে চেপে ধরে কণ্ঠনালিতে। কান পাতে দেয়ালে।

কোন শব্দ নেই। মাঘের উত্তরে হাওয়া তার গায়ে ও দেওয়ালে ধাক্কা খেয়ে যায়।

শুকিয়ে উঠল উরাতীয়া। লাখপতিকে তার কিছু অদেয় ছিল না। ঘামারির একাকী জীবনের বেদনাই ছিল তার প্রীতি ও সৌহার্দের গৌরব।

আড়ালে যদি সে জিজ্ঞেস করে লাখপতিকে, 'কি হয়েছে তোমাদের?' লাখপতি শুধু চেয়ে থাকে। খুঁটিয়ে খুঁটিয়ে দেখে উরাতীয়ার সর্বাঙ্গ, তারপর হঠাৎ খপ করে উরাতীয়াকে ধরে ভয়ঙ্কর আদরে দলা পাকিয়ে ফেলে। সে আদরে শুধু একটা অসহ্য যন্ত্রণা অনুভূত হয় রক্তের মধ্যে।

ঘামারিও যেন তেমনি। জিজ্ঞেস করলে তেমনি করে চেয়ে থাকে।

কিন্তু গায়ে হাত দেয় না। দিতে চায় যেন। উরাতীয়া ভয় পায়।

একই রকম দুজন। একই চাউনি ও চেহারা। কাছাকাছি থাকলেও একসময় আলাদা করা যায় না ওদের। একই চালে ওরা দুজন চলেছে।

তবু ওরা লড়ে। তবে মহাবীরকে প্রণাম করে হাত মেলায়, তারপর লড়ে। তবু ওদের চোখে চোখ মিললেই, পাথরের ঘর্ষণে যেন আগুন ঠিকরায়। লড়তে লড়তে ক্ষিপ্ততা দেখা দেয়, মুহূর্তই নতুন নতুন আক্রমণ চালিয়ে যায়।

উরাতীয়া যেন কেমন করে বুঝতে পারে, লড়াইটা অন্যপথ ধরেছে। এই কয়েক মাসের মধ্যে বুঝেছে। সে বাধা দেয়, থামতে বলে।

ওরা থামে। ছেড়ে আসে মল্লক্ষেত্র। কিন্তু ওদের ভেতরে দুটো জানোয়ার ফুঁসতে থাকে। উরাতীয়াকে মাঝখানে রেখে অনেকক্ষণ ধরে তারা শাস্ত হতে থাকে।

কিন্তু এই অবস্থাও আর রইল না। হঠাৎ লাখপতি একদিন ঘামারির উনুনটা লাথি মেরে ভেঙে ফেলল।

ঘামারি বলল, 'ভাঙলি যে?'

লাখপতি জবাব দিল, 'ওটা পুরনো হয়ে গেছে।'

ঘামারি খেতে এল না। লাখপতি বলল, 'খাবিনে?'

ঘামারি জবাব দিল, 'না। তোদের রান্না ভাল লাগে না। নিজে রাঁধব।'

আশ্চর্য শাস্ত তাদের কথাবার্তা। বিকেলবেলা দুধ দুইতে গিয়ে উরাতীয়া দেখল ঘামারির গরু নেই। জিজ্ঞেস করল, 'গাই কোথায়?'

— 'মাঠে।'

—‘দুইতে হবে না?’

‘না’ বলেই হঠাৎ ঘামারি দু’হাত বাড়িয়ে দিল উরাতীয়ার দিকে। এই প্রথম। উরাতীয়া দেখল, রাত্রে বন্ধ ঘরের ক্ষিপ্ত স্বামী লাখপতি যেন তার সামনে দাঁড়িয়ে। এতদিন ছিল চাপা বেদনা ও অপমান। আজ তার চোখে দেখা দিল রাগ আর ঘৃণা। নিঃশব্দে পালিয়ে এল সে। নইলে ঝাঁপিয়ে পড়বে এখন।

তারপর এপার ওপার হল। দুটো সংসার হল। কেবল দেখা হয় মল্লক্ষেত্রে। এসে দেখে উরাতীয়া। বসে হাসে, কথা বলে কিন্তু একটা রুদ্ধশ্বাস গুমসোনি নিয়ে নেমে আসে আকাশটা।

লড়াইয়ের শেষে উরাতীয়া দেয় দুধ আর সিদ্ধি। ওরা খায়।

হয়ত লাখপতি বলে, ‘হিড়িস্বাকে কিভাবে মেরেছিল ভীম?’

ঘামারি : ‘টুটি ছিড়ে।’

উরাতীয়া কেঁপে উঠে বলে, ‘ওসব কথা থাক।’ শঙ্কিত অথচ আদুরে গলায় বলে, ‘গান গাও তোমরা একটু, আমি শুনি।’

‘গান!’ বিদ্রূপের মতো শোনায় যেন কথাটা। আর উরাতীয়ার দুই চোখ বেয়ে জল পড়ে। কিন্তু জগৎবিমুখ, দেহান্ত্রিত এই মল্লযোদ্ধাদের বুক জেগেছে যে অজগর, সে ফুঁসছে দিবানিশি।

মুক্ত ফল্গুধারায় স্নান করেই শেষ হয়েছে। মুক্তিটাকে দেহের মতো লুফে নিতে চাইছে তারা।

শীত গেছে। বসন্ত এসেছে। রাত এসেছে। ঢালু সড়কে ধুলো উড়ছে। গাছগুলি পাগল হয়েছে।

সেদিন শেষ গাড়িটা যায়নি তখনো। লড়াই শেষ করে বসেছে দুইজন। পরস্পরকে বার বার আক্রমণ করছে তারা। এমন কি, আইন ভঙ্গ করে আঘাত করছে। সে জন্য ঘামারির কাপালটা উঠেছে ফুলে আর লাখপতির ঠোঁটের কষে রক্ত।

উরাতীয়া নিয়ে এল দুধ সিদ্ধি। বুক ফেটে যাচ্ছে এই দুই বন্ধুর লড়াই দেখে। তার জন্য ওরা পরস্পরকে ঘৃণা করছে, লড়ছে। কিন্তু কেন, কেন? সে ওদের বুক ভরে নিয়েছে, ওরা কেন পারছে না। তবু হাসতে চাইল, আর চোখ ফেটে জল এল। ‘ভগবান। ওরা মানুষ চেনে না। ভাল বাসে না, হাসে না। আমি হাসতে হাসতে এলাম, ওরাও দুদিন হাসল। তারপরে এই যন্ত্রণা। সে কি শুধু আমি? তবে ক্রীতদাসী আমি ছিলাম ভাল।’

দুধের পাত্র এগিয়ে দিল লাখপতির দিকে। কিন্তু চকিতে কি ঘটে গেল, গেলসটা নিয়ে লাইনের ওপর ছুঁড়ে ফেলে দিল লাখপতি। মুহূর্তে কিসের এক সংকেত, দুই মল্লযোদ্ধাই চকিতে উঠে দাঁড়াল। পরস্পরকে দেখল কয়েক মুহূর্ত। তারপর দুজনেই দু’দিক থেকে গিয়ে দাঁড়াল মল্লক্ষেত্রে।

উরাতীয়া ব্যাকুল গলায় বলল, 'আর না, আর লড়ো না।'

কিন্তু ততক্ষণে একটা আচমকা রদ্দা মেরে ঘামারিকে ছিটকে ফেলেছে লাখপতি।
কিন্তু চকিতে ঘামারি লাফ দিয়ে উঠেছে। তারপর পরস্পর ঝুঁকে দুজন কয়েকবার
নিঃশব্দে পাক খেল চারপাশে। অন্ধকারেও তাদের জ্বলন্ত চোখ দেখছিল পরস্পরকে।

উরাতীয়া ছুটে এল মল্লক্ষেত্রের মাঝখানে, 'পায়ে পড়ি, ওগো পায়ে পড়ি, থামো।'

কিন্তু তাকে এড়িয়ে বনবেড়ালের মতো নিঃশব্দ উল্লস্কনে ঘামারি লাখপতির
পা দুটো ধরে, তাকে নিয়ে সশব্দে পড়ল মাটিতে। আর তাদের দেহের ধাক্কায়
লাইনের তারের কাছে ছিটকে গেল উরাতীয়া। চিৎকার করে উঠল, 'থামো!'

থামবে না। প্রাগৈতিহাসিক জানোয়ার দুটো আজ ইতিহাসের যুগকে তবাস্বিত
করার জন্য নিজেদের বোধহয় শেষ করবে। দেখা গেল, লাখপতির পা ধরে পাক
দিচ্ছে ঘামারি, শূন্যে তুলে আছড়ে ফেলতে চাইছে। কিন্তু লাখপতি আঁকড়ে ধরে
আছে মাটি। পরমুহূর্তেই আবার দেখা গেল, দুজনেই জাপটা জাপটি করে গড়াগড়ি
দিচ্ছে, হুঙ্কার ছাড়ছে, পরস্পরের গলা টিপে ধরার চেষ্টা করছে। তারপর দেখা
গেল, একজনকে চিৎ করে ফেলে গলা টিপে ধরেছে একজন। আর একজন দু
পায়ের মাঝখানে চেপে ধরেছে গর্দান। আর একটা গোঙানি।

দূর থেকে একটা আলো এসে পড়েছে মল্লক্ষেত্রে। কিন্তু আমৃত্যু এই হিংস্র
লড়াই। সেই আলোয় উরাতীয়া দেখল, পাথরে পাথরে ঘর্ষণ হচ্ছে। রক্ত ঝরছে
পাথরের গায়ে।

আলোটা ক্রমে তীব্র হচ্ছে। শেষ গাড়িটা আসছে। উরাতীয়া মরিয়া হয়ে ওদের
দুজনের ওপর ঝাঁপিয়ে পড়ল, তার নরম হাতে আঘাত করল, চিৎকার করে উঠল।
'থামো, থামো বলছি।'

কিন্তু তাদের পরস্পরের পেষণে শুধু তীব্র গোঙানি। ছিটকে যাচ্ছে মাটি। খাদ
হয়ে যাচ্ছে মল্লক্ষেত্র।

উরাতীয়া অস্থির অসহায় ভাবে উঠে দাঁড়াল। মরবে, হয়ত দুজনেই মরবে তার
চোখের সামনে। শুনবে না, কিছুতেই শুনবে না।

এই ভয়ঙ্কর দৃশ্য থেকে চোখ ফিরিয়ে সে অপলক দীপ্ত চোখে তাকিয়ে রইল
দ্রুত এগিয়ে আসা আলোর দিকে। অসহ্য ঘৃণায় অপমানে, বেদনায় ও অভিমানে
অভিশাপ দিতে চাইল সে। দিতে গিয়ে আরও জোরে কেঁদে উঠল। আর একবার
ওদের দিকে দেখে চোখে হাত দিল। গাড়ির শব্দটা কানের কাছে বেজে উঠে মাটি
কাঁপিয়ে তুলতেই ঝাঁপিয়ে পড়ল সে লাইনের উপর।

তারপর একটা তীব্র চিৎকার, এঞ্জিনের গায়ে ধাক্কা খেয়ে চূর্ণবিচূর্ণ মাথাটা
নিয়ে সে আবার ছিটকে পড়ল মল্লক্ষেত্রের সামনে। গাড়িটার শব্দের সঙ্গে সঙ্গে
হারিয়ে গেল পেছনের রক্ত ক্রুদ্ধ চোখের মতো লাল আলোটা।

হয়ত উরাতীয়ার মৃত্যু চিৎকারটা তাদের পাশবিক মল্লযুদ্ধের চেয়েও তীব্র ও ভীষণ জোরে বেজে উঠেছিল। হঠাৎ মল্লযোদ্ধাদের দুজনেরই হাত শিথিল হয়ে এল। দুজনেই তারা ছেড়ে দিল পরস্পরকে। দুজনেই উঠল, দুজনেই ফিরে তাকাল উরাতীয়ার শরীরের দিকে। মুহূর্তে চমকে, দুজনেই টলতে টলতে এসে বসল উরাতীয়ার দুপাশে। তাদের মতো ভয়ঙ্কর মানুষরাও দারুণ আতঙ্কে যেন শিউরে ডুকরে উঠল।

কে লাখপতি, কে ঘামারি, আর তাদের চেনা যায় না। তারা একরকম দেখতে, একই তাদের কণ্ঠস্বর। একজনেই দুজন।

একজন দূর থেকে চাপা গলায় ডাকল, 'উরাতীয়া!'

অন্ধকারে চক চক করছে উরাতীয়ার সর্বাস্থের রক্ত। সে নিঃশব্দ, নীরব। সে মারা গেছে।

আর একজন ডাকল, 'উরাতীয়া!'

কোন শব্দ নেই। তারা আবার দেখল পরস্পরকে, আবার উরাতীয়াকে। তারপর ভূমিকম্পের পাথরের মতো কেঁপে উঠল তাদের বিশাল শরীর দুটো। কোবা করুণ অসহায় জীবের মতো কাঁপতে লাগল। আর রক্তে ও চোখের জলের নোনা স্বাদে ভরে উঠতে লাগল মুখ। তারা আবার ডাকতে চাইল, 'উরাতীয়া!' কিন্তু পারল না। শুধু বুক বাজতে লাগল, উরাতীয়া! উরাতীয়া!

একদিন তারা দেহশ্রিত বদ্ধ জীবনবোধে আশ্রয় নিয়েছিল এখানে। তারপর মুক্তি এসেছিল, তারা হেসেছিল, গান করেছিল। তাদের ঘাম ঝরেছিল একদিন। আজ রক্ত পড়ল, চোখের জলে ভিজল মাটি।

শুধু নিথর পড়ে রইল সেই মেয়ে উরাতীয়া। বুক বাজল তার নাম। বাজতে লাগল, বাজতে থাকবে হয়ত চিরদিন, যতদিন না সে আবার এসে হাসবে, কথা বলবে। তেমনি বাজতে লাগল, আর দূর দক্ষিণের পাগলা হাওয়া হা হা করে ছুটে এল।